


القصص بطرس السرياني



عظات مضيئة معاشة

الجزء الخامس

القصص
بيشوي كامل



الفهرس

رقم
الصفحة

اسم العظة

٥	الأحد الأول من الخماسين المقدسة
٣٢	الأسبوع الثاني من الخماسين المقدسة
٥٥	عشية الأحد الثالث من الخماسين المقدسة
٧٤	الأحد الثالث من الخماسين المقدسة
٩٥	عشية الأحد الرابع من الخماسين المقدسة
١٠٩	الأحد الرابع من الخماسين المقدسة
١٢٦	عشية الأحد الخامس من الخماسين المقدسة ...
١٤٦	الأحد الخامس من الخماسين المقدسة
١٦٣	عشية الأحد الأخير من الخماسين المقدسة
١٩١	عظة الأحد السادس من الخماسين المقدسة

الأحد الأول من الخماسين المقدسة

(يو ٢٠ : ١٩ - الخ)

”الرب يسوع هو إيماننا وقيامتنا من الشك“

الأحد الأول من الخماسين المقدسة بتعبره الكنيسة عيد سيدى ، يعنى المسيح ليه أعياد سيديّة كبيرة ، وأعياد سيديّة صغيرة . من الأعياد السيديّة الصغيرة : زى الختان ، ودخوله أرض مصر ، الهروب لمصر ، ودخول الهيكل .. فأحد توما ده عيد من أعياد المسيح السيديّة الصغيرة . الأعياد الكبيرة زى البشارة والميلاد ، والغطاس ، والقيامة .. فالنهاردة عيد من أعياد المسيح السيديّة ، ويمكن إحنا ما بناخدش بالنّا منه لأنه دائماً بييجى يوم أحد ، وإحنا بنعتبر يوم الأحد دائماً يوم فرح . لكن حقيقة النهاردة عيد من الأعياد السيديّة بتاعة المسيح اللى هو أحد توما .

والكنيسة الواعية بالروح القدس اعتبرت أن
اصلاح الإيمان بتاع تلاميذ المسيح ده عيد لأن الإيمان لو
إنحرف يبقى خطر كبير جداً . لكن المسيح نفسه هو اللى
بيجى ويصلح الإيمان اللى إحنا أحياناً بنتعثر فيه . فقال
له : " هات إيدك وحطها مطرح الجروح .. ولا تكن بعد
غير مؤمن .. وشوف ياتوما .. فيه ناس هاتآمن من غير
ما تشوف .. طوبى لهم .

لكن يا أحبائى موضوعنا بنعمة ربنا هو القيامة
فى حياتنا . عايز النقطة دى تبقى ثابتة فى ذهننا إن
المسيح مش جاي علشان يقوم الأموات من القبور ..
وإن كان هذا حدث فى وجود المسيح على الصليب لما
أسلم الروح خرج كثير من الأموات اللى فى القبر ،
ودخلوا المدينة المقدسة أورشليم ، ومشوا فيها .

القيامة عمل اختباري

لكن أريد إن إحنا نكون واضحين جداً .. صحيح إن المسيح كسر الموت وشوكته .. وقام من القبر لكن المسيح مش جاي علشان خاطر يقوم الأموات فى اليوم الأخير ، لأن الله قادر بدون مجيئه للعالم إن هو يحدد يوم أو لحظة لقيامة الأموات ، والناس كلها تقوم وكل واحد يعامله ربنا حسب أعماله . لكن أرجو إن يكون ذهننا واضح جداً إن القيامة بتاعة المسيح عمل اختباري يدخل فى حياة كل واحد مننا زى ما نشوف دلوقتى حتى لو كانت الأبواب مغلقة .

فى عشية يوم القيامة جه المسيح دخل وكانت الأبواب مغلقة وقال لهم " سلام لكم " ، وفرح التلاميذ إذ رأوا الرب . وبعدين نفخ فى وجوههم وقال لهم : " اقبلوا الروح القدس من غفرتم خطاياهم تغفر لهم " بس ماكانش موجود معاهم توما .. فجاء مرة ثانية فى يوم الأحد .. ونقطة لطيفة تقدر تحس منها أن ظهورات ربنا يسوع

المسيح كانت يتم غالباً يوم الأحد . مع إنه هو ممكن يظهر
فى أى وقت ، لكن هو كان بييجى يوم الأحد لأن يوم
الأحد ده أصبح يوم الرب . والكنيسة بتجتمع لكسر الخبز
يوم الأحد . وفيه ناس الأيام دى بيققوا أصلاً غالباً يهود
يعنى فيه برة كنيسة مخصوص لليهود المنتصرين ، أو
اليهود المسيحيين .. دول بعض منهم يقول لك نعيد يوم
السبت . فانت عارف دايماً إن اليهود لهم حاجات دايماً
بيققوا متمسكين بها زى أيام الرسل . يطلع اشكالات عن
الختان ولازم المسيحي يتختن ولا ما يتختتش ، فتبص
تلاقى موضوع السبت والأحد برضه بيثيروه اليهود
الداخلين فى الأيمان حسب عاداتهم الأولى . لكن المسيح
قام يوم الأحد ، وظهر للتلاميذ ثانى يوم الأحد .. والروح
القدس حل يوم الأحد .. أصبح اليوم الجديد .. يوم الرب
ده يوم الأحد.

القيامة حياة معاشة واختبار شخصي

القيامة يا أحبائي عمل .. يعنى طلع من مخك
نهائيا إن القيامة حكايته إن الناس تقوم من القبور يوم
القيامة اللي بنتكلم عنه كل الديانات .

إحنا بنتكلم عن موضوع تانى بعيد خالص خالص
إحنا بنتكلم عن القيامة كإختبار شخصي فى حياة
المسيحي .. تقول لى إزاي عمليا ؟ .. أهو الإنجيل
بيعلمنا . كان التلاميذ مجتمعين بسبب الخوف .. كانوا
مجتمعين من أجل الخوف من اليهود فجاء يسوع ووقف
فى وسطهم وقال سلام لكم وأراهم يديه ورجليه . إنت
عارف حتى التعبير العادى يقول لك فلان ده ميت من
الخوف . فدل كانوا فى حالة موت .

فالموت فى الواقع مش ببيجي من بره .. الموت
جوه .. فالخوف موت لأنه قلة إيمان ، نسيوا وعود
المسيح .. وكلامه فى الكتب .. زى ما قال لتلميذى

عمواس اللى كانوا ماشيين بيتضاربوا فى الطريق .. قال لهم أيها الغبيان والبطيئا القلوب .. **فالخوف ده موت** .
فدخل المسيح علشان يقوم الناس الميتة دى جوه العلية . فدخل وقال بس كده "سلام لكم" . أول لما قال سلام لكم .. **راح الخوف** . رد الفعل على طول يقول لك كده : **ففرح التلاميذ** .. من الحزن وخوف .. إلى فرح .
أهى دى القيامة . فى اختبار الإنسان دى اسمها قيامة .
حصل إزاي الكلام ده ؟!

كل اللى نعرفه إن ربنا دخل وأراهم يديه ورجليه وجراحاته .. يعنى علامات الصليب وراها لهم . بعدين قال لهم كمان سلام لكم .. بس هو ده . طيب نجيبوه من أين يسوع علشان يضيع الخوف؟ علشان **الخوف ده مرض من أمراض الموت** . قال ده يدخل والأبواب مغلقة والأبواب مغلقة ده موضوع هو **عمق اختبار القيامة** .
أحيانا نتوقع إن ربنا يدخل من الباب المفتوح .. دية مش القيامة . ده هو عايز يقول كده .. ربنا لما التلاميذ وصلوا

لدرجة من اليأس والفشل ، وقالوا خلاص مافيش فائدة إن يسوع يقوم من الأموات .. ووصلوا للدرجة إنهم خافوا من اليهود وانتظروا حكم الموت يتنفذ فيهم ، واليهود بيدوروا عليهم بعد ما خلصوا من موضوع المسيح ها يدوروا على التلاميذ . فكانوا في منتهى الخوف لأنهم كانوا متوقعين الموت.

القيامة هي الدخول والأبواب مغلقة

والأبواب المغلقة دخل المسيح .. فالقيامة هي الدخول في حياتنا والأبواب مغلقة . علشان كده المسيحية لا تعرف اليأس أو الفشل .. ما تعرفهوش أبداً أبداً .. إيه أقصى درجات القسوة اللي في العالم .. الموت ! إذا كان الموت ده هو آخر حدود يعنى اليأس والفشل . خلاص واحد بيطلع في الروح إيه الأمل اللي إيه ؟ هنا بيتدى يعمل ربنا اللي هو القيامة من الأموات . علشان كده المسيح دائماً قلبه مليان بالرجاء ، وبالقيامة .. قلبه مليان بالقيامة .. يسوع يقول : " أنا هو القيامة . "

ما كانش توما موجود كان فيه موت تانى بيدب
فى حياة توما . تتصور ياعزيزى إن توما ده يقول لا ده
ماfish ربنا ، وإن المسيح ده ضحك علينا ، وكل اللى
عمله المسيح ده كان خداع . تتصور إنسان تقابله بالشكل
ده ، مثلاً مسيحى يقول لك لا .. ولا مسيح ولا كلام من
ده ده كلام نظرى ومش عملى . ولو كان المسيح معانا
ما كانتش أصابتنا المشاكل والضيقات والتجارب والحاجات
دى . تقول لا يا أخى ده فيه ربنا موجود ، وفيه صليب
آلام ، وفيه مسيح ها يقوم فى اليوم الثالث .. يقول لك لا .
دى حالة توبة ما تفتكرش إن دى حاجة بسيطة .. توما
كان فى حالة الشك بتاعته كان فى منتهى الموت ، فدخل
ربنا والأبواب مغلقة وقوم توما وقال له : لا تكن بعد غير
مؤمن لكن خليك مؤمن . وقال له : يا توما أنا عندى
دواء للإيمان إذا إنت تأملت فى الصليب اللى هو كان
عثرة ليك وأفقدك الإيمان .. لو تأملت فى الجراحات وفى
المسامير بتاعتي ها تتحول لإنسان مؤمن . فتوما حس
بحاجة كده جريت فى دمه اسمها القيامة . قال له يارب

أنا مآمن ١٠٠ ٪ . قال له طبعاً لأن أنا اللي إديتك القيامة
.. دية .. وأنا ها أديها للناس من غير ما يشوفوني . إنت
شفتني وآمنت ، لكن ها أديها للناس من غير ما يشوفوني .

القيامة هي عمل ربنا القائم من الأموات / عمل داخلي

من أجل هذا يا أحبائي القيامة هي عمل ربنا
القائم من الأموات .. القيامة هي ضد الموت .. القيامة
هي عمل داخلي يشتغل في حياة الإنسان . معلىش ها أكرر
الجملة دي كتير خالص ، وهاأكررها في المرات اللي
جاية.

سفر الرؤيا بيقول إن فيه قيامتين ، في الإصحاح
عشرين : القيامة الأولى اللي هي بيعملها المسيح في قلبنا
وفي حياتنا . القيامة الثانية اللي هي نبقي نطلع فيها من
القبر . القيامة الأولى : ده عمل المسيحية .. فالمسيحي
تعرفه إزاي ؟! يقول لك شخص .. القيامة عملت في .
قيامته إيه يا عم ؟ ده لسه فاضل على القيامة .. يوم القيامة

- ده يعلم به ربنا .. قل له لا .. ده أنا عايش القيامة . دي اسمها القيامة إيه ؟ الأولى . يقول كده سفر الرؤيا
- إصحاح ٢٠ : " مبارك ومقدس من له نصيب فى القيامة الأولى ."

القيامة هي خلق الإنسان العتيق ولبس الجديد

- القيامة الأولى زى ما تكلمت عنها قراءات النهارده .. بتقول كده : اخلعوا الإنسان العتيق الفاسد بحسب شهوات الطغيان ، وتجددوا بروح ذهنكم والبسوا الإنسان الجديد المخلوق نظير الله . اخلعوا القديم والبسوا الجديد .. آهى دي قيامة .. طبعاً هو إنت لو تشيل الجسد بتاعى ده بره ، وتحط لى واحد تانى ما هى دي تبقى القيامة فعلاً . إحنا فى القيامة ها نعمل كده . فبولس الرسول قال لا .. ده القيامة بنمارسها دلوقتى . بنخلع حاجة وبنلبس حاجة . علشان كدة القيامة عندنا مش مسألة إنك ما تعملش خطية . لا ده إنت بتلبس حاجة تانية بتشيل حاجة وبتحط حاجة تانية.

بتشيل إنسان ميت .. ميت .. وتحط إنسان تاني
حى . الإنسان الميت ده اسمه الإنسان العتيق بحسب
شهوات الجسد ، وشهوات العالم ، واغراءاته .. إلخ.
تقول يا أبونا ده كلام صعب .. إنت عارف
الضغط الحالى على الإنسان من ناحية العالم الخارجى .
أقول لك فعلا الكلام ده صعب ، لكن أتؤمن أن يسوع
يدخل من الأبواب المغلقة ؟! تقول لى آه أنا بآمن بالحكاية
دى .. خلاص ..

إذن إذا كانت كل السكك قدامنا إن إحنا نعيش
حسب الإنسان الجديد مقفلة فإن لك إيمان إن الله يدخل فى
حياتك .. " حياتك " مش عايز حياتك الكويسة .. حياتك
الوحشة جداً جداً . إن كان لك إيمان إن يسوع يدخل
والأبواب مغلقة ، فتثق تماماً إنه يتخلق فى حياتك إنسان
جديد يتجدد مرة أخرى حسب صورة خالقه . أما إيماننا
إحنا الكنسى بتاع الكنيسة بتاعتنا إن هذا الإنسان الجديد
اتخلق من يوم المعمودية اتدفنا فيبقى إيه ؟ متنا وبعدين
اتخلق انسان جديد علشان كده بولس الرسول كان حريص

جدا إن يقول إن هذا الإنسان يتجدد في ذهننا حسب صورة .
خالقه.

ما معنى التجديد

فكلمة يتجدد يعنى إيه ؟ يتجدد يا إخوتى زى
إنسان- إتولد بس ملامحه بتبان أكثر ، يعنى لما ييجى كده
بعد ما يتولد بيوم يقول لك الولد ده شبه مين ؟ يقول لك
مش عارف لسه شكله ما اتكونش .. بعد يومين يقول لك
فيه ملامح من أبوه .. شوية بعد شوية يقول لك ده واخد
من أمه شوية .. بعد أسبوع شكله يوضح .. أهو كل لما
يتغذى .. كلما يكبر ، كلما يبيان . بعد شوية .. سنة ..
اتنين يقول لك الولد ده شكل أبوه تمام ، واخد ملامحه
بالضبط . إذن فى عملية تجديد بيتخلق فى شكله رغم إنه
اتولد - خلى بالك علشان فيه ناس بتغلط وتقول لا ، ده أنا
يا دوبك وأنا عندى عشرين سنة ، كده لما أقول
أنا اتخلصت ولا أنا ولا بتاع .. وربنا يحمى الكنيسة من
هذه الأمور اللى الشيطان بيزجها فى هذه الأيام.

الكنيسة ما علمتناش كده أبدا . علمتنا إن الإنسان
إتولد فينا بالمعمودية .. تقول لى لكن فيه ناس اتعمدوا
والإنسان الجديد مش واضح فى حياتهم . لأن هم بيخطوا
عليه . بيردموا عليه بالأعمال الوحشة الشريرة . وتعرف
لو كان الإنسان الجديد ده بيتخلق لما يبقى عندك عشرين
سنة ولا ثلاثين سنة . لما تأمن بربنا وتبقى كويس وبتاع
يبقى ده عملك إنت . يبقى ما دخلش والأبواب مغلقة .
يبقى لك الحق أن تقول أنا اتخلصت ، أو أنا اتجددت فى
اليوم الفلانى فى الساعة الفلانية .. لك حق تقول أنا لكن
ما تقولش المسيح .. تقول أنا اتجددت . فى اليوم الفلانى
فى الساعة الفلانية .. لك حق تقول أنا لكن ما تقولش
المسيح .. تقول أنا اتجددت . لكن أنا ما أقدرش أقول أنا
اتجددت فى اليوم الفلانى . لكن أقول ولدنى المسيح فى
المعمودية بالنعمة المعطاة لى . لكن ولا كنت أستحقها
ولا أدري بها . أما وظيفتى حالياً إن أنا أخلع باستمرار
الإنسان العتيق اللى بيتراكم من الجسد ومن العالم . اللى
قال عنه الرسول . قال عنه ربنا يسوع :

' اجتهدوا أن تدخلوا من الباب الضيق ' . تقول لى
لنهاردة دلوقتى ممكن يكون فيه اختبار للقيامة ؟ أقول لك
آه . اختبار للقيامة .. مش إنت عايز تقول أنا عايز
النهاردة اختبار للقيامة .. هل الإنسان الداخلى الموجود
فيك بيكبر ؟ تقول لى وده مين يعرفه ؟ أقول لك إنت بس
تبص تلاقى ملامح حياتك الداخلية بتأخذ ملامح حياة ربنا .
يتجدد حسب صورة خالقه .. طب وصورة خالقه ؟ .. هو
حد شاف ربنا ؟ أقول لك آه .. مسيحيتنا لذيدة . لما تلاقى
حياتك ابتدت تنطبق على حياة المسيح على الأرض ..
الوداعة بتاعة المسيح ، اللطف بتاع المسيح .. المحبة
بتاعة المسيح ابتدأت تبقى فى إنسانك الداخلى . تبدأ تقول
آه .. ابتداء ينمو .. حاسس بيه يا أبونا خالص .. حاسس
بالإنسان الجديد اللى بيتجدد حسب صورة المسيح . حسب
صورة خالقه .. آه أمال أنا اسمى مسيحي ليه ؟ ما هو
سمونى مسيحي لأن الإنسان الجديد اللى إتولد فى ، اللى
بيتجدد بالقيامة يوم فيوم هو ذلك الإنسان ده شكل
المسيح . فعلشان كده سمونى مسيحي .

فالقِيامة اختبار يومي

نعيشه في حياتنا كل يوم . يمكن إذا كانت القيامة
لابد أن يسبقها موت .. خلع للإنسان العتيق علشان كده
المسيح لما وصى قال للشباب الغنى : " اذهب وبع كل
مالك وتعال اتبعنى كل يوم حاملا الصليب .. تعال
واتبعنى حاملا الصليب .. كل يوم .. كل يوم يقصد إن كل
يوم تخلع الإنسان العتيق ، وكل يوم يتجدد فيك الإنسان
الجديد .. حاجة لذیذة ولطيفة جداً إن كل يوم الإنسان
الجديد يكبر .. وكل يوم الإنسان العتيق يتخلع ويترمى .
أدى عملية القيامة.

فاختبارك للقيامة في حياتك اختبار يومي ..
اختبار يومي علشان كده يوحنا الحبيب يقول : " مبارك
ومقدس من له نصيب في القيامة الأولى ، سوف لا يكون
للموت الثانى سلطان عليهم " .

مبارك ومقدس يا أخى إن كان لك نصيب في
القيامة الأولى ، سوف لا يكون لك نصيب في الموت
الثانى .. لا يقدر الموت الثانى أن يؤذيك . علشان كده

ربنا يسوع بعد توما ما آمن يقول : " أما هذه فكتبت
لتؤمنوا أن يسوع هو المسيح ابن الله ولكي يكون إذا آمنتم
تكون لكم حياة أبدية بإسمه. "

معنى الحياة الأبدية

يعنى إيه حياة أبدية ؟ يعنى حياة .. الموت الثانى
ما يقدرش عليها . مادام فيه قيامتين ، يبقى فى القيامة
التانية فيه اتنين موت كمان . الموت الأولانى موت
بیمارسه الناس على الأرض دلوقتى . الموت الثانى هو
موت للعذاب الأبدى . فاللى قام فى القيامة الأولانية وغلب
الموت الأولانى موت الخطية اللى الكنيسة بتصلى وبتقول
" لا يكون موت الخطية لعبيدك ولا لكل شعبك " . فاللى
غلب الموت الأول مش ها يقدر الموت الثانى يسيطر عليه
لكنه سيكون انتقال.

(الكذب) اطحوا عنكم الكذب .. الكذب ده موت ،
فتكلموا بالحق . ده كلام بولس الرسول . النهارده فى
البولس علشان اللى ما سمعوش : اطحوا عنكم الكذب .

تكلّموا بالحق . الكذب يبقّى موت ، الحق يبقّى هو المسيح هو القيامة.

(السرقّة) يقول " لا يسرق السارق فيما بعد بل بالأولى أن يتعب عاملاً بيديه الصالح ليكون له ما يعطى المحتاج " . يعنى شوف إزاي : السارق مش يبطل سرقة يبطل سرقة دى مش فى المسيحية . لأ إنت ماتسرقش . يقول لك السارق يبطل سرقة علشان يبتدى يشتغل ويجيب علشان يعطى من له إحتياج . أهى دى قيامة .. أهى دى قيامة . لو واحد بيسرق ، وبطل يسرق يبقّى ما اتمتعش بالقيامة . لكن لو واحد بيسرق وبطل يسرق وابتدأ يشتغل وابتدأ يأخذ من اللى له ، ويعطى للى له إحتياج يبقّى إنسان بيمارس القيامة .. يبقّى القيامة نزع للقديم وإنسان جديد يتولد فيك . أرجو أن تضع فى قلبك إن فيه عملية بتدب فى حياتك .. إنسان جديد اتخلق حسب صورة خالقه . هذا الإنسان لا يعرف السرقة ، لكن يعرف العطاء.

فأنت لما بتخلع السرقة منك ، فالانسان الجديد
بيتجدد أوتوماتيك كده حسب صورة خالقه . إزاي أنا ما
أعرفش يخش ربنا إزاي والأبواب مغلقة ؟! ده موضوع
لا أشرحه ولا أتعرض ليه . لكن موضوع أحب أحطه فى
قلبي إن ربنا يدخل والأبواب مغلقة فى حياتى . ليس
هناك موضوع صعب .. ولا خطية صعبة .. ولا حاجة
صعبة على المسيحى .. أن كل شىء ممكن ربنا يدخل بيه
فى حياتنا والأبواب مقفلة.

(الكلام القبيح) لا يخرج كلام قبيح من أفواهكم
.. بس ؟ قال لا .. بل كل ما كان صالحاً للبنیان حسب
الحاجة ليعطى نعمة للسامعين . بس ما نطلعش كلام
وحش من بقی ! قال لا . ما تطلعش كلام وحش من بقیك
يبقى إنت راجل مؤدب أدى كل الحكاية . لكن ما تطلعش
كلام وحش من بقیك .. بل تطلع كلام مملوء نعمة يفيد اللى
قدامك ، ويقربه لمعرفة ربنا كى يعطى نعمة للسامعين ..
يبقى دى عملية قيامة.

فالقِيامة اختبار بتعيشه فى حياتك أن تخلع حاجة
قديمة . وبتلبس حاجة جديدة .. بتعمل فيك عمل هو
ملاح المسيح بالضبط . علشان كده بيقول فى الآخر :
" كونوا لطفاء ، متحننين ، مسامحين بعضكم بعضاً كما
سامحكم الله فى المسيح .

عمل القِيامة الأولى

لما المسيح قال لو إنتم آمنتم بى ، الأعمال اللى أنا
أعملها تعملوها ، وأعظم منها .. طب اللى ها نعمله أعظم
من اللى أنت عملته يارب ؟؟ إنت قومت الميت .. قال
قومت الميت دى بسيطة .. أنتم أصلكم بتأخدوا بالشكل .
لكن النهاردة مش مهم تقويم الميت ، المهم إن يقوم الميت
الوحش اللى دخل جوة القلب اللى ريحته بتنتن وبتطلع
حاجات وحشة . يعنى تقويم الميت الكبير ده دى بسيطة ،
لكن كونك ترجع الإيمان لإنسان ابتداء يفكر المسيح .. أو
يشيل من قلبه الحاجات الوحشة .. وتحط مطرحها حاجات
كويسة .. أهو ده عمل القِيامة الأولى . " مبارك ومقدس

من له نصيب فى القيامة الأولى " . اللى له نصيب فى
القيامة الأولى لا يقدر الموت أن يؤذيه.

المحبة هى عمل القيامة

بالمرة نفوت على الكاثوليكون اللى إتقرأ النهاردة من
رسالة معلمنا يوحنا الحبيب يقول : وصية جديدة أعطيك .
هى دى تناسب القيامة !! قال آه . من يبغض أخاه .. من
يبغض أخاه فهو فى الظلمة ، ده فى الموت إلى الآن .
من يحب أخاه فهو فى النور . ليس فيه شك أما من يبغض
أخاه فهو فى الظلمة . وفى الظلمة يسلك ولا يعرف أين
يذهب لأن الظلمة أعمت عينيه . علشان كده يا أحبائى
محبة البغضة ظلمة . البغضة موت . والمحبة هى
الناحية الإيجابية ، هى عمل القيامة فى حياتنا.

" مبارك ومقدس من له نصيب فى القيامة الأولى " ..
هل بعد هذا يا عزيزى تقدر تعيد عيد القيامة من غير ما
تحس بالقيامة تعمل فى حياتك ؟ والقيامة تدب فى حياتك
من الداخل ، وتقول مع المسيح قمت فعلا.

ولما يقول لك إحنا فى الخماسين دلوقتى ، بييجى
لنا فتور فى أيام الخماسين بعد الأيام الحلوة بتاعة أسبوع
الآلام . تقول لهم دى أيام الخماسين أحلى من أيام أسبوع
الآلام كمان . لأن أيام الخماسين كلها اختبارات .. بأختبر
فيها المسيح اللى بيقوم فى حياتى كل يوم.

مبارك ومقدس من له نصيب فى القيامة الأولى ..
مبارك لك يا عزيزى لو لك نصيب فى القيامة الأولى
سوف لا يكون للموت الثانى سلطان عليك.

لكن أيضاً المسيح أعطانا دواء عجيب . لما دخل
والأبواب مغلقة ، أراه يديه ورجليه . قال له حط إيدك
مطرح المسامير ومطرح الرجلين .. ده موضوع خطير .
إذن بعد القيامة شفت الجروح فى المسيح ؟ قال آه . حتى
يوحنا الحبيب فى سفر الرؤيا قال إن فى ظهور المسيح
الثانى ها ينظر إليه جميع الذين طعنوه ، وتتوح عليه
جميع قبائل الأرض . مع إن اللى طعنه واحد ، لكن يقول
لك " لا " .. ده ينظر إليه الذين طعنوه.

وزكريا النبي يقول كده فى نبوته : " وينظر إلى
(مش إلى) الذين طعنوه .. " وينظر إلى الذين طعنوه "
لكن زكريا بيقول اللى طعنوه كثير .. وسفر الرؤيا بيقول
اللى طعنوه كثير .. فاللى طعن المسيح مش يهوذا بس اللى
طعن المسيح ناس كثير . اللى طعن المسيح مش بطرس
اللى أنكر .. اللى طعن المسيح ناس كثير بتعمل أعمال
ضد المسيح .. فالقيامة ما بتبانش فى حياتها.

" ينظر إليه الذين طعنوه ، وسينوح عليه جميع
قبائل الأرض . " لكن أيضاً جراحات يسوع المسيح لذبة
جداً وشفافية . لما توما حط إيدته مطرح المسامير دبت
القيامة فيه ، ورجعت الحياة ليه .. ورجع الإيمان ليه من
جديد .

علشان كده لو نلاحظ إحنا فى قطع الساعة
السادسة فى الأجيّة بنقول : بالمسامير التى سمّرت بها
أنقذ عقولنا من طياشة الأعمال الهيولية إلى تذكّار أحكام
السمائية . يا أحبائى لا يمكن إنسان يتمتع بقوة القيامة

وتعمل القيامة الأولى في حياته إلا إذا اتمتع بحمل
الصليب وبجراحات ربنا يسوع المسيح.

ولما نطلع السماء بنعمة المسيح ، ها نشوف
المسيح ، وأول حاجة هاتشد انتباهنا ونجرى ليها هي
الجراحات بتاعته .. ها نشوفها . ها يشوفها الناس التانيين
وينوحوا عليها ، ويقولوا للجبال غطينا .. مش عايزين
نشوف جراحات المسيح . ايه اللي ضايقكم في المسيح ؟
قالوا جراحاته . وها نشوفها إحنا نقول : آلاه !!
جراحاته دي اللي شفتنا (أبرأتنا) !! جراحاته اللي هي
شفتنا !!

بالمسامير التي سُمِر بها المسيح تتسمر ضعفاتنا ،
وشهواتنا ، وميولنا الوحشة ، وحاجاتنا اللي إحنا اتكلمنا
عليها دلوقتي . وبالمسامير دي وبالجراحات دية ينبع فينا
ينبوع قيامة.

القيامة هي حياة

مبارك ومقدس من له نصيب في القيامة الأولى .
فالقيامة لم تعد حديث نتحدث عنه ، أو عيد نعيد له
وخلص .. لكن القيامة حياة تمارس كما تمارس حمل
الصليب .. تمارس أيضاً قوة القيامة .. تمارس بقوة ..
وتمارس والأبواب مغلقة .. تمارس بعد ما نفقد الأمل في
كل شيء . نحن نعيش القيامة الآن ونمارسها .. وزى ما
ها نشوف الأسابيع اللي جاية ، الكنيسة مرتبة لنا كل
أسبوع ترتيب لطيف خالص بتشرح لنا بيه القيامة.

يعنى مثلاً الأسبوع اللي جاي أو اللي بعده بنتكلم
عن القنول إن ده قيامة نأخذ جسد المسيح المذبوح ،
ونأكله ، ونعيش مع المسيح المذبوح ، والمسيح الحي
يعطيك حياة أبدية . لا يقدر الموت الثاني أن يكون له
سلطان عليك مثلاً . وبعدين تكلمنا عن الماء الحي بتاع
السامرية.

إنجيل السامرية يتقرى في القيامة زى الصيام
الكبير .. ليه ؟ قال .. لأن الروح القدس يعمل في حياتنا

بقوة القيامة .. الروح القدس يرمز ليه بالماء ؟ فالمية لما
انضرب المسيح فى جنبه ، ما كانش المسيح ميت ، فخرج
من جنبه دم وماء اشارة إلى أن الكنيسة ها تتولد من
جنب المسيح .. من جنب المسيح .. والمية هى رمز
للروح القدس اللى بيعمل فى الكنيسة . فالقيامة لها
أوصاف كثيرة خالص ها نشوفها.

بس النهاردة الكنيسة ابتدأت لنا بالعيد ده .. عيد
أحد توما ، وورتنا إن القيامة هى خلع للقديم ، وتجديد
للجديد الذى خلق فينا بالمعمودية . لكى يتجدد حسب
صورة خالقه . وورتنا الكنيسة إن القيامة مش إن ما
أعملش الخطية ، لكن إن أنا أعمل الخير . " لا يسرق
السارق فيما بعد بل يتعب ويعمل الصالح لكى يكون له
أن يعطى من له احتياج. "

.. لا تخرج كلمة بطالة من أفواهكم ، لا ، بل تخرج
كل كلمة صالحة كى تعطى نعمة للسامعين . القيامة
تحس بيها فى حياتك ، وتختبرها وتقول المسيح قام .
زى ما التلاميذ ما حسوا .. كانوا خايفين خالص ، وميتين

من الخوف .. دخل والأبواب مغلقة وقال سلام لكم ،
ففرح التلاميذ . حزن تحول إلى إيه ؟! إلى فرح ..
المسيح دخل جوة .. فدى قيامة.

كان توما شكاك وقال مافيش مسيح وما فيش كلام
من ده . دخل المسيح والأبواب مغلقة ، وقال له حط إيدك
مطرح المسامير ، ومطرح الجروح . فدهبت القيامة فى
قلب توما ، فقال له أمنت ياربى .. دى قيامة.

أنا أرجو يا عزيزى بنعمة ربنا إن الخمسين يوم
دول قصيرين عدى منهم أسبوع . الخماسين يقول لك دى
كثيرة ، ويتسبب لنا فتور ، والأكل الفطارى والكسل ،
والحاجات دى كلها . شوف الكنيسة فى أيام الصيام كانت
فى نشوة روحية إزاي ! أقول لك : أبداً .. ده الناس مش
فاهمة القيامة . لكن لو الناس فهمت القيامة ، تقعد تعدهم
يوم بيوم . أيام الخماسين دى تقول له ياربى نقوم معاك
كل يوم . تحمل صليبك كل يوم . لأن يدوبك خمسين يوم
ده أنا علشان يتجدد إنسانى الداخلى وذهنى ، وفكرى كل
يوم .. كل يوم علشان أبقى فى ملامح المسيح ، مش

عازرة خمسين يوم ، عازرة كثير . لكن أنا عشان فيك يا
يسوع إن اللي ما يتعملش في منات الأيام ، تعمله إنت
في لحظات وفي ثواني .. عندها تدخل حياتي والأبواب
مغلقة . إنت النور الحقيقي اللي يدخل فيبدد الظلمة من
الداخل . إنت الطهارة الحقيقية لكي تدخل فتبدد كل
نجاسة ، وكل شر وتملا حياتي بالطهارة . إنت المحبة
الحقيقية فتدخل حياتي وتبدد كل بغضة فيها ، وتملاها
بالمحبة الحقيقية.

عيشوا القيامة يا أحبائي لأن يسوع قال لكم أنا هو
القيامة .. لم يقل أنا سأقيمكم .. ولكنه قال أنا هو القيامة ،
خذوني لكي تعيشوا القيامة.

مبارك ومقدس من له نصيب في القيامة الأولى ،
سوف لا يكون للموت الثاني سلطان عليهم.
لإلهنا المجد دائماً آمين



الأسبوع الثاني من الخمسين المقدسة

(يو ٦ : ٥٤ - ٥٨)

الرب يسوع هو خبز حياتنا

قراءات هذا الأسبوع .. امبارح والنهاردة وبكرة
كلها من إنجيل معلمنا يوحنا الإصحاح السادس . وطبعاً
الكنيسة اختارت بحكمة وبارشاد الروح القدس هذه
القراءات علشان تكون موضوع حياة الكنيسة في الأسبوع
الثاني من القيامة المقدسة.

الموضوع كله يا أحبائي بيدور حول القيامة ،
ولكن زى ما إحنا اتكلمنا مرات كثيرة .. ليست القيامة
هى قيامة الأجساد فى اليوم الأخير التى من أجلها جاء
المسيح .. ولكن القيامة هو إن ربنا شاف إن الجنس
البشرى ساقط ، وضعيف .. ضعيف جداً فجه علشان
يقيمه . من أجل ذلك معلمنا يوحنا الحبيب فى سفر الرؤيا
يقول: " مبارك ومقدس من له نصيب فى القيامة الأولى "

المسيح جه علشان خاطر نعيش قيامتنا الأولى
الى مش ممكن يكون للموت الثانى سلطان علينا.

القيامة جسد مكسور

القيامة الثانية ها تكون سهلة جدا . ده لأننا مش
ها نخاف الموت لأننا غلبناه فى شخص المسيح . مبارك
ومقدس من له نصيب فى القيامة الأولى . فإحنا النهاردة
ده نصيينا فى المسيح يسوع اللى أخذناه فى قيامته
المقدسة . كقول معلمنا بولس الرسول " أنه أقامنا معه " .
ومن العلامات أو من الوسائل المهمة جدا لإختبار القيامة
فى حياتنا الحاضرة موضوع التناول من جسد ربنا ودمه .
علشان كده الكنيسة خلت الأحد الثانى ، أو
الأسبوع الثانى كله بيتكلم عن موضوع التناول من الجسد
والدم . هو ده أول موضوع تعرضه الكنيسة لينا فى
أسابيع القيامة المقدسة . قال آه .. هو ده أول موضوع .
لأن الجسد المكسور هو بنفسه الجسد واهب الحياة ..
علشان خاطر ما يبقاش الناس تتكلم كلام نظرى عن قيامة

المسيح . يبقى قدامنا القيامة أهية على المذبح جسد حي
مكسور ولكنه حي . خروف كأنه مذبوح . خذوا كلوا
وخذوا اشربوا.

التناول اختبار لقوة القيامة

" من يأكل جسدى ويشرب دمي يحيا إلى الأبد " .
فإننا بنختبر القيامة في تناول . علشان كده الكنيسة
بترتب وتقول : " كلما أكلتم من هذا الخبز وشربتم من هذه
الكأس تبشرون بموتى وتعترفون بقيامتى ، وتذكرونى
إلى أن أجيء . " فأصبح تناول من جسد الرب ودمه
اختبار لقوة القيامة .. واختبار للحياة فى مجيء المسيح
الثانى رغم الفوارق الزمنية ، لكن فى المسيح ليس هناك
زمن.

بأقول الإصحاح السادس .. حتى لو كان هذا
الكلام فيه تكرار .. بس علشان نربط الإصحاح السادس
من إنجيل معلمنا يوحنا ده عايز يتقرأ على المهل .
فالمسيح الأول ابتداء بإشباع الجموع أكل الخمسة آلاف .

طبعاً كانت المعجزة قوية . إذا كان هو يقدر يؤكل الخمسة آلاف بكلمة بسيطة ، أو بصلوة صغيرة على الأكل ، فإذاً هو يقدر يعطى الحياة . بس حياة إيه ؟ ما يأكلوا ، بعد ما أكلوا عايزين كل يوم من ده . وبعدين ربنا حب يوربهم إن الأكل اللي حصل امبارح وضخامة المعجزة إنه لما أكل الخمسة آلاف ممكن دى بالنسبة للإنسان البشرى تتنسى فى ثوانى . ده الإنسان يشوف معجزات لربنا وينسى . خلى بالك مش دى معجزة الإنسان . فركبهم السفينة ، وهاج البحر ، وصرخوا وقالوا ها نغرق وبتاع . وقال لهم أنا هو لا تخافوا .. واتضح إن المعجزة ما عملتش حاجة فى حياتهم الداخلية . ما غيرتش حاجة أدى الناس اللي بتجرى وراء المعجزات الخارجية .

ما قيمة المعجزة بالنسبة للإنسان المسيحى ؟! فين معجزته ؟ قالوا آه إحنا عندنا معجزة . بعديها على طول ابتدأوا يتكلموا عن المن اللي نازل من السماء . قالوا ده كان معجزة أكثر .. يعنى كونك أكلت .. أكلت ٥٠٠٠ لكن المن ده كان حاجة كل يوم .. كل يوم .. كل يوم ..

أربعين سنة . فقال لهم وبرضه بعد الأربعين سنة حصل
إيه ؟ قالوا ماتوا .. فقال صحيح الأكل من السماء لكن فى
الآخر ماتوا . ومن هنا دخل بقى وقال لهم هاديكم بقى
أكلة اللى هى تديكم كيان وأبدية .. أدى الإصحاح السادس
من أوله لآخره .

فابتدأ يكلمهم عن جسده ودمه اللى ها يكسره ..
طبعاً بيقول الكتاب المقدس شوف بقى الناس كانت ٥٠٠٠
" ماعدا النساء والأطفال " بيتفرجوا على المعجزة . والمن
فى ذهن كل واحد يهودى . لما كلمهم عن الأكلة اللى
بحقيقى جسد ربنا ودمه ، الكل انصرف من وراه فبص
وراه .. فلم يجد غير الإثنى عشر . فقال لهم أتريدون
أنتم أيضاً أن تمضوا .. مع السلامة .. إذا كنتم إنتم كمان
عايزين . لأن أنا لازم أتكلم عن الحق .. وإذا كان الحق
صعب لكن لازم أتكلم عنه . فطبعاً ردوا ردهم السريع "
بدون أن يعرفوا لأن الروح لم يكن قد حل بعد " " إلى من
نذهب وكلام الحياة عندك " .. فده ها يكون موضوع
القداس بكرة . إن الحياة فعلا اللى هى القيامة قدمت لينا

كل يوم على المذبح علشان ما فيش حد يقول عايز أختبر
القيامة فى حياتى.

القيامة فرجة أم اختبار

وطبعاً من يستحق أن يأكل من جسد الرب ودمه ؟!
مش الإنسان البار .. لكن الإنسان المحتاج اللى شاعر
بضعفه قدام ربنا اللى جاى يعترف بزلاته ، اللى ييموت
مع المسيح يستحق أن يأكل الجسد الحى فينال حياة أبدية.
اختارت الكنيسة النهاردة الجزء الوسطانى ده بتاع
السفينة . علشان تعمل كده .. يعنى زى ما تقول .. مقدمة
لطيفة لبكرة . لما تقدم جسد ربنا ودمه . فكلهم وقال لهم
أحسن تخرجوا بنتيجة مهمة : القیامة اختبار مش فرجة .
فيه فرق بين فرجة ، وفيه فرق بين الاختبار . إشباع
الخمسة آلاف دى فرجة .. كنتم بتعملوا إيه إنتم ؟ قالوا
كنا بنتفرج . كنا مبسوطين جداً . قال لا .. فرق بين
الاختبار الشخصى . وفيه فرق بين الفرجة . علشان كده
مش كل واحد قرأ عن المسيح أو اتفرج على الحاجات

الخطوة التي في تاريخ الكنيسة .. وعن الكنيسة الجميلة وحاجاتها الخطوة . والحاجات ده ما اختبرهاش في حياته العملية يبقى ما استفادش حاجة . فقال لهم فيه فرق في القيامة بين الفرجة وبين الاختبار. يعني إيه ؟

يعني المسيح اللي قام من الأموات ده حاجة مدهشة .. حاجة مدهشة .. فإذا كنت إنت بتتفرج على المسيح وهو داخل كده بالجسد بتاعه ، تقول كده .. يا سلام .. أهو كده ولا بلاش ! كسر القبر وقام ... وفيه فرق بين الفرح دخل قلب التلاميذ ، يقول : " ففرح التلاميذ إذ رأوا الرب " .. وفيه فرق إن توما يحط إيدته مطرح الجروح ويقول ربى وإلهى . فأصبحوا شهود حقيقيين بقيامة المسيح . فالقيامة تكون حقيقية في حياتهم .

التناول اختبار شخصى أو هو المعجزة الحقيقية

في الحقيقة إحنا بنختبر هذا في سر التناول . لأن سر التناول مش ممكن يكون فرجة . معجزة الخمسة آلاف دي فرجة . لكن سر التناول ده اختبار شخصى .

وما فيهموش حاجة فيها شكل . يعنى العرض كده : زى
٥٠٠٠ . وتأكلهم ، والأكل يزيد ويبتدوا يلموا أكوام من
الغيش . لكن أراد المسيح يقول إن أنا جاى أعمل المعجزة
الحقيقية مش أأكل الخمسة آلاف . جاى أغير حياة
الإنسان من جوة .. جاى أدّى له حياة . أهى ده
المعجزة.

مش المعجزة يقوّم الميت أو يؤكل الخمسة آلاف .
دى كانت معجزة للناس البدائين ، لكن المعجزة الحقيقية
أن يقدم جسده ودمه حياة للإنسان . وإنه بغير حياة
الإنسان من جوة . هو ده الإختبار اللى إحنا بنتكلم عليه .
علشان كده إحنا بنعتبر إذا قالوا لك فيه معجزة الأيام دى ؟
ما سمعتش عن معجزة مارجرجس اللى حصلت فى ميت
دمسييس ؟ ومعجزة العذراء اللى حصلت ما أعرفش فين ؟
والمعجزة اللى حصلت فين ؟ جميل جداً .. لأن الله ممجد
فى قديسيه . والله أمس واليوم وإلى الأبد . وهو صانع
المعجزات العظام . ويصنع المعجزات مع غير المؤمنين
أيضاً عن طريق الكنيسة .. الخ.

لكن إننا نعيش معجزتنا القوية فى المذبح ..
وبنعيش معجزتنا القوية .. بص إزاي .. فى تغيير حياتنا
من جوة . يعنى إنت بينك وبين نفسك كل ما تلاقى حياتك
الداخلية بتتبنى وتتغير وتتقوم مع المسيح آهى دى
معجزتك الداخلية.

إحنا موضوعنا النهاردة فى : القيامة فى الواقع ..
معجزتنا فى القيامة .. إن التلاميذ .. المسيح حطهم فى
موقف صعب . دخلهم السفينة .. ودخلوا فى المركب ..
وكانت الدنيا ظلمة . وبعد ما كانت الدنيا ظلمة هيج كمان
البحر .. شوف بقى من كل ناحية . وبعدين بقوا فى وسط
البحر . فبقى فيه خوف .. فيه ظلمة وفيه خوف ، وبعدين
فى فجر القيامة ده بالنسبة للتلاميذ يعنى : وهم فى البحر
رأوا يسوع ماشياً فلاقاهم بيرتعشوا كده بيخافوا . مش
هو ده نفس المنظر وهم موجودين جوة العلية والأبواب
مغلقة وكان يسوع داخل!!!.

هو يسوع ماشى على المية يعنى ايه ؟ ما هو ماشى على المية ده وضع غير عادى .. يعنى داخل من باب مققول . هو الوضع الطبيعى ان يسوع يلحقهم انه كان يركب مركب ويمشى وراهم ويكون أسرع منهم ويقول لك " ولم تكن هناك إلا مركب واحدة " فركبها التلاميذ . ماكانش فيه غير مركب واحدة . ففيه احتمال حتى يكون عندهم أمل ويقولوا ان ممكن يسوع يلحقنا فى السكة بمركب .. يقول لك : ولم يكن هناك إلا مركب واحدة اللي ركبها التلاميذ ونزلوا بيها البحر ماكانش فيه مراكب فأصبح الأمل مقطوع زى ما دخل للتلاميذ والأبواب مغلقة.

يا سلام على نفسية الإنسان الغلبانة اللي ما اختبرتش القيامة .. خايف .. يا ريت خايف وبس .. ميت من الخوف . والخوف فى الواقع ينتهى باليأس والفشل . طبعاً ما تستعجبش لو إنت عرفت النهاردة فى القرن العشرين اللي إحنا فيه الخوف هو المرض الرئيسى .. الخوف هو المرض الرئيسى .. وبعدين فيه أنواع مختلفة

من الخوف . لكن أخطر الأنواع اللى ماليهاش سبب . إن الإنسان تلاقية خايف من نفسه لدرجة إن فيه ناس من كتر الخوف تلاقيهم يقللوا على نفسهم . ما يحبوش يقابلوا الناس ، ولا يقابلوا المجتمع اللى بره ويخافوا .. المسيح جه يقول لا .. بالنص كدة .. يقول : " يا أصدقائى لا تخافوا " . من إيه ياربى ؟ .. قال : " لا تخافوا من الذين يقتلون الجسد " . قال إذن إنت ها تدافع عننا لو الناس الوحشين هجموا علينا علشان يهينوا أجسادنا أو يسيئوا إلينا . قال لا .. يسلمونكم إلى مجامع وها تستشهدوا من أجل اسمى . قالوا أmaal إنت قلت لا تخافوا ليه ؟ إحنا فى عرفنا إن إنت لما تقول لا تخافوا يعنى تحمينا . يعنى لما تقول للأقباط اللى فى مصر دول : " لا تخافوا فمعناها إنت تبقى مسئول عن حمايتنا . أو لما تقول لى أنا كإنسان فى مشكلة " لا تخاف " . تبقى مسئول عن حمايتى . لكن تقول لى " لا تخاف " وتسبب المشكلة بره زى ماهية . قال آه لأن الناس فاهمة غلط . فاهمة إن الخوف بيحى من برة ويكبس على الإنسان . لا .. الخوف ماييجيش من برة

ويكس على الإنسان .. الخوف طالع من قلب الإنسان .
كلام صعب ده . اتنين فى موقف معين .. واحد خايف
وواحد مش خايف . أمال المسيح جه علشان يعمل إيه ؟!
قال يشيل الخوف ده على طول . دخل والأبواب مغلقة
فراهم إيه .. خايفين . قال لهم الخوف يعنى الموت .
وقبليها بيعبر عنه إنه كانت الدنيا ظلمة .

المسيح هو نور .. وهو الإيمان والشجاعة .
وعايزك تتخيل معايا التلاميذ .. المسيح يطرد الخوف .
تتخيل التلاميذ قبل قيامة المسيح كان شكلهم إيه ؟ منتهى
الخوف بطرس أنكر وسب ولعن .. وتوما شك .. ومرقس
قلع الجليية اللي عليه ومشى عريان وهرب .. وكل واحد
مات فى جلده وقفلوا الأبواب .. والأبواب مغلقة دخل
المسيح . لما دخل المسيح إداهم قوة داخلية .. المشكلة
مش مشكلة الترابيس اللي حطينها فى الأبواب ، دى مش
مشكلة . المشكلة إن إنتم فيه خوف من جوه . فأننا جاي
أشيل الخوف وأحط القيامة مطرحها . فالخوف يتحط
مطرح القيامة .

الفرق بين الحيرة واليأس

هي دي القصة اللي تعرضها لنا الكنيسة النهاردة
علشان نشم فيها ريحة القيامة . دخل السفينة وكانت الدنيا
ظلمة وهاج البحر . كل دي عوامل خارجية . فابتدأت
العوامل الخارجية تمس نفسية الإنسان من جوة : يسوع
جاي يقول أنا هو القيامة . جه ماشى على المية ، يعنى
جه والأبواب مغلقة ما فيش أمل للمجىء خالص .. وجه
علشان خاطر يشيل الخوف ده من جوه . تقول لى لكن
الخوف ده طبيعتنا كبشر . إزاي ها تشيل الخوف ده ؟ لا
مش الخوف اللي طبيعتنا كبشر . بولس الرسول يدينا
تعبير جميل فى رسالته لكورنثوس الثانية يقول : متحيرين
فى كل شىء لكن غير يائسين . عاوز يقول إن فيه حاجة
اسمها الحيرة .. وفيه حاجة اسمها اليأس والفشل ..
الحيرة دي أى واحد يقع فى مشكلة يختار يحلها إزاي
يعملها إزاي ؟ . أهى دي الحيرة . لكن هل الإنسان وهو
فى وسط الحيرة دي يتطرق اليأس إلى حياته الداخلية

فيفشل ؟! اهو ده اللي عايز يقوله بولس الرسول
متحيرين كبشر زى أى إنسان.

يعنى المسيح ماجاش يعلمنا نوعية أخرى غير بقية
الناس ، قال : " لأ " . إحنا زى بقية الناس بالضبط لكن
اليأس مهما بلغ درجة كبيرة مش مفروض إن هو يفقد
الإيمان من حياة الإنسان . مهما الدنيا تظلم لابد أن فجر
القيامة قرب كثير . علشان كده ربنا قال : " أنا هو " بس
ما فيش أكثر من كده . " أنا هو " . طب وأنت يا يسوع
لما تيجى فى حياتنا .. قال : " أنا هو القيامة " ، ها
تخافوا ليه ؟ إنتم كنتم بتخافوا من شوية عساكر . إن كنت
إنت يا بطرس بتخاف من جارية لأن ممكن الجارية دى
تمرطك تبهدل بيبك الدنيا . وكنت يا توما شاكك ، وكنتم
خافين من اليهود لحسن يقدموكم للمحاكمة . لأن ما دام
أخذوا الرئيس بتاعكم يبقى الدور عليكم بس بعد الفصح
واحتفالاته لما تنتهى . أكيد ١٠٠ ٪ ها يجرجروا التلاميذ
ويحاكموهم . كل واحد كان ماشى مع يسوع عارفينهم
بالإسم .. ها يجيبوهم ويعملولهم محاكمة ، لأن دول إيه ..

أتباع الرجل اللى عمل الثورة دية واللى هم انتصروا عليه بالموت.

فالخوف جه من بره . فبولس الرسول يقول أنا اختبرت .. اختبرت الحاجات دى كثير .. يقول فى رسالته الثانية لكورنثوس الإصحاح الأول .. يقول إحنا فى آسيا من جهة ضيقتنا التى أصابتنا فى آسيا أننا نتقلنا فوق الطاقة حتى يأسنا من الحياة .. ما كانش فيه أمل .. يأسنا من الحياة ، ما كانش يأس من رحمة ربنا .. يأس من الحياة .. ما كانش فيه أمل للحياة . إذا كان فينا حكم الموت ، لأن أقصى درجات الضيق فى العالم هى الموت. لكى لا نكون متكليين على أنفسنا بل على الله الذى يقيم من الأموات . عايز يقول إن أنا وصلت فى حياتى لدرجة من الضيق والألم .. ده هو بولس بيقول كده لغاية خلاص قلت ما فيش أمل فى الحياة " إذا كان فينا حكم الموت " . أنا شايف الموت وهو بيخبط فى لكى لا نكون متكليين على أنفسنا بل على الله الذى يقيم من الأموات " . طبعاً ده مش موضوعنا إن إحنا نشرح حياة بولس الرسول .. أد إيه هو

شاف الضيق فى السجن .. واد إيه هو شافه من اليهود .
وأد إيه انكسرت به السفينة ، وهو اتجلد من اليهود ثلاث
مرات واتعمل فيه حاجات كتيرة خالص.

الرجاء فى المسيحية

يبقى إذا فى المسيحية يا أحبائى ما فيش حاجة
اسمها يأس . فى حاجة اسمها قيامة. حتى ولو هاج
البحر .. طيب حتى ولو مافيش أمل ده إحنا فى مركب
صغنتوتة ، وهو فى جوه بحر كبير .. طب وإيه يعنى
يسوع يجى ماشى على الميه ويدخل من الأبواب
المغلقة..تقول لى ما فيش سفينة أقول لك يدخل والأبواب
مغلقة .. ويدخل ويقول " أنا هو " .. وساعة لما يقول لك "
أنا هو لا تخافوا" يقول لك إن إيه .. السفينة راحت على
البر على طول. فبولس الرسول اختبر ضيقات كثيرة وإدّالنا
الإختبارده، قال "من جهة الضيقة التى أصابتنا فى آسيا أننا
نتقلنا جداً فوق الطاقة حتى يأسنا من الحياة إذ كان فينا
حكم الموت لكى لا نكون متكئين على أنفسنا بل على الله

الذى يقيم من الأموات"... ويبقى اشطب كده على كلمة
يأس وفشل.

الفشل هو بداية القيامة

رجع تانى فى رسالته لرومية بيقول إيه .. "إذا لا
نفشل"... فى حاجة اسمها فشل . طب والفشل ده يا بولس
بتعتبره إيه ؟ قال الفشل ده فى عرفى أنا ده هو بداية
القيامة. يقول كده فى الآية " إذا لا نفشل" بل وإن (كان
كل العوامل اللى حوالينا) إنساننا الخارجى يقنى الداخلى
يتجدد يوماً فيوماً". فبولس الرسول عايز يقول كده بجانب
اليأس والفشل والضيق الخارجى لابد أن يتبعه من الداخلى
بناء داخلى أيضاً .. من بره يحصل فناء ومن جوه تحصل
قوة . وفيه ناس كثيرة تبص تلاقيهم بعد الضيقة وبعد
التجربة بيختبروا ربنا فى حياتهم، وبيختبروا قوة كبيرة
جداً ويقول إحنا شفنا ربنا فى حياتنا وهو أقامنا من
ضعفنا.

إنساننا الخارجى يفنى طبعاً .. كل العوامل اللى
بره بتهدد الإنسان الخارجى. حتى من الناحية الصحية ..
بكثرة الواحد يعجز، وبكثرة يتعب .. وبكثرة أسنانه تقع ..
وبكثرة الخ .. حتى من الناحية الصحية، ولكن شبابيه
الداخلى يتجدد يوماً فيوماً.

حياة التجديد المستمر

لذلك يا أحبائى كان الآباء القديسين ما يشيخوش
أبدأ، بالعكس كلما كانوا يكبروا، كلما كان جسمهم كده
يصغر وينحنوا .. كلما كانوا يزدادوا قوة وشباب من
الداخل .. ليه ؟ لأن قوة القيامة هى اختبارهم كل يوم.
اللطيف فى تعبير بولس الرسول إنه يقول: " إن كان
إنساننا الخارج يفنى فالداخل يتجدد". ما وقفش عند كلمة
يتجدد، قال يتجدد يوماً فيوماً. يبقى اختبار القيامة ده يبقى
يوم ويخلص! قال لأ .. كل يوم .. والفشل يبقى كل يوم
والقيامة تكون كل يوم .. والحيرة كل يوم .. وعدم اليأس
والقيامة كل يوم...

إذن إحنا عايزين النهاردة كده اختبارنا فى عشيقتنا
النهاردة إننا نشطب على كلمة الفشل وكلمة اليأس .ما
فيش حاجة أبداً اسمها فشل ويأس. لكن فيه حاجة اسمها
قيامة متجددة كل يوم .. كل يوم.

ادخل إلى مخدعك وصل لأبيك الذى فى الخفاء.
بنورك يا رب نعاين النور.. كل وقفة قدام ربنا بناخذ قوة
منه.. تعال اعترف واتناول .. كل أكلة من جسد ربنا
ونمه بتجدد دمك ، وبتجدد حياتك، وبتجدد شبابك..افتح
كتابك المقدس واقرأ .. كلما تهضم الآيات اللى فيه كلما
تتغذى على كلمة ربنا .. فتحيا بكلمة الله.

الإنسان كزهر عشب .. كزهر الحقل .. الحقل
جف. والزهر فنى جماله، أما كلمة الرب فتثبت إلى الأبد.
الكتاب المقدس يقول كده. عيش على كلمة ربنا .. اهتم
دايماً بحياتك الداخلية إنك تعيش القيامة وتختبرها وتتجدد
يوماً فيوماً .. إنسانك الداخلى .. الإنسان الجديد الذى ولد
فى المعمودية يتجدد فى المعرفة وفى القداسة حسب
صورة خالقه .. كل يوم .. أما كلمة الفشل دى فنقول إن

هي طبعاً هي بداية القيامة . أما اليأس فمالهوش
في منهجنا المسيحي مكان . إحنا حطينا كلمة تانية بداله
حطينا كلمة في الكتاب المقدس اسمها الرجاء ..
الرجاء... والرجاء ده يوصينا به بولس الرسول ويقول
"يثبت فيكم الإيمان والرجاء والمحبة". والرجاء يشطب
على اليأس خالص. وما فيش يأس في حياتنا وما فيش فشل.
يرجع تاني في رسالته لغلاطية يوصينا يقول
اعملوا الخير كثير .. اثبتوا في المسيح .. إذا لا نفشل في
عمل الخير .. في صنع الخير لأننا سنحصد في حينه إن
كنا لا نكل. اعمل خير دائماً .. تعمل خير إيه ؟! ده
بيقولوا " اتقى شر من أحسنت إليه" .. تعمل خير إيه ؟ ده ..
اللى بنعمل فيه الخير بعد كده بيتدير الخير ده عليك شر .
اعمل خير .. لا تفشل . الرسول بيقول كده: " لا نفشل في
عمل الخير" .. لانفشل والنتيجة: " سنحصد في حينه إن
كنا لا نكل". فالمسيحية لا تعرف الكلل، لا تعرف اليأس
.. لكن تعرف الحياة التي تقوم مع المسيح كل يوم.

إذا كان بولس الرسول فى رسالته لكورنثوس
يقول " نموت كل يوم " .. وفى رسالته لرومية يقول نموت
كل النهار يعنى عمال يموت كل النهار وكل اليوم . فكل
النهار وكل اليوم معناها فيه قيامة كل اليوم وكل النهار .
القيامة أصبحت حياته، والموت عن العالم أصبح حياته .
يختبر الموت .. يختبر الضيق .. ويختبر المشاكل يختبر
الأبواب المغلقة .. يختبر الظلمة بتاعة البحر .. ويختبر
هيجان الأمواج .. ويختبر يسوع ماشياً أيضاً لكى
يقول: " أنا هو القيامة."

القيامة هى عدم الفشل

فهو ده الدرس اللى قدمته لنا الكنيسة النهاردة فى
الإنجيل بتاع العشية .. إن القيامة هى عدم الخوف
والقيامة هى عدم اليأس .. والقيامة هى عدم الفشل
والقيامة هى إن كان المسيح حى فى أجسادنا إذا وصلت
للموت .. موت حتى الخطية. يقول معلمنا بولس الرسول
" إذا كان روح الذى أقام يسوع من الأموات ساكناً فيكم

فالذى أقام يسوع سيحي أجسادكم الميئة بروحه الساكن فيكم". حتى لو كنت فشلت في الجهاد ضد الخطية .. أو ذقت محبة العالم ، فتأكد بإيمانك إن ربنا بروحه الساكن فيك ها يقيمك.

يؤكد معلمنا بولس الرسول إن اللى أقام المسيح من الأموات .. هو .. هو الذى سيقمنا بقوته لأننا أعضاء جسم المسيح. فإن القيامة دى اللى بنتكلموا عنها. أنا عضو فى جسم المسيح القائم من الأموات. فكيف ؟ .. هل ممكن إن المسيح يموت مرة ثانية ؟! أنا عضو فى جسمه فلا يمكن أبدا أن المسيح يموت مرة ثانية لأن الموت اللى ماته المسيح ماته مرة ، والقيامة اللى قامها مرة . ولا يمكن أن يمسخ المسيح من الموت ولا يموت مرة ثانية . ونحن أعضاء فى جسده القائم من الأموات. سنظل أحياء وسوف لا يكون للموت الثانى سلطان علينا.

فتدريبنا النهاردة يا أحبائى هو أن لا فشل ولا يأس .. لا فى مشاكلنا المادية .. ولا فى جهادنا الروحى

لكن فيه قيامة حتى لو وصلنا لدرجة الموت فالله قادر أن
يقيمنا من الأموات.
لإلهنا المجد دائما أبديا آمين.



عشية الأحد الثالث من الخمسين المقدسة

إنجيل العشية في هذه الليلة من إنجيل معلمنا
يوحنا الأصحاح الثامن . ويوم الجمعة كان القديس برصه
من إنجيل معلمنا يوحنا الأصحاح الثامن ، وبكرة إنجيل
القديس باكر الأحد برصه من يوحنا الثامن . يعنى يوم
الجمعة إمبراح ، والليلة ، وبكرة الصبح من يوحنا الثامن
يعنى لو إنت قرأت يوحنا الثامن تبقى عرفت إيه اللى
اتقرأ إمبراح والنهاردة وبكرة الصبح . وبعدين الإنجيل
بتاع قداس بكرة من يوحنا ٤ عن المرأة السامرية .
فالمرأة السامرية زى ما ها نشوف بكرة إنها إنسانه زى
أى واحد فى العالم .. زى أى إنسان فى العالم اتزحلق
رجليها فى طريق الشر . دايماً طريق الشر يزحلق .
لأن عدو الخير الشيطان مش أهبل ولا عبيط يعرض كل
الفخ بتاعه مرة واحدة . لكن دايماً يمشى خطوة خطوة
لغاية لما يجرجر البنى آدم ، ويوقعه فى بير ما يعرفش

يطلع منه . والحقيقة ده مش موضوعنا الليلة إننا نتكلم
عن السامرية ، لكن حقيقة إن حكاية البير ده اللي كانت
رايحة تملأ منه الميه وربنا يسوع واقف عنده .. بيعبر
عن أو بيوصف الحالة .. هي كانت واقعة في البير ده
مش عارفة تطلع ليه ؟. متجوزة خمسة واللي معاها مش
جوزها . ما أعتقدش الست دي ابتدأت بالبداية دي . لكن
بأقول لك الشيطان بيزحلق الإنسان سلمه سلمة لغاية
لما يوصل لدرجة يبقى الرجوع فيها مستحيل في ذهنى.
ومش بنتكلم عن المرأة السامرية كست وحشة ، بالعكس
دي قديسة . إحنا بنعتبرها قديسة اللي عرفت تطلع من
البير ده.

نتكلم عن بطرس .. بطرس برضه اتزحلق شوية
شوية .. قال له لو أنكرك الكل ما أنكركش وبعدين دخل
يتفرج يشوف النهاية ايه .. وقف يتكلم مع الخدامين ..
وبعدين دخل يتكلم في مواضيع مالوش دعوة بها .
والمسيح وصّاه وقال له الليلة دي تسهروا وتصلوا . راح
هو يتكلم مع الجارية وبتاع .. ودخل في حاجات مالوش

دعوة بيها . وبعدين دخل فى مطب .. شافه الراجل
قريب العبد رئيس الكهنة اللى كان قطع ودنه ، قال له
إنت كنت معاهم . إنت اللى عملت العملة دى .. الجارية
قالت أيوه إنت شكلك كده . إحتاس بطرس .. أنكر وسب
ولعن وحس أنه لا رجعه .. ها يطلع إزاي من المطب
ده؟ ما هو لو قال آه أنا يقطعوا رقبتة . فيسوع بسرعة
نظر له نظره كده على رأى الكتاب المقدس كمن له
سلطان .

إحنا بنتكلم عن يسوع وعن لطفه وحلاوته
ونظراته اللطيفة ، لكن ده صاحب سلطان مش بس
لطيف ونظراته لطيفة وحانية .. لا لما يتكلم يأمر .. ولما
ينظر ينفذ اللى يقوله . فخرج بطرس وطلع من الفخ .
على رأى النبی " الفخ انكسر ونحن نجونا " . ولا حصل
حاجة ولا بتاع .

فإذا المرأة فى الواقع وقعت فى فخ ابتدأت واحدة
واحدة لغاية لما لقيت الرجوع مش ممكن ، ومين يقدر
يتفاهم مع المرأة . دى مشاكلها فى منتهى التعقيد .

والمهم اتقابلت مع يسوع وطبعاً الإنسان أصله فيه طبيعة وحشة يبرر نفسه .. متكبر . وقعدت تتكلم مع المسيح فى مواضيع هى أبعد ما تكون عنها .. قالت له إنتم بتسجدوا فى أورشليم .. وعملت إن هى يعنى أستاذة فى اللاهوت .. وطبعاً تبقى أستاذة فى اللاهوت علشان تخبى اللى هى فيه . وبعدين بص لها يسوع كده .. وقال لها يا ستى أنا حاسس إنت تعبانة .. تعبانة خالص . وأنا جاى علشان أريح الناس التعبانيين . أنا حاسس إن إنت مربطة وأنا جاى أفك الرباطات بتاعتك دى . قالت له أنا ما أقدرش أطلع من المازق اللى أنا فيه . قال أنا ها أطلعك بكلمة واحدة من عندى ها تطلعى .. وإداها قوة (ده مش موضوعنا الليلة) .. لكن أنا بأقول قراءات الكنيسة الليلة وإمبارح من إنجيل يوحنا إصحاح الثامن . لأنه بيتكلم عن الحرية .

إمبارح كنا بنقول إن الحرية فى المسيحية لها مفهوم تانى خالص .. غير اللى بيتكلموا عليها فى الجرائد .. لا هى حرية سياسية .. ولا حرية المعتقلين

السياسيين طلعوا من السجون لا .. لا .. لا ده إحنا كان
عندنا ناس القيود فى رجليهم ، وكانوا فى منتهى الحرية
والحرية فى المسيحية مرتبطة بالسعادة . إيه يعنى لو
إنت جبت إنسان حر وحطيته فى قصر ومن جوه هو
مستعبد يبقى عبد . فالمسيح قال إيه إن اللى يعمل خطية
هو عبد للخطية . وقال إن حرركم الإبن بالحقيقة تكونون
أحرار .

أنا عاوز أقول إن الكنيسة بتاعتنا فى فترة
الخماسين اختارت لنا موضوع حلو : القيامة يعنى
الحرية ، لأن الإنسان اللى قام من الأموات يبقى حر .
فإذا إنت دلوقت اختبرت الحرية يبقى قمت مع المسيح .
علشان وإنت بتشارك فى الكنيسة وتقول إخرستوس
أنستى المسيح قام ، مش المسيح قام زمان .. لا المسيح
قام فى أنا ، وأنا حر .. والحرية دى بأحسها لأنها هى
ممزوجة بالسعادة ، بتشبع نفسى وعلى رأى الحكيم لما
يقول " إن الإنسان حاكم نفسه أفضل من حاكم مدينة" .

فالمهم إن ربنا فى نقاشه الطويل فى يوحنا ٨ قال
لهم أنا هو نور العالم وإنتم ظلمة . ويوحنا ابتداء إنجيله
بالكلام ده ، النور جاء إلى العالم والظلمة لم تدركه .
شفت الحرية بتاعة المسيح تنور القلب . فيه مقارنة
لطيفة كده الظلمة دى .. الظلمة دى . قال دى ضد
النور . زى ما هو ضد القيامة . أوحش صورة للظلمة
تشوفها فى القبر .. مقبول مافيهوش ثقب واحد . مظلم ..
ريحة وحشة منتنة . فلما يطلع واحد من القبر زى لعازر
قالوا له بعد أربعة أيام قد أنتن .. قال لهم معلىش أنا هو
القيامة .. قالوا له ده مربوط .. مربوطين أيديه ، ومربطين
رجليه ، والميت كمان يربطوا بقه ده ما بيتحركش
خالص .. قال لهم أنا أقول له قوم يقوم ويطلع ،
وأقدمه للكنيسة وأقول لهم حلوه فالكنيسة تقرأ له الحل
فيتحل من الرباطات بتاعته .

الإنسان فى الواقع يا إما يكون فى قلبه فيه نور ..
نور القيامة ، يا إما يكون فى قلبه ظلمة القبر . ويوحنا

الحبيب بيقول إن اللي بيبغض أخاه هو اللي فى الظلمة يسلك .. فيه ظلمة تبص تلاقى القلب اتملى كراهية ..
حقْد .. غيظ .. ضغينة .. تبص ياعينى تلاقى الإنسان بياكل فى نفسه وحاجات كتيرة شايل همها ومتضايق .
وبعدين تقول الإنسان ده ياعينى عامل فى نفسه كده ليه ؟
وبعدين من كثر الحقد والغیظ والضغينة والشر تبص تلاقى الإنسان ده حتى الأمراض تحل عليه ويتعب وحالته .. ليه كل ده !؟

أصل فيه ظلمة جوة فى القبر . لوجه نور المسيح ونورها يبقى فيه حرية .. يبقى فيه محبة وفرح وسلام . وباختصار المسيح قال الإنسان اللي يعمل الخطية هو عبد للخطية ، وهو مربوط . فالرباط ده أحياناً يكون زى الرباط اللي كان رابط المرأة السامرية مربطها خالص ! مشيت فى الطريق ده ، وافتكرت إنها لما تشرب من المية دى تقدر تشبع .. أتاها كلما تشرب أكثر تتربط أكثر .. وبعدين تسألها وتقول لها إنتِ يا امرأة تستطيعى أن تستغنى عن المية اللي بتشربى منها ؟ تقول

لك يستحيل .. ده أنا عايزة أكثر لولا لحقها المسيح وقال
لها تعالى أفك الرباطات بتاعتك دى . فكى .. فكى
الرباطات دى لأن هى رباطات كاذبة ، وأنا أديك الميه
اللى يشرب منها ما يعطش إلى الابد . ابتدأت تعيش
تنسم نسيم الحرية فى المسيح يسوع .

إحنا ربنا جه علشان يوهبنا حرية داخلية يحس
بيها المسيحى فى حياته . ومن مميزات الحرية دى
الفرح . الإنسان يبقى سعيد وفرحان ويفك ربنا الرباطات
اللى هى ربطت القلب . أهو ده نصيبنا فى القيامة بتاعة
المسيح إن إحنا نعيش أحرار .. إحنا مدعوين للحرية
وبينبها معلمنا بولس الرسول ويقول اثبتوا فى الحرية
اللى حرركم المسيح بيها . ما تكونوش تحت نير مع غير
المؤمنين .. خليكم أحرار كده .. أحرار يعنى إيه ؟ قال
ما تخلّش القلب بتاعك يقع تحت عبودية حاجة أبداً ..
واحد واقع تحت عبودية الغيظ والحقد والضغينة والظلم .
واحد واقع قلبه تحت عبودية شهوة الجسد .. واحد واقع
قلبه تحت عبودية شهوة المال .. واحد واقع قلبه تحت

عبودية حب اللبس والمظاهر . كل دى حاجات بنمر بيها الأيام دى .. وبنعيشها وبنشوف العالم بيسقط بيها.

وصدقنى كل هؤلاء ليسوا أحرار . على رأى أغسطس يقول تشبيه جميل جدا . بيقول واحد بيقول لك أنا بأملك الحاجة الفلانية دية ، مثلا بيملك عزبة بحالها ولا برج كبير خالص . فبيقول أبدا ده هو مش بيملكها ، ده هى اللى بتملكه .. ليه ؟ لأن هو قاعد نايم على سريره مش بيتمتع بالنوم زى بقية الناس .. فكره عمال مربوط بالمشاكل وها يعمل ويخلى ويسوى ويرتب ويخطط .. وده مضايقه فى الموضوع ده وده مش راضى يجيب له الموضوع ده .. وده متعطل فى الحاجات اللى بيعملها ..

فأصبح الحاجة اللى الإنسان يفتكر إنه يملكها أتارياها هى اللى بتملكه ، يبقى الإنسان عبد بعد ما كان سيد .. فالحقيقة العبودية إن القلب يخضع للحاجة ويحاول يقتنيها . أول لما يحاول يقتنيها يبقى عبد لها .. تربطه من رقبته .

لكن الإنسان الحر اللى عاوز يثبت فى الحرية
الى حرره المسيح بيها هو الإنسان اللى يخلّى القلب
بتاعه للمسيح ، يستعمل العالم ويحب أبوه وأمه وإخوته
وامراته وأولاده لكن لا يستعبد لشيء فى هذا الوجود .
علشان كده الكتاب يقول له كده " يا ابنى أعطنى قلبك "
فالإنسان الحر قلبه مستولى عليه ربنا .. لأنه يقول
ايه حيث يكون كنزك هناك يكون قلبك .. الوصايا ده
مش المسيح قالها علشان قاعدين فى الصحراء .. أو
دخلوا الدير . قالها علشان المسيحي العادى اللى عايش
فى العالم يستعمل العالم لكن ما يستعبدش فى العالم .
والقديسين يشبهوا المسيحي فى العالم بمركب . المركب
دى ما فيهاش ولا خرم وأهى ماشية فى وسط البحر ،
لكن البحر ما يخشش جواها ، ماشية فى وسط البحر ،
والبحر شايلها وبتستخدم البحر ، لكن المركب دية مش
ملك للبحر ، هى اللى قاعدة فيها هو اللى بيديرها
وبيوجهها.

علشان كده يا اعزائي نصيبنا النهاردة فى القيامة
زى ما بيعرضه الإنجيل إن إحنا نثبت فى الحرية التى
بها حررنا المسيح ، ولا نرتبك بنير العبودية ، ولا نشاكل
هذا الدهر ، ولا حاجة تكون مسيطرة على قلوبنا إلا اللى
حبنا ومات من أجلنا . الحرية دى كلفت المسيح كثير ..
كلفته صليبه وقيامته .. المسيح عارف إن أنا اللى
مربوط ، فأخذوه على عمود كده وربطوه علشان يجلدوه.
وده اللى الخطية بتعمله فى الإنسان .. الشيطان يزحلق
الإنسان كده لغاية لما يجيبه .. وييجى رابطته .. لما
يربطه ينزل عليه الشيطان ما عندوش رحمة على البنى
آدم أبداً لأنه هو عدو الخير .. هو كذاب وأبو الكذاب
ويعرض لنا العالم بعرض يقول له إن خررت وسجدت
لى أعطيك كل ممالك الأرض .. كذاب .. يعرض
الشيطان وبعدين يربط .. ولما يربطنا بعدين يجلدنا .
فالمسيح رب المجد قال طيب أنا شايف البشرية كلها
مربطة ، أنا أروح على العمود ده وأتربط .. أنت ياربى
يسوع فيه قوة فى الوجود تقدر تربطك .. إنت تتربط ؟!

قال علشانك إنت .. علشان أفكك ، أنا أتربط بدالك ..
أتربط بدالك .. أنا أتجلد بدالك . الخطيئة عرتك ، عرت
أدم .. فأنا لازم أتصلب عريان . يقول لك فعروه . إنت
تقدر تأخذ من مفاهيم الصليب حاجات كثيرة خالص
بحيث إنك تقدر تحس إن كل حركة صغيرة حصلت
للمسيح في أثناء صلبه إنما كانت من أجل تحريرنا .
هو اتعري علشان يغطيني بنعمته .. أنا مربوط ، هو
اتربط بدالي علشان يفكني .. أنا على دين هو وقى الصك
اللى كان علينا وسمره فى الصليب .. أنا كنت عبد لأنى
أنا بعث نفسى لإبليس بمزاجى ، بحريتى ، وهو باعوه
بثلاثين من الفضة ، ثلاثين من الفضة يعنى ثلاثة وثلاث
جنيه . ده السعر العام أو العالمى للبيع اللى هو ثمن
العبد.

لما تحب تشتري عبد تطلع ثلاثة جنيه وتلت تبقى
دفعت ثمن العبد . أنا عبد .. هو اتباع بثمان العبد علشان
يخلينى سيد ، علشان كده يقول معلمنا بطرس الرسول

إن إحنا ما نستهنش بالسيادة ، منستهنش بالسيادة يعنى
إحنا بقينا أسياد ، فاللى يرجع يبيع نفسه تانى يبقى
بيستهين بالسيادة اللى إداها له المسيح ، إحنا بقينا ملوك ،
أولاد ملك ، إحنا إترشمننا بالميرون اللى كان الملوك
بيترشموا بزيت ما يطولوهوش .. إحنا بقينا أولاد الملك
الساوى . فاللى يستهين بالحرية دى يبقى إيه ؟ يبقى
عبد، والعبد لا يبقى فى البيت ، يبقى استهان بالسيادة.

الابن الضال

من أروع الأمثلة اللذيذة جدا عن الحرية والعبودية ..
الابن الضال كان فى بيت أبوه .. كان بيأكل ويشرب
ومبسوط ٢٤ قيراط . نقول له إزاي الأحوال .. يقول لك
البيت ده سجن .. نقول له ليه البيت سجن ما أنت بتأكل
وتشرب ومبسوط .. يقول لك أبويا بيدنى الفلوس
مصروف ، ومضيقين على . أنا عبد فى البيت مش واخد
حريتى .. طب حريتك إيه ؟ قال أروح أسهر مع الناس .
ده الخدامين اللى بيشتغلوا عند أبويا ييمضوا لياليهم بره

وبيسهرُوا للصبح ، وبيعملُوا كل حاجة .. وانا محروم
من الحاجات دى .. شفت أنا فى سجن إزاي ؟! ياابنى ده
إنت فى نعمة . كفاية إنك فى بيت أبوك .. لا أنا فى
سجن . كان الأب يقدر يقعده بالعافية .. قال له روح
جرب الحرية الكاذبة . ما هو العالم بيعرض الحرية
كذب. فراح هناك .. شوية كده الشيطان زين له الدنيا
فبقت حلوة لذيدة إتزحلق شوية شوية ، وصل فى الآخر
بقى يشتغل عبد عند راعى الخنازير ، فيدوبك يديله لقمته
ويذله .. لقمة عيش ويذله . قعد يتأمل ده أنا سبت مركز
كبير ورجعت واستهنت بالسيادة.

رجع تانى لأبوه أخذه بالحضن ، ودخله البيت
تانى .. وإداله لقمة .. دبح له العجل المسمن . كان
زمان يأكل من العجل ده ويقول " إيه الأكل ده " ؟
وبعدين يقعد يتذمر .. وبعدين بقى له الأكل لذيق .. طعام
الأحرار الحلوين .. بقى البيت بتاعه بيت الحرية ..
وطب القيود اللى كانت فيه ؟ واللى مازالت فيه ؟ قال
دى علامات المحبة . زى الأم اللى بتمسك ابنها وخايفة

إيده تقع فى النار ، فبتحوشها والواد بيصرخ عايز يلعب فى النار ، أو يحط إيده فى وسط ماكينة أو بتاع . فأمه تشد إيده وتمسكها ، والواد بيصرخ ومش فاهم فاكر إن أمه بتربط إيديه . ابتدا يفهم بقى .. كبر فابتدا يفهم إن القيود اللى كان أبوه بيمنعه منها دى علامات حبه . فهو كان بيقول له ما تسهرش بره لأنه خايف عليه . دى ما كانت عبودية ..

شوفوا أد إيه الشيطان خبيث . يقول لك أدى المسيحية ، وأدى وصاياها وأدى الإنجيل .. وأدى الحاجات الصعبة اللى فيها .. كلها قيود فى قيود دى صعبة المسيحية . آمال عايزين إيه ؟! عايزين حاجة سهلة .. عايزين باب واسع .. لا يا حبيبى .. الباب الواسع نهايته هلاك أبدى ، لكن الباب الضيق يودى للحياة الأبدية . ده طريق الحرية .. عارف إيه بقى طريق الحرية ؟ أهو واضح زى الشمس " من أراد أن يكون لى تلميذاً ويعيش حر ينكر نفسه .. سييه من نفسه .. ويحمل صليبه ، ويمشى ورايا فرحان .. ويفهم

كل حاجة فى الصليب وحلاوتها ولذتها .. الصليب ده مش حاجة للعار وبس .. ده الصليب ده كله معمول علشانى .. ده الصليب ده هو المحبة اللى اتسكبت عليه ده لما حبنى للمنتهى كسر ذاته .. وصلب نفسه .. سكب نفسه زى ما بيقول الكتاب المقدس.

فالحرية مش ممكن تكون بره عن الصليب .. دى السكة بتاعتها . عاوز يخش للحرية من الباب الواسع ده آخرته هلاك أبدى .. ده جهل زى الجهل بتاع الإبن الضال ، لكن لما فهم وزجع .. فهم إن العيشة فى بيت أبوه هى دى الحرية ، فده يوحنا ٨ حديثه عن الحرية.

الحرية هى الرجوع لحضن الأب

الحرية هى الرجوع لحضن الأب من جديد .. الحرية هى العيشة فى بيت ربنا .. الحرية هى حمل نير المسيح ووصيته .. " نيرى هين وحملى خفيف . المسيح جه علشان يوهبنا حرية مش من بتاعة العالم الكذابة .. الحرية اللى توهب السعادة .. الحرية اللى ما تملكش

حاجة على قلبنا إلا اللي حبنا ومات من أجلنا هو ده اللي
له أن يملك على قلبنا لأنه فدانا بدمه . الشخص الحر ما
بيتغلبش أبداً . شوفوا المسيح بيقول لنا إيه ؟ تقوا فى وفى
كلامى .. " تقوا أنا قد غلبت العالم " .

عارف العالم ده اللي عامل يعمل لنا زى السينما
حاجات كل يوم عروض جديدة .. جديدة .. العالم ده
كله أنا غلبته . ما فيش حاجة جديدة فى العالم .. شهوة
الجسد وشهوة العيون وتعظم المعيشة .. من أيام آدم ما
حصلش حاجة . كلها بس ألوان جديدة .. لكن تقوا أنا قد
غلبت العالم . وأنا لما أطلع على الصليب وأنا إن ارتفعت
إلى فوق .. وارتفعت على الصليب أ جذب إلى الجميع .
وها يعيشوا الناس يعشقوا الصليب بتاعى ويشيلوه وهم
فرحانين . ومش هأحكى لك على قد إيه الشهداء عارف
التراتيل الفرايحي الجميلة فى الكنيسة دى كانوا يرتلوها
وهم رايعين إيه الإستشهاد . فرحانين أصلهم داسوا على
العالم ، ما فيش حاجة غالباهم .. بيقول معلمنا بولس
الرسول : " الذين هم للمسيح صلبوا العالم " ما فيش حاجة

غالباهم . قد صلبوا الجسد مع الالهواء والشهوات " ،
ومرة ثانية يقول " حاشا لى أن أفتخر إلا بصليب ربنا
يسوع المسيح الذى به قد صلب العالم لى وأنا للعالم .

الحرية هى القيامة

القيامة بقى هى البهجة .. قيامة الإنسان هى
الحرية .. فالحرية هى نصيب النفوس اللى دخلت من
الباب الضيق وشالت الصليب . فإذا كان الصليب هو
الطريق للحرية ، يبقى الحرية هى الثمرة للقيامة ، يبقى
ده هو نصيبنا النهاردة فى قيامة المسيح .

من أجل هذا ياأحبائى .. الرسول بيقول اثبتوا فى
الحرية اللى حررنا المسيح بها . فربنا يعطينا نعمة
وبركة حتى نعيش فى عمق هذه الإختبارات علشان نحس
بالقيامة فى حياتنا . وبكره نتكلم فى المرأة السامرية
كده . وأقرأها وعيش فيها . نشوف الانسانة الغلبانة دى
إزاي اتحولت إلى قديسة ومبشرة وانسانة حرة
وتحررت من العبودية .

ربنا ببركة القيامة المقدسة يعيِّشنا كلنا فى ملء
القيامة وملء الحرية ويمتعنا كلنا ببركة قيامته وحديثه .
لإلهنا المجد الدائم أبدياً آمين.



الأحد الثالث من الخماسين المقدسة

(يو ٤ : ١ - ٤٢)

الرب يسوع هو ماء حياتنا

اختارت الكنيسة إنجيل المرأة السامرية لكي يكون إنجيل الأسبوع الثالث من الخماسين المقدسة . فالأسبوع الى فات الكنيسة فهمتنا إن القيامة هي الحياة وجسد ربنا ودمه هو الحياة ، قدمت لنا الحياة الأبدية ، أو القيامة في شخص المسيح الموجود على المذبح من " من يأكلني يحيا الى الأبد " .

النهاردة الكنيسة بتتكلم عن القيامة بطريقة ثانية : لو في واحد موجود جوه القبر ومقفل عليه ومربوط .. أسهل لربنا يسوع المسيح اللي كل شيء سهل أمامه إنه يقول له لعازر هلما خارجاً بكلمة واحدة .. فقيامة الأموات أو أجساد الأموات أسهل من قيامة النفوس . لكن أدى أنتم شفتم أد إيه الحوار الطويل والمناقشة والجدل

عشان ربنا يسوع يقوم الست دية من القبر اللي كانت عايشه فيه . وبكلمة واحدة " لعازر هلم خارجاً " كلمة واحدة . ماكلفتش المسيح قيامة لعازر كلمة واحدة .

لكن السامرية لازم يبتدى يبين لها إن هو محتاج ويقول لها : " أعطيني لأشرب " أرجوك . وبعدين يدخل موضوع تآنى فى السكة إشكال كبير .. حكاية الجنس وإن أنت يهودى وأنا سامرية . إحنا مش من جنسية واحدة . وتدخل العصبية القديمة واليهود لا يكلمون السامريين .. ده أنتم ما بتكلموناش .. ولو عدى واحد يهودى على واحد سامرى ما يقولهوش حتى صباح الخير .. يديله ظهره . ودلوقت جاى تقول لى أدينى لأشرب .

وربنا يسوع لم يكن محتاج إلى مياه السامرية . لكن كان بيعمل كل جهده لى يقيم هذه المسكينة . وابتدأ يكلمها عن الماء الحى . وابتدأ يكلمها فى الأمور الدينية وتقول له إن إحنا عندنا حاجات أحسن من اللى عندكم كمان . وعندما بير يعقوب وأنتم بتقولوا أورشليم . وأحنا عندنا بير يعقوب اللى شرب منه هو وبنوه ومواشييه .

صدقنى يا عزيزى لما قال المسيح بفمه الطاهر إن الأعمال التى أنا أعملها تعملونها وأعظم منها . أنا عايز أسأل إيه الأعمال اللى كانت أعظم من اللى عملها المسيح علشان إحنا نعملها ؟! المسيح يقول للكنيسة الأعمال اللى إحنا نعملها ها نعمل أعماله وأعظم منها .. أنا عايز أعرف إيه اللى أعظم منها . ما فيش أعظم .. لأن الناس افكرت أن العظمة بتاعة الأعمال بشكلها .. يعنى واحد يقوم من القبر .. لكن واحد يتحول من حياة الشر .. مش بس يتوب عن الشر لكن يتحول لأنسان مبشر وخادم للمسيح وكارز له .. دة أصعب من قيامة الناس من الأموات ، وزى ما قلت لك أن قيامة لعازر بكلمة واحدة : " لعازر هلم خارجا " ، لكن السامرية أخذت من المسيح مشوار طويل جدا .. وحتى تلاميذه مافهموش هو بيقول إيه .. ولا بيعمل إيه .. ولا الجهد اللى بذله .. ولما رجعوا قالوا له اتفضل كل . قال لهم أنا أكلت خلاص شبعان . قالوا لازم أحد جاب له أكل وإحنا غاييين .. وابتدأوا يتهكموا فى داخل نفوسهم ازاي هو كان بيتكلم مع

امرأة . ولم يعلموا إن ربنا يسوع المسيح كان يقيم نفس
ليست في القبر ولكن في أعماق الجحيم ..

وإحنا يا أحبائي ربنا بيكشف عن عينينا علشان
نشوف العمل الجبار اللي عمله المسيح .. هو بالصليب
كان بيغدي الناس اللي كانوا موجودين على الأرض وقتها
ده أنا في القديس بنقول نزل إلى الجحيم من قبل الصليب.
ومعلمنا بطرس بيقول إن هو ذهب وكرز للأرواح التي
في السجن .. أو في الجب .. وزكريا النبي يتكلم بيقول
"تعالوا إلى الحصن يا أسرى الرجاء تعالوا من الجب ..
اخرجوا من الجب .. جب سفلى .. اخرجوا بدم عهده ،
فتعالوا اطلعوا بدم عهد المسيح .. يا أسرى الرجاء . فاللي
عاوز أقوله إن فيه جب سفلى .. وفيه أسرى .. وحكاية
القبور اللي فيها الناس الميتين ده موضوع بسيط جداً
بجانب العمل اللي عمله المسيح . والمسيح عمل أعظم
من قيامة الجسد عندما أقام هذه المرأة.

والكنيسة مشيت على هذا المنوال . وبنتكلم عن
توبة بانيسة اللي كانت فاتحة بيتها للدعارة .. وبنتكلم عن
توبة تاييس اللي القديس بيساريون نزل من الدير
مخصوص علشان يتوب هذه المرأة بقوة جبارة وقال بدل
ماهي تسقط آلاف الشبان أنا أروح أقدر أنقذها وراح
استلف جنيه من واحد وراح اشتغل خدام في البيت ده عند
الست الشريرة دي . وقعد يستدرجها لغاية لما توبها ومبا
سبهاش إلا لما وصلها الدير .

هذا العمل عمل بطولى .. عمل أعظم من قيامة
الأموات . علشان كده مش كثير أبداً إن الكنيسة تقول
النهاردة ان موضوع تأملنا هو المرأة السامرية . طب
ايه علاقة السامرية بقيامة الأموات ؟ بقى الجهد اللي
عمله المسيح ده مش قيامة للنفس الغرقانة دي . وبعدين
أنا وأنت نسأل نفسنا إحنا دلوقت جايين نستعرض حياة
السامرية اللي قدمها المسيح ؟! ولا الأنجيل ده موجه لينا
إحنا . طب ما القيامة من الأموات تخصنى وتخصك .
طب ما أنا غرقان ومحتاج للمسيح يعمل معايا الحوار ده

ومحتاج إن أنا فى نهاية الحوار أقوم وأسبب كل الرباطات
اللى أنا متربط بيها . أنا وإنك والمرأة السامرية علشان
كده الكنيسة بتقدم لنا هذا الحوار النهاردة . وإحنا اللى جوه
اللى نازلين فى أعماق الخطية وإحنا اللى عاوزين المسيح
يقوم نفوسنا . يقومنا قيامة أولى .

وإحنا اللى بنتكلم عن القيامة الأولى .. قيامة
الأرواح لأن المسيح جه علشان يقومنا من الخطية . مش
بنتكلم عن القيامة الثانية قيامة الجسد .. ربنا يسوع المسيح
ماسبش المرأة ديه غير وهى ساجدة تحت رجله .. وكلمة
ساجده يعنى قبلته فى حياتها قبول تام .. طب والماضى
بتاعها انتهى فى ثانية ولحظة .. لأن لقائها مع المسيح
بعد الحوار الكبير ده فكك رباطات كثيرة.

هل كان من السهل إن المرأة ده تسبب خمسة من
الناس كانت مرتبطة بيهم ، وأماكن معينة كانت مرتبطة
بيها ، وحياة معينة أصبحت جزء من حياتها ما تقدرش
تغيرها ؟!.

يعنى ياعزيزى ممكن تتخيل إن إحنا نجيب إنسانه
من الرقاصات الأشرار الوحشين اللى بنسمع عنهم وبعدين
الست دى تتحول إلى قديسة عابدة من القديسات الكبار
فى الكنيسة ، ماهى دى معجزة مسيحيتنا . هى المسيحية
لا انتشرت لا بسيف ولا برمح .. ولا جات علشان
تستولى على مدن وعلى بلاد وتكبر الرقعة بتاعتها ، لكن
جاءت تقتحم الجحيم نفسه اللى فيه الشر . جاي المسيح
اللى قام من الأموات بقوة .. بقوة صليبه ليقتحم كل قلب
ويخضع كل فكر لطاعته .

فدية قيامتنا .. وده نصيينا من القيامة .. وياريت
موضوع السامرية ده يبقى موضوع تأملنا هذا الأسبوع .
الست ديه كانت حالتها تعبانة ، مربطة ومقيدة .
وزى ربنا يسوع فى انجيل معلمنا يوحنا الأصحاح الثامن
قال إن اللى يعمل الخطية هو عبد للخطية . وكانت عبدة
وكانت مأسورة وبعدين ربنا يسوع جه وفق كل الرباطات
بتاعتها ديه .. ودعاها علشان تعيش بعد كدة انسانة جادة .
مش تحت قيود . فإذا كنا إحنا فى الأيام اللى فاتت كنا

بنتكلم عن الحرية كنصيب لنا فى المسيح فتنقى المرأة
السامرية دى هى المثل القوى جدا لأنسانة تمتعت فعلا
بالحرية فى المسيح يسوع .

وإحنا ياأحبائى بدون أى مبالغة كلنا نعلم أن قد إيه
الانسان تحت وطأة الخطية يبقى عبد ويبقى مربوط ..
وفى اصطلاح الأنجيل بيعتبر هذا الرباط موت.

النهاردة الكاثوليكون بيقول إن إحنا علمنا أننا
انتقلنا من الموت علشان إيه ؟ .. قال لأننا نحس الأخوة .
ومن لا يحب أخاه يبقى فى الموت . يمكن الموضوع ده
يعدى على العالم ببساطة . لكن ما يعدش على الكنيسة ..
"ومن لا يحب يبقى فى الموت" ، انسان ميت .. الانسان
الى بيغض ده . طيب ما أنا ياما القلب بتاعى اتملى
بالبغض .. من الكراهية أحياناً بالضغينة .. بقى أنا كنت
فى الموت ؟ لكن ده أنا أياميها كنت بأجى الكنيسة وكنت
بأعترف وبأتناول .. والموضوع بسيط خالص أبسط من
البساطة.

الكنيسة النهاردة تقول : لا .. اللى قلبه مش متور
بالمحبة يبقى هو عايش فى الظلمة .. ويبقى هو فى
الموت .. وبعدين يرجع يقول " إنا قد انتقلنا من الموت
للحياة لاننا نحب الأخوة ". أنا بأديك مثل بسيط .. قد إيه
قلب الانسان يمكن يبقى قبر مظلم فعلا ويبقى محتاج
 لعملية قيامة .. زى ما بيقول الرسول " قم أيها النائم
 واستيقظ من بين الأموات لكى يضيء لك المسيح " .

ففى ناس ميّة .. أنا اختبرت هذا الموت . وربما
إنت اختبرت هذا الموت . إن الإنسان يتقيد ويتربط
ويعيش فى ظلمة .. الحقد والكراهية والضغينة والحسد
والغيرة . ويبقى قلبه متغاط وما فيش سلام فى الداخل ..
يبقى عايش فى الظلمة .. طب يابونا ما هى ظروف
الحياة والناس اللى حوالينا واحتكاكاتنا بيهم .

لكن المسيح جاى علشان خاطر ينور لنا الطريق
علشان خاطر يقيمنا . مش أنا بأقول لك هى عملية صعبة
هو لو قال لعازر " هلم خارجاً " أسهل .. لكن تقول لواحد
بينه وبين واحد تار .. ولو تقول لواحد مش قادر ينسى

لواحد اساءة حصلت له .. ولا تقول لواحد غير ان من واحد وبيحسده .. كل لما يشوفه ما يتصورش شكله ويقول ده كان ما يساويش حاجة دلوقت بقى فوقنا وعمل وعمل وعمل .. طب ده محتاج فعلاً " إن المسيح يدخل قلبه ويحرره ويقوّمه.

وماذا نقول ياأحبائى أيضاً عن ضعفائنا البشرية . إذا كانت عينى البسيطة دى الغلبانه .. اللى بتنطرف بأى حاجة بسيطة . مش عارف أضبطها . ومرات أقول أعيش بعين مقدسة وأسلك مع المسيح . والعين اتخلقت علشان أعاين مجده ، وأشوف الحاجات الحلوة اللى عملها . وبعدين أفكر آية المسيح " إن كانت عينك شريرة فجسدك كله يكون مظلّم . والظلام هو الموت " . بقى العين لما تبتدى تنظر نظرة شريرة يدخل الموت للجسد كله من الرأس للرجلين ؟! قال إن كانت عينك شريرة فجسدك يكون مظلّم . أظن أنا مرات بل الآف المرات أشتكى من عينى إنها بتتحرف شمال ويمين وأنا فى كل مرة أنسى إن الموت بيدب فى جسدى وبأبص للعملية أنها حكاية بسيطة

خالص مع أن المسيح قال " سراج جسدك عو العين فإن
كانت عينك بسيطة فجسدك كله يكون نيراً وإن كانت
عينك شريرة فجسدك كله يكون مظلماً ."

يا الهي إذا أنا عايش في الظلمة .. وأنا عايش في
الموت .. أنا السامرية بتاعة النهاردة .. المحتاج أنت
تقول لي ياربى .. تعال ادخل في حياتي وتعال قومني
وفك الرباطات الموجودة في ..

وماذا نقول يا أحبائي عن شهوات العالم عندما
تربط النفس البشرية وتقيدها رباطات عنيفة جداً .
وساعات نسمع قصص نقول احنا مش مصدقين نفسينا ..
فلان ده يتصرف هذه التصرفات ؟! فلان الرجل المحترم
الوقور .. اللي .. اللي كل ده .. البنت الطيبة اللي من
البيت الطيب ده .. البنت الممتازة كل الحاجات دي ..
ايه اللي جرى ؟! ايه اللي جرى !!؟

ده الكتاب المقدس يقول " كل قتلها أقوىاء " ده
الشيطان وظيفته أول لما عرض الموضوع على حواء عن
طريق الحية قال لها بصي : ليه ربنا منعكم من الأكلة

دى؟ دى أصلها لازم فيها حاجة فيها سر حلو . من غير
ما تذوقها . يقول لك فوجد الشجرة أنها شهية للنظر
وحسنة للأكل .. وبهية وحسنة .. ده هو أنت ذقتيها
علشان تقولى إنها حسنة وطعمها حلو ولذيذة وشهية
وشكلها حلو .. ويعنى ما كنش فيه ثمرة جميلة فى الجنة
كلها أجمل من الثمرة ديه ؟ ليه يعنى؟! يعنى الجمال كله
انحط فى الثمرة ديه . وبعدين طعمها وأنتم ما ذقتوهاش
أحلى من أى ثمرة ثانية .. ده كلام ؟! أهو ده اللى إحنا
بنسمية الشهوة يستطيع الشيطان يحلى له الحاجة ويمكن
الحاجة تكون وحشة . ومش محتاج ليها . ولكن يقيده بهذه
الشهوة ويربطه بيها وشوية شوية يشده .. يشده وبعدين
أبص ألاقينى عايز أطلع من الحاجة اللى اشتيتها وابتديت
أرتبط بيها ومش عارف أطلع .. أجى أفك القيود ألاقينى
مقيد زى واحد مسجون فعلا.

مش تعبير صعب لما الكنيسة بتقول : فك
المربوطين يارب .. فيه ناس مربطة .. أنا أعرف إن
لعازر مش جوه القبر كان مربوط بأيديه ورجليه .. لكن

لا.. ده فيه ناس مربطة كثيرة والكنيسة باستمرار بتقول
"أنت الذى تحل المربوطين وتقيم الساقطين .. يارجاء من
ليس له رجاء ومعين من ليس له معين" . اللى فقد الأمل
خالص .. اللى ما عندوش أمل اللى الرباطات مش ممكن
يتحرر منها .. أهى دى القيامة .

لأجل هذا ياأحبائى المسيح القائم من الأموات
مسيح جبار.. جبار .. مش مسيح ضعيف .. الناس
البسطاء تقول لك من لطمك على خدك الأيمن فحول ليه
الأيسر .. دى منتهى الضعف .. المسيح اللى كسر شوكة
الموت ده مسيح جبار .. المسيح اللى بيقيم الموتى ده
جبروت الكنيسة .. الكنيسة ما بتنتشرش بقوة مادية .. دى
القوة المادية دى للضعفاء . الكنيسة بتمشى بقوة القيامة
علشان كده بولس الرسول طالما يتكلم عن القيامة يقول "
لأعرافة وقوة قيامته " . فالقيامة قوة ياعزيزى تسرى فى
حياتنا .

الحرية هى ثمرة القيامة .. أدى نصيبنا فى
المسيح .. علشان كده بولس الرسول النهاردة فى رسالته

لكولوسى الى اتقرا ت علينا تقول كده : إن كنتم قد قمتم مع المسيح .. صحيح إنتم بتتكلّموا عن القيامة . فاطلبوا ما فوق حيث المسيح جالس عن يمن الله . إن كنتم قد قمتم إلى فوق اعملوا زى السامرية . طب مش عارف يارب .. قال أنا أعينك .. أmaal أنا قمت ليه ؟ أmaal أنا قمت ليه ؟ أنا قمت علشان أقومك قال قومنى ياربى .. قال أنت نسيت إن أنت عضو فى جسمى وده اللى يقول له بولس الرسول هنا " إنكم قد قمتم وحياتكم مستترة مع المسيح فى الله". يعنى أنتم دخلتم كده عجينة عجنة فى جسد المسيح والمسيح هو ابن الله بالطبيعة .. فأنتم بقيتم تقولوا لربنا يا أبانا . وأبانا فين ؟ هو أبانا .. بس على الأرض .. هو أبانا .. بس فى السماء ؟ الله غير محدود لا بالسماء ولا بسماء السموات حتى .. ولكن حب يؤكد لنا إنه مادام أنتم قمتم من الأموات اطلبوا ما فوق حيث المسيح جالس لأنكم قد متم عن الأرضيات زى السامرية ماتت عن الماضى بتاعها .. وحياتكم مستترة مع المسيح فى الله . حتى " متى أظهر المسيح حياتنا " . (الذى هو)

حياتنا ومتى أظهر المسيح حياتنا فحينئذ تظهرون معه فى
المجد . فالقيامة لو تحب أنت تدرسها بنصيبك الحقيقى فى
الكنيسة . إنت عضو فى جسم المسيح . والمسيح قام .
فانت النهاردة قائم من الأموات . علشان كده وراها على
طول بولس الرسول يكمل ويقول : " فأميتوا أعضاءكم
التى على الأرض الزنا النجاسة ، الهوى الشهوة الخبيثة ،
الطمع الذى هو عبادة الأوثان ...

من أجل هذه الشرور يأتى غضب الله على أبناء
المعصية . لأن النفس اللى المسيح اداها هذه الحرية ..
وقومها من الموت بتاعها وفك كل الرباطات بتاعتها ونور
القلب بتاعها .. ونور العين بتاعتها .. نور الجسد .. هذه
النفس عندما تعود إلى الاهتمامات الأرضية تبقى زى ما
المسيح قال عنها كالكلب الذى يعود إلى قيئة والخنزيرة
المغتسلة إلى مراغة الحمأة.

لكن يارب تدينى فرصة لأنى ياما كثير رجعت ..
ياما كثير رجعت .. مازالت الفرصة قدامنا مادام لينا حياة
ومادام المسيح القائم من الأموات جى إلى الأبد . فكما

يقول بولس الرسول فلن يسود عليه الموت بعد مش
هايموت مرة ثانية . نحن مدعوون لكي نعيش قوة القيامة
وبهجتها نحن مدعوون .. فأحنا حياتنا مستترة في
المسيح . السامرية كان المسيح يقيمها لأنها كانت انسانية
منفصلة بعيدة لسة لكن بعد القيامة أصبحنا أعضاء في
جسم المسيح .. فالقيامة هي نصيبنا .

لأجل هذا يا أحبائي عندما يتحدث ربنا يسوع عن
الحرية .. فهو يخلو موضوع الحرية من اختصاصه
شخصياً . ويبقى كل واحد في الدنيا دى بيتكلم عن الحرية
بيتكلم عليها بمفهوم تانى .. بمفهوم عادى بمفهوم عالمى
لكن الحرية الحقيقية حرية النفس .. ليس لانسان سلطان
ليها أو يعطيها إلا المسيح . "إن حرركم الابن بالحقيقة
تكونون أحرارا " .. ماحدث ممكن يحررنا تانى ؟ قال أبدأ
النفس اللى قبلت المسيح فى حياتها النفس اللى عاشت
المسيح .. النفس اللى اتولدت بالمعمودية .. والنفس اللى
حياتها استتريت فى المسيح هى دى النفس اللى قامت
وليها حق أن تتمتع بالقيامة من الأموات . إن حرركم

الابن بالحقيقة تكونون أحراراً . إوعى حد يحاول يغالط
فكرك أو ذهنك أو يقنعك إن فيه حرية ثانية تصل إلى
نفسك . أقصد يعنى إن المعنى ده واضح .. إن مافيش
سعادة توصل إلى نفسك إلا عن طريق المسيح . لأن
الحرية بتجيب السعادة . الانسان الحر سعيد .. يقول لك
الابن الضال إيه ؟! لما كان قاعد فى بيت أبوه يقوم
زملائه العيال الوحشين من برة يقولوا له إيه .. يا غلابان
يامسكين ده إنت عايش فى سجن .. يقول لهم إيه يقولوا له
الحرية بره احنا بنسهر .. ده الخداميين بيقولوا له كده احنا
بنسهر بره وبنعيش بره وبنعمل كل حاجة و .. و .. إلى
آخره إنت قاعد فى بيت أبوك هنا .. قال إيه فعلاً الكلام ده
صح أنا محروم من الحرية ..

المسيحى اللى يتطرق إلى ذهنه إن وصية الانجيل
قيدتة أو حرمتة من متع العالم دا غلطان خالص .. ده
مضحوك عليه .. ده الشيطان بيزحلقه .. وبيغرر بيه ..
دى الحرية إن إحنا نكون فى بيت أبونا . طب سيبه يطلع
بره .. راح الابن الضال ولف لما تعب .. واشتغل عبد ..

ومالقاش لقمة ياكلها .. وبعدين قال فيه عبودية أكثر من كده ! وبعدين رجع لحضن أبوه قال له شفت ياابنى بقى فين الحرية ؟! قال له ياأبى كنت فاهم غلط .. كنت فاهم غلط .. إن الحرية أو الناس فهمتى .. أو آراء العالم إن الحرية هي فى البعد عن المسيح .. لكن عرفت دلوقتى إن ماحدث يقدر يوهب الحرية للنفس غير المسيح بس . والحرية ياأحبائى عاشها أولاد ربنا على أعلى المستويات وإحنا قدامنا صورة الست دميانة دى .. صورة الست دميانة . أنا بأقول إن الشهداء دولت أكثر ناس اختبروا قوة القيامة . مع إنهم ذبحوهم وموتوهم . ليه ؟ لأن هم راحوا يواجهوا الموت بنفسية أقوى من الشخص اللى هاينفذ فيهم حكم الموت .. لدرجة إن فى التاريخ أحياناً كان السيف يخاف ويرتعث من الشخص اللى هايقطع رقبتة . يقوم الضابط أو الرئيس اللى موجود يطلع من جيبه فلوس ويوزع ويقول للسيف اللى ها يقطع رأس القديس بطرس خاتم الشهداء هاأخذ مكافأة كذا لأن العساكر خيفة تقرب منه .. يقول لك كان فيه هالة نور كانت على وشه كده

الشجاعة والجرأة بتاعته اللي هو بيتقدم بيها .. راحوا
لست دميانة .. كتيبة بحالها رايحة تقتل بنت غلبانة زى
دى .. وبعدين يقولوا لها الامبراطور يدعوك إن إنت كذا
كذا واغراءات علشان يزحلقها فى رباطات فى سجن
ثانى .. قالت له لعن الملك وأوثانه مش خايفة من الملك؟
قالت له : لا .. أنا لا بأخاف من الملك ولا من أوثانه ..
آه .. هى دى الحرية ؟ الحرية : **الخوف طلع من القلب .**
دلوقت لو حتى انسان مليونير وعایش فى الدنيا
امبراطور وملك .. والخوف ده فيه .. فيه ناس بتموت من
الخوف وفيه ناس من القلق .. ودى أمراض بيقول لك دى
أمراض القرن اللي احنا موجودين فيه . **القيامة تشيل كل**
ده خالص تنظف كل ده من القبر .. تخلص القلب بتاعنا
مسكن الله .. تخلص نور القيامة يشع فيه .. قالوا لها طب
أبوك أنكر الايمان .. طب علاقة الأبوة دى إيه ؟ الرباط ده
مين يقدر فكّه .. طيب كتبت جواب لأبوها وقالت له اسمع
ارجع للمسيح الحى .. لأنك لو مارجعتش .. أحسن لي

يجى لى خبر موتك من أن أسمع إن إنت تركت الإله
الحى اللى خلقك وفداك علشان تعبد الأوثان .. دى حرية .
فاحنا ياأحبائى قدامنا النهاردة مثل مجسم .. حلوة
الكنيسة بتاعتنا .. بتحط لينا أمثال عملية .. أهى السامرية
هى مربطة بشهواتها ، مربطة بأحقادها فى القلب .. خلى
بالك الكراهية والحقد دية زى ما قال لنا الكاثوليكون
النهاردة : **قد انتقلنا من الموت إلى الحياة** لأننا نحب
الإخوة .. إوعى تفتكر إن الكلام ده للناس بره .. لينا احنا
مافيش حد مننا يمكن ما اختبرش الكراهية والحقد والزعل
مافيش حد مننا وأنا فى الأول .. لكن ما فكرتش ساعتها إن
أنا كنت فى عمق الموت .. ولكن المسيح جه علشان
ينقلنا .. يفك شهواتنا .. يدينا الحرية .. زى ما أعطى
المرأة السامرية إن هى تعيش حرة من كل الماضى
الوحش بتاعها .

الهنا الصالح قادر أن يعطينا هذه البركة . بركة
هذا اليوم المقدس .. بركة الحرية من شهوات هذا العالم
ورباطاته ، ومن همومه ومن قلقه .. ومن الكراهية ..

ومن كل حاجة وحشة علشان تعيش قلوبنا فيه ملء الحرية
منتورة بنور قيامة المسيح .
لالهنا المجد دائما أبدياً آمين.



عشية الأحد الرابع من الخمسين المقدسة

من يأكل هذا الخبز فإنه يحيا إلى الأبد . وتكرر الحديث في فترة الخمسين عن سر التناول لأن التناول فيه الحياة . والقيامة هي الحياة من الموت . فالقيامة تعادل الحياة .. فأباؤنا القديسون اعتبروا أن شركة جسد ربنا يسوع المسيح هو عيد القيامة بنفسه ، فبعد صعود السيد المسيح له المجد ابتدأوا يعتبروا أن كل يوم أحد في الأسبوع هو تذكار القيامة المقدسة وسموه يوم الرب . واختص هذا اليوم بتوزيع جسد المسيح فيقول البعض إن في الأوقات الأولانية في الأيام الأولى بعد قيامة ربنا يسوع المسيح وصعوده للسماء .. كانوا بينما هم مجتمعون لكسر الخبز وللتناول يجدوا المسيح في وسطهم ويناولهم ، وربطت الكنيسة ربط كبير جدا بين سر التناول وبين القيامة لدرجة أن قدرة الانسان على

معرفة الله واستنارة قلبه بروية ربنا متوقفة على سر التناول .

ما أسهل أن انسان يقرأ الأنجيل ويدرس ويناقش
ويحلل ويستنتج ويتأمل ويكتب .. لكن يكلمنا الكتاب
المقدس عن تلميذى عمواس أنهم كانوا ماشين وكانت
قلوبهم بطينة بحسب تعبير الكتاب وغبية فى الفهم ..
والمسيح وبخ هذا البطء وهذه الغباوة . ووصلوا إلى قرية
عمواس وتظاهر ربنا أنه ماشى لمكان أبعد .. وبعدين
مسكوا فيه علشان يقعد معاهم . ويقول الكتاب : " فدخل
ليمكث معهما فلما اتكأ معهما أخذ خبزاً وبارك وكسر
وناولهما فانفتحت أعينهما وعرفاه ثم اختفى عنهما " ..
فأكل وأخذ خبز وكسر وناولهم فانفتحت أعينهم وعرفاه.
مفروض هو ضيف .. والضيف لما بيخس بيت ، مين هو
اللى بياخذ الخبز ويحط ويؤكل الناس اللى قاعدة ؟ الضيف
الضيف يقعد والناس اللى قاعدين يقدموا له الأكل وما
يمدش إيده على الأكل إلا لما الناس يمدوا له . هو بسرعة
أخذ خبزة وبارك وشكر وكسر وناولهما .. أكلهم . إدى

كل واحد حتة فى بقه .. وللحال انفتحت اعينهما فعرفاه ثم
اختفى عنهما . هم بيحكوا لما راحوا للتلاميذ وهم يقولون
" إن الرب قام بالحقيقة " وظهر لسمعان . أما هما فكانا
يخبران بما حدث فى الطريق وكيف عرفاه عند كسر
الخبز وربطوا ربط أكيد بين معرفة المسيح وبين كسر
الخبز .

ولازم نعرف يا أحبائى إن إحنا معرفتنا عن ربنا
مش معرفة عقلية . لأن مهما كان العقل ماهر فى ادراك
أسرار الكون . والكلام ده .. لكن ها يبقى قدام أسرار الله
عاجز .. لكن يقدر الإنسان يعرف على قدر ما ربنا يفتح
ذهنة ويعطيه .. يعنى معرفتنا لربنا متوقفة على اعطا ربنا
لينا هذه المعرفة إنه يفتح ذهننا . فهم راحوا للتلاميذ وقالوا
لهم إن الحادثة تلخصت فى كده إن إحنا عرفناه ساعة ما
كان بيكسر لينا الخبز .. ساعة ما ناولهم انفتحت عينيهم
فعرفاه وهو يكسر الخبز .. عرفاه وهو قائم من الأموات
علشان كده ادراكنا للقيامة من الأموات مرتبط ارتباط
كامل بين أكلنا للخبز أى لجسد الرب ودمه . وده اللى

خلى الوحي الالهى يقول لمعلمنا بولس الرسول : " إن كل مرة تأكلوا هذا الخبز وتشربوا من هذه الكأس تبشرون بموتى وتعترفون بقيامتى وتذكرونى إلى أن أجيء " .
فالنقطة الأولى أن ادراك ربنا وفهمنا ليه متوقف على استنارة قلوبنا وذهننا لتناول جسد ربنا ودمه وده مش موضوع غريب . يوم أنت لما تتناول بتحس إن إنت لك صلة بربنا ومعرفة . صحيح مش معرفة بالعقل . لكن بتحس إن إنت بقيت قريب منه وعارف بتحس إن قلبك انفتح وعينيك انفتحت .. وأنت بتأكل الخبز بتحس إن إنت بتشارك المسيح فى القيامة بتاعته .

زى ما قلت لك كمان إن الكنيسة ربطت بين القيامة والتناول فقالت بما أن القيامة كانت يوم الأحد فنخلى التناول كمان يكون يوم الأحد ، وبما أن القيامة كانت فجر الأحد .. فقداس يوم الأحد ده طبعا إحنا بناخره دلوقتى إنما هو مفروض يطلع مع فجر الأحد ولو تأخذوا بالكم من قداس القيامة .. مفروض يبتدى الصلاة فيه بعد

١٢ بالليل .. مش يطلع ١٢ بالليل . لأن هو الظهور كان
فى فجر الأحد .

يقول سفر الأعمال : " إتهم بينما كانوا مجتمعين
لكسر الخبز فى أول الأسبوع " .. " وفى أول الأسبوع إذ
كان التلاميذ مجتمعين لكسر الخبز " . فكان كسر الخبز
بيتم فى يوم الأحد اللى هو يوم القيامة .

من الحاجات اللطيفة أن ليلة عيد القيامة بنقرأ
الأنجيل بتاع القيامة .. ونقرأ المزمور ، والمزمور بيقول
كده : " هذا هو اليوم الذى صنعه الرب " .. اللى هو يوم
الرب يعنى .. فلنفرح ولنبتهج فيه . فالمزمور ده إحنا
بنقوله بعد أبونا ما يأخذ الحمل .. ويعمل به دورة حوالين
المذبح فالشعب بيرد : " هذا هو اليوم الذى صنعه الرب "
إحنا ما بنقولش المزمور ده بس غير ليلة عيد القيامة ويوم
الأحد .. يعنى فى أيام الأسبوع الثانية كلها بنقول مزمور
تانى غير كده وده يورى لك إن الكنيسة فهمت إن هذا هو
اليوم الذى صنعه الرب فلنفرح ونبتهج فيه اللى هو يوم
القيامة .. هو بعينه يوم الأحد . بدليل إن المزمور ده

اللى بيتقرأ ليلة العيد هو لازم يتقرأ كل يوم احد . واللى
ياخذ باله أكثر فى قراءات الكنيسة فى باكر ، اللى بيحى
الكنيسة بدرى .. أحنا بنرفع بخور باكر وبنقرأ الأنجيل
أغلب أيام الأحاد على مدار السنة بيتقرأ الأنجيل بتاع
المريمات لما راحوا يزوروا القبر فى يوم الأحد .

ففى ربط كبير خالص إن يوم الرب ده يوم
التناول من جسد ربنا ودمه . وبنفس الطريقة اللى كان
التلاميذ يبيقوا منتظرين مجىء الرب . لأنه كان بيدخل
والأبواب مغلقة فى العلية أول الأسبوع لما دخل علشان
خاطر توما كانوا فى أول الأسبوع فى اليوم الأحد . ولما
دخل عيد القيامة كان يوم الأحد . وغالبا كانت ظهورات
ربنا أيضا يوم الأحد . فالكنيسة قالت كمان إن القديس
يتعمل يوم الأحد . زمان كان القديس بيتعمل بس يوم
الأحد .

أيضا الكنيسة اعتبرت إن الحياة .. إن الحياة هى
أن ترتبط بالمسيح لأن المسيح قال " اثبتوا فى " .
فالعصن اللى مش ثابت فى الأصل مش ممكن يجيب ثمر .

ازاي نثبت في المسيح ؟ قال " نأكل جسده " .. نأكل جسده
فده يثبتنا في المسيح .. فده معنى الحياة . لو أنت تشوف
غصن شجرة كده تقول انغصن ده حى ولا ميت يقولوا
نشوفه نشوفه ثابت . قال : " إن كنتم تأكلوا جسدى تثبتوا
في وأنا أثبت فيكم " .

حاجة تانية أنت بتحس بيها وأنت بتتناول جسد
المسيح ودمه إن سبب الموت الخطية ، سبب الموت يعنى
اللى يعمل خطية أجرة الخطية موت ، طيب ودم المسيح
وجسده ده .. أبونا وهو بيقول الاعتراف الأخير بيقول إيه
" يعطى لمغفرة الخطايا " فيبقى اللى بيأكل جسد المسيح
ودمه بتتغفر له خطيئة .. بتتغفر له خطيئة يعنى بيتشال
الموت منه .. يتشال الموت منه يعنى بيتمتع بالقيامة .

فيه ارتباط بين القيامة وبين غفران الخطية لأنه
لو كان فيه خطية مايبقاش فيه قيامة لكن بما أن جسد ودم
المسيح يعطى لمغفرة الخطايا . ده يوهب لنا القيامة فعلا .

أكثر من هذا أن المسيح قال " إن من يأكلني يحيا إلى الأبد وأنا أقيمة في اليوم الأخير " . يعنى اللى يأكلني هنا مايغلبوش الموت وفى نفس الوقت كمان لما يموت الموت الجسدى هذا التناول كفىل إن هو يعطيه قيامة ويدخله ملكوت السماء . " وأنا أقيمة في اليوم الأخير " يعنى مش بس إنه هو يعطى حياة لينا هنا ولكن أيضا اللى يأكله يقيمه ربنا فى اليوم الأخير . فأصبح التناول هو عربون الحياة الأبدية .

القيامة فى الواقع لها ارتباط كبير جدا بسر التناول ، فالكنيسة فى قرونها الأولى كانت بتتصر الناس وتدخلهم فى الإيمان (اسمهم الموعوظين) تقول نعمل لهم امتى وننصرهم امتى ؟ قالوا ليلة عيد القيامة . لأن الناس قاموا من الأموات لما اتعمدوا اتدفنوا وقاموا يبقى يستحقوا يأكلوا جسد القيامة .. فيتزفوا فى زفة القيامة : طيب أنا بأقول بالنسبة لينا ككنيسة حاليا لما بنعمل زفة القيامة دى على طول تفكرك بالتناول لأن أنت تقول المسيح قام من الأموات بالموت داس الموت . علشان تترجم الكلام ده

كلام عملى فى حياتك الشخصية يبقى المسيح مات زى ما كنت بأقول . دى مش تمثيلية وقام زى مامكتوبة فى بعض الكتب تمثيلية القيامة . لا .. المسيح مات عن خطايانا وقام . فكل واحد داخل الكنيسة .. داخل الكنيسة ليه ؟ قال علشان أسمع وعظة .. لا .. داخل الكنيسة علشان تايب قميت عن خطيته . وقايم مع المسيح . علشان يأخذ الجسد اللى ها يغفر له خطيته . الجسد والدم ويعطيه حياة . فإذا إحنا بنرتل وبنقول المسيح قام من الأموات . دى ترتيلة الناس المستعدة للتناول . زمان كانت ترنيمة الناس المنتصرين علشان يحضروا عيد القيامة . النهاردة دى ترنيمة النفوس التائبة اللى جاية علشان تأكل جسد الرب ودمه . تتصور بقى منظر الكنيسة كلها وإحنا بنزف أيقونة القيامة مش نبص للصورة إن المسيح قام بس لكن ده فى وفيك وفى كل واحد . أنت بتصرخ من قلبك وتقول المسيح قام من الأموات بالموت داس الموت يعنى إيه داس الموت فى حياتك ؟ يعنى أنا آكل جسد المسيح ودمه وده لمغفرة الخطايا يبقى داس الموت . فأصبحت

الكنيسة كلها بترنم ترنيمة حلوة واحدة وتغنى أغنية واحدة
هى أغنية القيامة . فالزفة دية هى زفة المتناولين .. زفة
المتناولين زى ما نجيب عيل صغير وينصّروه ويناولوه
بعدين يزفوه . فدى زفة الكنيسة كلها اللى هاتشترك فى
جسد ربنا ودمه .

من هنا يا أحبائى تقدروا تعملوا تقرير نهائى كده
إن المسيح قام مرة واحدة وترك للكنيسة القيامة على
المذبح . علشان كدة لما قال لمرثا " أنا هو القيامة " زى
ما قال " أنا هو خبز الحياة " .. دى هى دى ، لأن أنا هى
واحدة . أنا هو القيامة وأنا هو خبز الحياة من يأكلنى
يحيا إلى الأبد . فعاوز يقول لمرثا بس إنت مش هاتفهى
دلوقت لكن هاتفهى من خلال الكنيسة فيما بعد .

" أنا هو خبز الحياة الذى يأكلنى يعيش القيامة "
فأصبحت القيامة فيه . يسألوك المسيح ده قام ؟ .. قال لهم
كل مرة بنروح الكنيسة بنأكل القيامة . وأحنا عندنا فى
إيماننا المسيحى أن المفاهيم المعنوية دية فى ذهن الناس
أحنا بنأكلها وبنعيشها . فرق بين المسيحى وغير المسيحى

أنه ببيعش . أى واحد بره يتكلم عن القيامة .. لكن أنا بأعيش القيامة لأنى بأكل القيامة نفسها .. أنا بأعيش الحياة لأن الجسد اللى بأكله جسد حى .. أنا بأعيش القداسة لأن مش أنا قديس . لأن دم يسوع المسيح يظهر من كل خطية . فبأشرب دمه فأنا بأكل القيامة .. علشان كده معلمنا بولس الرسول أكد قال كلما أكلتم من هذا الخبز .. فيه فترة أنا هاسيبكم فيها من يوم ما هاصعد للسمااء لغاية لما آجى مرة ثانية على السحاب . فى الفترة دى إلى أن آجىء تأكلوا من هذا الخبز وتبشروا بموتى فى حياتكم وتموتوا عن العالم . وتبشروا بقيامتى وتذكرونى إلى أن آجىء . فلغاية لما آجى دية تنها قيامتكم علشان كده واحنا بنقول أوشية الأنجيل " لأنك أنت حياتنا كلنا وخلصنا كلنا وشفأونا كلنا وقيامتنا كلنا " .

قد إيه الكنيسة واعية جداً إن هى عاشت العشرين قرن دول ما غيرتش أبداً إيمانها العميق اللى استلمته من ربنا يسوع المسيح . لأن بولس الرسول ما قالش حاجة بولس علم تعاليم كثيرة جداً لكن فى رسالته لكورنثوس

الاولى اصحاح ١٠ و ١١ يقول " لآنى تسلمت من الرب
ما سلمتكم لأن هو فى اليوم الأخير أخذ خبزاً وشكر
وكسر وقال خذوا كلوا هذا جسدى".

يبقى واضح إن بولس الرسول ما استلمش سر
التناول من الرسل من بطرس ولا من يعقوب ولا من
يوحنا لكن تسلم من الرب " لآنى تسلمت من الرب ما
سلمتكم " .

إنه فى الليلة الأخيرة أخذ خبزاً وكسر وشكر وقال
" خذوا كلوا هذا هو جسدى " وأفرد ليه فى رسالته
لكورنثوس اصحابين يتكلم فيهم عن سر تناول .. وازاى
يكون باستحقاق . وازاى الناس يكونوا مستعدين علشان ما
ياخذوش دينونة .

وأصبح النهاردة لو جيت للحقيقة .. لو شئت سر
التناول ده من الكنيسة يبقى مافيش فيها حياة .. لكن
احنا كلنا لما نصارح بعض . احنا كلنا جايين للمسيح ليه ؟
لأننا بنأكل جسده وبنشرب دمه . ودى أكلة أولاد ربنا .
إحنا لما اتعمدنا قلنا احنا مولودين من فوق . ولما بنصلى

بنقول " أبانا الذى فى السموات " . ولما بياكلنا هو بياكلنا
أكلة .. أكلة من عنده هو .. بياكلنا جسده ودمه .. بيعطينا
كل ما ليه بيعطينا الحياة . جيت لكى يكون لكم حياة .
آخر حاجة بقى إن التلاميذ لما اتكلم الكلام ده .
انصرفوا من وراه . (لأن أى واحد يؤمن بالمسيح اسمه
تلميذ) . الحديث عن تناول ده كان بعدما أكل الخمسة
آلاف . ببص وراه مالاقاش من الخمسة آلاف حد . طيب
التلاميذ اللى ماشيين وراء المسيح .. الكل مشى وسابه ..
ببص .. عدّهم بالعدد الـ ١٢ فاضلين قال لهم " بس إنتم
فاضلين " !!؟ قالوا له : " آه أصل الكلام ده صعب .
ماحدش قدر يقبله أبدا " . قال لهم : وأنا مصرّ على هذا
الصعب .

حاجة عجيبة جدا لما يجى المسيح يتكلم عن الحياة
اللى بيقدّمها للناس نقول له : " ده صعب ما هو كده البنى
آدم .. مش فاهم مصلحته . لما يقولوا له إن الله جه ونزل
وتجسد وأخذ جسد انسان علشان خلاصك يا انسان ..
يقول لك لا مش معقول الحكاية دي . دي ما تخشش العقل

ولو يقولوا إن الله اتولد من أجلنا من بطن عذراء .. يقول
لا برضه مش معقول .. لما يقولوا بقى أن الله الأعظم
حاجة ومات من أجلنا على الصليب واتصلب وفدانا بدمه
يقول : أهى دى بقى اللى لا يمكن تدخل العقل . لما يقول
لهم هاديكم جسدى علشان تعيشوا وتثبتوا فى . يقولوا له
هذا الكلام صعب ماعدناش ماشيين وراك خالص .
فبص للتلاميذ وقال وأنا مصرّ على هذا الكلام .
أتريدون أنتم أيضا أن تمضوا ؟
فقالوا إلى من نمضى وكلام الحياة الأبدية هو
عندك .

ولألهنا المجد دائما أبديا أمين



الأحد الرابع من الخماسين المقدسة

(يو ١٢ : ٣٥ - ٤٣)

الرب يسوع هو نور حياتنا

الأسبوع الرابع من الخماسين المقدسة .. إنجيل
القداس يحدثنا عن النور . سيروا في النور ما دام لكم
النور لئلا يدرككم الظلام ، والذي يتتبع خطوات الشعب
في العهد القديم يجد أنهم بعد ما عبروا البحر كانوا
محتاجين لمرشد لئلا يضلوا في صحراء قاحلة . وإنت
تعرف قد إيه الإنسان اللي يتوه في الصحراء ما مصيره .
مصير الإنسان اللي يتوه في الصحراء وحش جداً علشان
كده كان لازم بيعت لهم عمود النور يرشدهم في الطريق .
وعمود النور هو رمز للمسيح له المجد . والصحراء هي
رمز للعالم . واللى يمشى في العالم بدون يسوع
ووصاياه .. بالضبط هو زى اللي ماشى في وسط البرية
بدون عمود نور . تسمع عن ناس تاهوا بعريبتهم .. ولا
فقدوا طريقهم وسط الصحراء يمشوا مرة شمال ويمشوا

مرة يمين .. ويخلص منهم الوقود بتاعهم .. وتخلص الميه
ومش عارفين هم ماشيين فين لغاية لما تخلص حياتهم
وينتهوا في ضلالهم .

فالإنجيل النهاردة .. أو الكنيسة .. عاوزة تعلمنا
وتقول إن القيامة اللي إحنا بنعيد بيها قبل الخماسين دي
هي عبارة عن مسيرة في النور .. مسيرة خلف المسيح
القائم من الأموات . لأن يوحنا الإنجيلي افتتح إنجيله بهذه
الكلمات " النور جاء إلى العالم والظلمة لم تدركه " . يعنى
بالضبط كده العالم كان تايه في برية ونهايته الهلاك بدون
أى مبالغة مش أقل من البرية اللي كان تايه فيها شعب
إسرائيل والمسيح بالضبط .. بالضبط هو النور . واللى ما
يمشيش ورا المسيح ها يكون نهايته يفقد حياته وسط البرية
يموت من العطش .. ويموت من الجوع . ولا يعرف له
طريق . وهو ده الكلام اللي قاله ربنا يسوع النهاردة . لأن
الذى يمشى في الظلام ليس يدري أين يتوجه . فدى(فهذه)
فرصة ما دام لكم النور سيروا في النور لكي تكونوا
أبناء النور .

مسيرة القيامة

فأبناء القيامة يا أحبائي هم أبناء النور . فأحنا
النهاردة المسيرة بتاعتنا مع المسيح اللي قام فى فجر
القيامة .. مع فجر النور الذى أشرق على العالم . هى دى
سكتنا .. هى دى سيرتنا . ومن غير المسيح نبقى إحنا
ماشيين فى الظلمة . ومن تعليم يسوع يبقى إحنا لا نعرف
إلى أين نمضى . لذلك ابتداء الكتاب المقدس يؤكد على أن
فيه صفات معينة للنفوس اللي قامت مع المسيح . وفيها
صفات للنفوس اللي ماقامتش معاه . اللي قامت مع
المسيح دى نفوس عايشة فى النور .. نفوس عايشة فى
النور علشان كده هى عايشة فى نور القيامة . واللى ما
قامتش مع المسيح دى لسة عايشة فى الظلمة . عارف
كمان زى إيه بالضبط ؟! عارف فى العهد القديم فى خلقه
العالم كانت الأرض كتلة مظلمة . ولكن الله قال " ليكن
نور " . تعرف بعد ما قال ليكن نور نورت الدنيا . ده
عاش به الناس بالكلمة اللي قالها ربنا فى العهد القديم ..
عاشوها أجيال كبيرة وسنين طويلة . بكلمته " ليكن نور " .

إحنا فى العهد الجديد أيضاً بولس الرسول قال ..
أخذ الآية بتاعة العهد القديم قال " الذى قال أن يشرق من
الظلمة هو الذى أضاء فى قلوبنا لإنارة معرفة مجد الله
فى وجه يسوع المسيح " .

الله اللى نور فى العهد القديم هو اللى بعت يسوع
المسيح علشان لما نبص فى وشه تتور حياتنا .. هو .. هو
الله الذى قال أن يشرق النور من الظلمة فى العهد القديم
هو اللى أنار حياتنا فى وجه يسوع المسيح لإنارة معرفة
مجد الله فى وجه يسوع المسيح .

مش عارف أد إيه أصور لك زى ما يكون نور
بس مخفى مش شايفينه .. وساقط على مرآة جامدة كده..
وانت فجأة بصيت فى المرآة كده فالنور شع فى وشك ..
ومش بس كده .. إن المسيح جاى علشان إحنا لما نسير
فى مسيرة النور نبقى أولاد للنور . لأن كلامه النهاردة
بيقول " سيروا فى النور " ما يقلش أنا النور بس .. ويقول
سيروا فى النور علشان إحنا فى فترة القيامة .. الخماسين
فالكنيسة قالت إن القيامة هى مسيرة النور بعينها .

مسيرة النور

فيه حاجة فى ذهن المسيح اسمها مسيرة النور ..
مسيرة النور دى يسير فيها أولاد النور . ومين هم أولاد
النور !!؟ هل كل واحد يقدر يمشى فى مسيرة النور !!؟
قال لا .. ده فيه ناس ما تحبش النور قال عنهم المسيح
لئلا توبخ أعمالهم . " يحبوا الظلمة علشان يعيشوا زى
الحشرات يعملوا الأعمال الوحشة زى ما ها نشوف
دلوقتى فى الظلمة .

فإحنا مش بس بنأمن إن المسيح هو نور العالم .
ولكن نحن أيضا أبناء النور ، مدعوين لمسيرة النور اللى
هى مسيرة القيامة .

أعمال النور

اتكلم ربنا عن الأعمال وقال : إن أولاد النور
يعملوا أعمال النور . قال ليرى الناس أعمالكم الصالحة
ويمجدوا أباكم الذى فى السموات . فأعمالكم تبتدى تنور .
وقال تشبيهه على كده " لا يمكن أن يوقد مصباح ويوضع

تحت مكيال بل يضعونه فوق المنارة لكي يضيء لكل
إنسان . هكذا ليرى الناس أعمالكم الصالحة ويمجدوا أباكم
الذى فى السموات . يشوفوا الأعمال ويمجدوا صاحب
النور . علشان كده الرسول يقول أعمال الظلمة وبخوها .
فيه أعمال اسمها أعمال الظلمة . لأن الأمور الصادرة
منهم سرا ذكرها من العار . ما أقدرش أقولها . ده
الرسول بولس بيقول كده . لا تشتركوا معهم فى أعمال
الظلمة بل بالحرى وبخوها لأن الأمور الصادرة منهم سرا
ذكرها من العار . وطبعاً دى أعمال الظلمة وحشة . دى
مش مسيرة القيامة وفى العهد القديم حزقيال كده يمكن
قلبه بيقوله : ليه ربنا قاسى شوية على الشعب ؟ قال له
ربنا تعال وأنا ها أوريلك اللى بيعملوه كهنة إسرائيل
وعمل له خرم فى الحيطه كده وقال له بص من الخرم ده
فوجد كل الرجاسات .. ما هى أوضة مقفولة ما لهاش
شبابيك ولا فيها نور . وكهنة إسرائيل موجودين .. فشاف
كل الرجاسات وكل النجاسات . فقال له شفت ماذا يصنع
كهنة إسرائيل فى الظلام ؟! قال لكن هم قدامنا كويسين .

قال له لكن أنا بحاسبهم على الأعمال اللي بيعملوها في
الظلمة . علشان كده بيقول عن ربنا إن عينيه بتخترق
أستار الظلام . وإن شعب إسرائيل في فترة خطيته كان
يقول في سفر أشعياء إن الله لا يرانا . يعنى يعمل الخطية
ويقول الله لا يرانا . لكن يوسف الصديق وهو مع امرأة
فوطيفار قال لها إزاي أصنع هذا الشر العظيم وربنا
شايفنى وأخطىء إلى الله !!؟

أبناء النور

فأولاد النور اللي ماشيين في مسيرة القيامة
بيعيشوا وبيعملوا أعمال النور .. يهربوا من أعمال
الظلمة .. أعمال الظلمة اللي بتتعمل في الظلمة اللي الناس
تبقى نظيفة من بره لكن ممكن الظلمة تكون مالية من
جوه. علشان كده ربنا طلب منا وقال أنا عايز القلب النقي
" طوبى لأنقياء القلب " لأن دولت القلب بتاعهم يبقى عنده
بصيرة روحية يستطيع أن يعاين الله . فالأعمال .. أعمال
الظلمة ما يصحش تليق بأولاد النور اللي ماشيين في

مسيرة القيامة . ممكن مش بس القلب يظلم .. لكن ممكن
الجسد كله يظلم . قال ربنا يسوع أولاد ربنا يتغذى
جسدهم على النور .. أولاد الظلمة يتغذى جسدهم على
الظلمة " سراج الجسد هو العين " .

سراج يعنى المصباح اللى بينور . فإذا كانت
عينك مظلمة أو شريرة فجسدك يكون كله مظلماً . دى
حاجة خطيرة جداً بينبهننا ليها المسيح . إن الجسد كان
ممكن ينور وفعلاً نور جسد القديسين وكثير من القديسين
أو الكنيسة حتى اصطلحت إن أى قديس ترسم له هالة
نور حوالين رأسه زى ما إنتم شايفين من الصور
الموجودة على حامل الأيقونات.

فسراج الجسد هو العين . إذا أظلمت العين
فالجسد كله يكون مظلماً .. فأرجو إن إحنا نأخذ الأمور
دى بجدية .. لأن إحنا فى القيامة مدعوين لمسيرة القيامة
اللى هى مسيرة النور . مسيرة القيامة عمرها ما كانت
مسيرة ظلمة.

أما يوحنا الحبيب فيؤكد على موضوع خطير جداً
آخر .. ليس الجسد فقط لكن يقول هناك أعمال اسمها
أعمال النور اللى هى المحبة . والذى لا يعمل أعمال
المحبة فهو فى الظلمة. والظلمة أعمت عينيه ولا يعلم أين
يمضى .

أعمال المحبة . أعمال النور .. اللى ماشيين فى
مسيرة النور .. مسيرة القيامة عليهم إنهم يعملوا أعمال
المحبة لكن إذا دخلت عدم المحبة فى القلب ماذا يقول
الرسول يقول : " أيها الإخوة نحن قد انتقلنا من الموت "
للحياة (للقيامة) .. علشان إيه قال لأننا نحب الإخوة ..
لأننا نحب الإخوة .. مش هو النور الذى جاء إلى العالم
والظلمة لم تدركه !! ونحن مسيرة النور .. فأحنا أولاد
للنور .. علشان كده الرسول يرجع ويقول تانى : " الذى
لا يحب لا يعرف الله " ده على طول كده ! قال آه لأن
الله محبة والله نور . يعنى أنا عايز الصورة دى ما
تروحش من ذهنك. إحنا فى مسيرة القيامة اللى هى

مسيرة نور . مش ممكن أبدا مسيرة القيامة تبقى مسيرة
ظلمة . مسيرة القيامة مسيرة نور .. أعمال نور ..
جسد منور ، عين منورة .. قلب منور ، حياة
مضيئة . ده الكنيسة بتقول على الصليب بتاع ربنا يسوع
المسيح إن هو الخشبة التى أوقد عليها المصباح الذى هو
ربنا يسوع المسيح . يعنى ربنا يسوع المسيح قعد ينور
على الصليب زى الشمعة اللى بتتحرق للغاية لما أسلم
الروح . ولغاية النهاردة ده تعاليم الصليب ومبادئ
الصليب وحب الصليب .. بذل الصليب .. وتضحية
الصليب هى اللى منورة العالم .. إن اتكلموا عن المحبة ما
عندناش غير الأذرع المفتوحة .. إن اتكلموا عن التسامح
فى أجمل صورته .. فى صورته النيرة جداً يبقى المسيح
وهو بيقول يا أبته اغفر لهم لأنهم لا يعلمون ماذا
يفعلون . إذا اتكلموا عن الحب .. " هكذا أحب الله العالم
حتى بذل ابنه الوحيد " .

فالكنيسة بتاعتنا بالروح القدس لقطتها كده وقالت
الصليب هو الخشبة التي أوقد عليها المصباح الذي هو
ربنا يسوع المسيح لكي ينير العالم كله .
فدى أعمال النور اللي أولاد النور يعملوها
علشان يسيروا فى مسيرة القيامة .

أعمال الظلمة :

لكن أيضاً ليس النور كله أعمال .. لكن النور
أيضاً أفكار . فسألوه إيه اللي بينجس الإنسان لما كانوا
بيكلموه على أنواع الأكل وبتاع ؟ قال لهم ليس ما يدخل
الفم ينجسه لكن الذى يخرج . قالوا له بيخرج إيه ؟ قال
لهم من القلب تخرج أفكار شريرة ونجاسة وحسد وقتل ..
أفكار . والأفكار دى يا أحبائى تظلم القلب ، وتخليه يعيش
فى ظلمة كاملة ، ومش هاكون مُبالغ لو قلت إن الظلمة
دى أكثر قوة من الظلمة الحقيقية . يمكن الظلمة الحقيقية
يقدر الواحد يمشى فيها كده . شويه يلطش يعنى .. لكن
ظلمة الأفكار لما تسبطر على الإنسان مش ممكن أبدا

يعرف يتحرك شمال ولا يمين .. ظلمة .. ظلمة يعنى فى القلب . قلب ما فيهبوش محبة .. ربنا يبقى عايش فى الظلمة .. قلب ما فيهبوش محبة الناس ، قلب مرتبك بهموم العالم .. أقول أكثر من كده رغم إن بيقلولوا قال الناس يعنى بتنتقل لعصر فيه علم أكثر .. وفيه فهم أكثر .. لكن طبعا الحاجات دى مالهاش دعوة بالعلم أبداً . كثير حتى من الناس المتعلمين بيامنوا بأفكار الحسد ويقول لك فيه عمل معمول . وراحوا وطلعوا ولقوا حاجات مكتوبة . طبعا ما هو لازم يلاقوا حاجات مكتوبة .. قالوا لا لقوا حاجات مكتوبة ما كانش حد قال لهم . طبعا وهى دى كثير على الشيطان يعنى إنه يطلع حاجات مكتوبة ما حدش قال لهم عليها .. ما هى حاجات من ماضى الإنسان ما فيش واحد ما سمعتش لغاية النهاردة واحد سألوه على العمل ده وراحوا طلعوا له العمل ده إلا لقوا فيه عمل . ما فيش مرة واحد راح وما لقوش فيه عمل .. وما فيش واحد راح وما لاقوش فيه كتابة .. وحاجات حصلت .. حاجة عجيبة جداً ! أدى أعمال ، أدى أفكار ظلمة أيضاً .

أمال أفكار النور تكون إيه ؟.. أفكار النور تكون
نور المسيح منور القلب .. نور الإيمان .. نور الثقة في
محبة ربنا .. نور الثقة في كلماته .. في الكلام اللى هو
قاله .. أورى لك النور يدخل القلب إزاي .. كلام ربنا
ينور القلب .. ده يقول عنه الكتاب المقدس إنه يعلم
الجهال .. يعلم الجهال . ويرجع تانى في نفس المزمور ..
ويقول سراج لرجلى كلامك ونور لسبيلى .. يعنى رجلى
خطت خطواتها على نور كلمة ربنا ؛ وسراج لرجلى
كلامك ونور لسبيلى . إنت النور بتاعى ياربى يسوع ..
وكلمتك هى النور .. فسيروا في النور ما دام لكم النور ..
لكن أفكار الظلمة وحشة .. الحقد يظلم القلب والغىظ ،
والزعل على خسارة في العالم .. العالم يمضى وشهوته
تزول . وأعمال الظلمة وأفكار الظلمة اللى حكيت لك
عليها . ده فيه ساعات الواحد من وحاشته يفكر في زميله
أو أخوه فكر هو أصلاً مش موجود فيه يكبره جوة مخه ،
والظلمة تملا عينه ، ويروح منك وما ينامش طول الليل
ويقعد يفكر ، ويمكن زميله ما يفكرش في الموضوع ده .

لا جرى منه حاجة .. لكنه فكر ظلمة . مسكين الإنسان
اللى ما اتعلمش أفكار المسيح . علشان كده بولس
الرسول يقول : " أما نحن فلنا فكر المسيح " .. فكر
المسيح ده . هل ممكن تتخيل معايا إن فكر المسيح ده
دخله شر ؟ .. دخله أفكار شريرة ؟ . دخله أفكار كراهية ؟
ودخله أفكار محبة العالم ؟ .. دخله أفكار شيطان ؟!
أبدا ده يقول " رئيس هذا العالم أت ولكن ليس له فى
شئء "

فلاحظ يا عزيزى مسيرة النور .. مسيرة القيامة .
إنت ابن النور فتعمل أعمال النور . نمرة (٢) تعتمد على
كلمة ربنا . لأن كلمة ربنا مخطوطة مخصوص علشان
تنور لينا الطريق وتنور القلب .. طب واللى يهمل كلمة
ربنا ؟! هو حر . ها يعيش فى الظلمة إذا كان قال "سراج
لرجلى كلامك " .. ببقى اللى مش ماشى حسب وصية
الإنجيل ببقى ده هو ماشى فى الظلمة . إحنا كلنا مختارين
يا أعزائى .. وبنسأل أسئلة كثيرة . ياترى ده صح ولا
غلط ؟ ده صح ولا مش صح ؟ والعمل اللى عمله فلان

ده صح ولا غلط ؟ .. وحاجات كتيرة يعنى الواحد مش مستريح . آمال يستريح إزاي ؟ قال بكلمة ربنا .. بالإنجيل كل حاجة ها تلاقيها فى الإنجيل .. وها تلاقى طريق النور واضح زى الشمس .. وتلاقى الظلمة بينبhek منها علشان ما تتعثرش رجليك بيها . فاللى يهمل كلمة ربنا بيضل مسيرته .. بيضل المسيرة بتاعته .. وإحنا يا إخوتى أولاد النور .. ومدعوين لنسير فى النور .. والمسيح نور العالم . وإحنا جايين علشان نكمل المسيرة دى وننور للعالم أيضا .

ويحملنا المسيح المسئولية دية . وزى ما أنا نور العالم . أنا إديتكم النور علشان إنتم كمان تكونوا نور للعالم .. كونوا نور للعالم .

أيضا مسيرة النور مسيرة القيامة .. مسيرة رجال الصلاة اللى حياتهم منورة . إذا كانت كلمة ربنا بتتور القلب وبتتور الطريق وبتترشدنا . الصلاة عبارة عن وقفة قدام مصدر النور .. والوقوف قدام مصدر النور لازم يعكس النور فى حياتنا ، وأديك مثل عملى : موسى لما

وقف قدام ربنا على الجبل نزل فالشعب قال له مش
قادرين نشوف وشك .. قال لهم فيه إيه جديد فيّ ؟ هو
مش حاسس . قالوا له وشك منور زي الشمس . قال لهم
طيب أحط برقع .. حط برقع واثنين وثلاثة وسبعة . قالوا
له برضه مش عايزينك تكلّمنا خلى هارون يكلّمنا لأن
النور اللي جاي منك نور شديد .. نور كبير جداً ، ما
يقصدش نور مادي ، لكن هو نور النعمة الإلهية .. اللي
هو واقف قصاها . لذلك يا أحبائي عندما ظهر موسى
وايليا مع المسيح على جبل التجلي . كان ربنا يسوع
المسيح في حالة تجلي بتاعته مكشوف منور . وكان
موسى وايليا معه يظهران بمجد عظيم . فكانوا كمان
واخدين من النور اللي جاي مع المسيح منه .

اطمئن وافرح جداً إن إحنا حياتنا في الأبدية ها
تكون حياة نور ، بيقول لك في سفر الرؤيا " لا تكون
شمس " مش ها يكون فيه شمس فوق لأن المسيح هو
شمس البر ، هو نور الحياة الأبدية بتاعتنا .. هو نور

حياتنا . فالصلاة فى الواقع طبيعة أولاد النور اللى
ماشين فى مسيرة النور .

لأجل هذا ياأحبائى سيروا فى النور ، وقفوا كثير
قدام النور يشع النور فيكم . يعنى المزمور بيقول إيه ؟!
"بنورك يارب نعاين النور"

اشرح لى الآية دى . النور يجى علينا كده يقوم
يفتح قلبنا وبصيرتنا وعينينا .. نقوم نشوف النور .
فالوقفة قدام ربنا تحكم الإنسان وتثور ذهنه وتنور فكره
وتنور جسده وتنور حياته .. وتجعله ابن للنور . فإحنا
مطالبين كأولاد للنور علشان نسير فى مسيرة القيامة دية
أن يكون لنا أعمال النور ، ويكون لنا فكر النور الذى
فى المسيح يسوع فى كلمته الحية وتكون لنا حياة النور فى
وقفنا قدام ربنا .

لإلهنا المجد دائما أبدياً أمين



خمسبة الأحد الخامس من الخماسين المقدسة

بكره ينتهى الأسبوع الخامس من الخماسين المقدسة ، ويبدأ الأسبوع السادس ويبقى فاضل أسبوعين وتنتهى الخماسين.

الأسبوع السادس اللى هو يبتدى من أول بكره ها تبتدى نستعد فيه لصعود ربنا يسوع للسماء . فالقراءات كلها ها تكون عن الصعود . وأنا ماض لأعد لكم مكانا، وإن مضيت وأعددت لكم مكانا أتى وأخذكم وحيثما أكون أنا تكونون أنتم . وأنا هو الطريق.

والأسبوع الأخير طبعاً ها يكون الكلام عن الروح القدس . الحقيقة إحنا لو حيينا نقيّم الفترة اللى فاتت دية من أول عيد القيامة .. نجد إن الكنيسة كانت بتفتح لنا مفاهيم جميلة وحلوة عن القيامة وكيف نختبرها ونعيش القيامة الأولى فى حياتنا .. وآخر أحاديثها تنتهى النهاردة . أو فى بكره باكر . بعد كده تبتدى الكنيسة تتكلم عن الصعود . سمعنا كثير عن القيامة وإحنا بنختمها النهاردة أو من يوم

الجمعة اللى هو إمبراح .. عشنا مع القيامة فى قيامة ربنا وفى دخول ربنا والأبواب مغلقة .. وعشنا مع القيامة فى جسد الرب ودمه والثبات فيه .. وعشنا مع القيامة فى حياة الحرية اللى عاشتها المرأة السامرية .. والأحد اللى فات كان بيكلمنا عن القيامة كأولاد النور اللى يعملوا أعمال النور اللى اتملى قلوبهم من المحبة .. دولت اسمهم أولاد القيامة .. أولاد النور.

بإختصار الكنيسة فى الفترة دى كلها .. قعدت تعلمنا بطرق مختلفة عن مفاهيم القيامة فى أسرارها وفى تعاليمها وفى كيف نختبر القيامة . فعلا علشان تكون حياتنا مستترة مع المسيح فى الله . لغاية لما جه المسيح فى الآخر خالص أو الكنيسة أعلنت لنا القيامة فى أبهى صورها وفى ختام الصور دى بتقول إيه ؟ .. اللى كان بيحصل فى أيام الأربعين المقدسة واختبار التلاميذ عن القيامة كان بيحدث بظهور المسيح شخصيا لهم .. يعنى الخوف كمرض فى حياتهم .. يدخل المسيح والأبواب

مغلقة ينطرد الخوف منهم .. يتحول الحزن لفرح .
فالقيامة ارتبطت في ذهنهم بظهورات المسيح.
المسيح النهاردة في ختام القيامة يقول لهم لا ..
ده الناحية الضعيفة اللي كنت بأكلكم عنها قبل كده ..
حتى إنت يا توما القيامة بالنسبة ليك اللي ضيعت الشك لما
أنا ظهرت لك .. لكن فيه ناس هاتآمن من غير ما
تشوقنى . طوبى لمن آمن ولم ير . قمة القيامة وقمة
اختباراتها وختامها أيضا هو حديث الليلة دى وحديث
إمبارح .

بيتكلم ربنا عن الحب الإلهى . يقول الذى
يحبنى .. إيه .. هى القيامة ؟ .

القيامة اللي نعرفه .. إن المسيح قام بجسد
نورانى وإن على قدر ما كان الإنسان بيقترب من
الإلتصاق بربنا كلما كان بيعيش القيامة ، بيمارسها
لدرجة إن معلمنا بولس الرسول مرة فى تعبيراته يقول كده
"الجسد ليس للزنا بل للرب والرب للجسد ، والذى أقام
الرب من الأموات سيحيى أجسادنا بروحه الساكن فينا" .

عاوز يقول إن ربنا لما أخذ جسد كان علشان يلتصق بينا
علشان إحنا نكون لربنا ، وربنا يكون لينا . وزى ما ربنا
قام من الأموات ، هذه القوة بتاعة القيامة تقيمنا نحن
أيضاً من الأموات.

تقدر تفهم من كلام بولس الرسول إنه عاوز يقول
إن أعلى درجات القيامة هي الالتصاق بالله اللى إحنا
بنسميه الإتحاد بربنا .. طبعاً ده اتحاد يفترق عن اتحاد
الطبيعة الإلهية فى الثالوث الأقدس . لكن مراحم ربنا
الواسعة هي اللى نزلته وأخذ جسد وبقي إنسان مننا.
والكلمة صار جسداً وحل بيننا ، فابتدأ المسيح وده كان
إنجيل يوم الجمعة امبارح بتاع القداس بيقول كده أيها الأب
أنا عاوز أدوقهم القيامة . طب تدوقنا القيامة إزاي؟. قال
أول حاجة عاوز أوضحها لهم إيه هي القيامة إن هم
يكونوا واحداً "ليكونوا واحداً كما أننا نحن واحد". يعنى
هم يبقوا زى ما إحنا واحد . أنا فيهم وإنّ فى لكى يكونوا
مكملين إلى واحد وليعلم الجميع أنك أرسلتني وأنا أحببتهم

كما أحببتى. فأعلى درجات اختبار القيامة هي الآية دى
اللى بيقولها "إن أنا عاوزهم يكونوا واحداً فينا".

وكلمة واحد دى كان ممكن تعدى ببساطة لولا
الكلام الأصعب اللى اتقال بعدها "إنى أريد أن هؤلاء
يكونوا واحداً فى كما أننا نحن واحد". . يعنى عاوز يقول
له : " أيها الأب الوجدانية اللى ها تديها لأولادى
المسيحيين دولت ليس لها نظير ولا مثال ولا تشبيه ولا
تفسير فى قدرة الإمكانيات البشرية . لكن ده سر لاهوتى
عميق .. كما أننا نحن واحد . طبعاً المسيح لما يقول للأب
كما أننا نحن واحد ده موضوع إحنا ما نفهموش . لكن
تقدر تحس إن هدف ربنا من القيامة إن هو عاوز يوصلنا
للوجدانية دى . والدليل على ذلك إن ارتباط ربنا
بوحدانيته بينا .. بإتحاده بينا مش ارتباطنا إحنا بإتحادنا
بيه. سيبك مننا إحنا إن هو صعد للسماء بنفس الجسد اللى
أخذه منى .. مننا .. وسيظل إلى أبد الأبدى بهذا الجسد
كلمة الله الذى صار جسداً معلناً إن الاتحاد بدون انفصال
إلى أبد الأبدى . محبة منه فى . عايز يقول لى إن القيامة

دية مش هي المعانى البسيطة اللى أنا عرضتها ليك فى الحاجات اللى فانت .. لكن لما أنت تبقى واحد فى .. ها تكون إنت فى قيامة مستمرة.

علشان كده اللى يقرأ رسائل بولس الرسول يقدر يتلمس المفاهيم الجميلة دى يقول مثلاً "حاملين فى أجسادكم كل حين اماتة يسوع لكى تظهر حياة يسوع فى أجسادنا". يعنى كلمة كل حين دى تديك فكرة على إن إحنا ها نعيش فى الموت بتاع يسوع والقيامة بتاعة يسوع كل حين .. يعنى كل وقت وكل حين أو كل وقت يعنى إحنا غير منفصلين عنه . ويبقى المفهوم اللى عايز يوصله لينا بطريقة بسيطة .. لو أخذنا المعنى الكلى إذا كناش إحنا متحدين فى الله يبقى إحنا ميتين . وده صح.

إيه هو الإنسان من غير ربنا ؟!! يساوى إيه ؟ ما يساويش أكثر من حفنة تراب اللى اتأخذ منها .. ساعة آدم لما انفصل عن ربنا كان يساوى إيه ؟. ولو إن آدم ما وصلش للدرجة اللى إحنا وصلناها ، آدم ربنا خلقه على صورته ، نفخ فيه نسمة حياة وكان على صلة بالله من

ناحية طاعته وثباته فى وصاياه . لكن إحنا وصلنا لدرجة
تانية : إن المسيح جه أخذ الجسد بتاعنا وإدانا الجسد بتاعه
فإحنا أصبحنا فى حالة من الوجدانية خطيرة جداً .. بحيث
إن الدرجة التى أعطيت لنا فى عهد النعمة فى شخص
المسيح لايمكن أن يعبر عنها.

فالمسيحى النهاردة مش عايز يسمع موضوع عن
القيامة .. ده موضوع يسمعه الناس السطحيين . القيامة
فى مفهومها العميق هى الثبات فى الله. اثبتوا فىّ علشان
كده إحنا اتكلمنا كتير على إن التناول هو الثبات فى ربنا.
الثبات فى ربنا يعنى القيامة " من يأكلنى يحيا إلى الأبد".
اتكررت كلمة الوجدانية دى كتير . ليكونوا واحداً فىّ كما
أنا نحن واحد ، وليعلم الجميع أنك أرسلتتى.

أيها الأب العالم لم يعرفك .. وأنا عرفتهم اسمك
وهم عرفوك .. فالنقطة الأولى ياأحبائى اللى ببساطة
خالص نقدر نفهمها : الوجدانية فى الله هى دى القيامة
بعينها.

إذا كنا احنا فى نهاية الأربعين المقدسة النهاردة بنقول إيه
الى احنا أخذناه من المسيح النهاردة ؟ إيه الحصلة
بتاعتنا؟.. تقول لى الثبات فى الله .. الثبات فى الله هو
الحياة .. هو القيامة . والإنفصال عن الله هو الخطية.
ولو جيت تعرف الخطية هى إيه . تقول هى الإنفصال عن
ربنا.

شوف بقى قد إيه آبائنا القديسين كانوا حريصين
إن هم يتفننوا بصلوات مختلفة زى صلاة يسوع .. يا ربى
يسوع ارحمنى .. وهم مترنمين .. فى كل وقت . كان
اسم ربنا على لسانهم باستمرار ، وكان فكرهم منشغل ..
كانوا فى نومهم وفى صحيانهم وفى غدواتهم وفى
خروجهم دائماً ملتصقين بربنا . دى معناها إيه ؟ إنهم
كانوا فى حالة قيامة مستمرة . دية عايزة عملية تفريغ
بحيث إن الإنسان يتفك من كل الرباطات اللى فى العالم
ويصبح ملتصقاً بالله وهو فى وسط العالم .. عاوزة نضج
روحى .. إن الإنسان يحس إن حياته هى فى الله . وإن
مالوش حياة بعيدة عن ربنا وإن الخطية هى لحظات

انفصاله عن الله . وإن القيامة هي وحدانية مع ربنا ..
دى النقطة الأولانية التى تختم لنا بيها الكنيسة مفهوم
القيامة.

النقطة الثانية : القيامة زى ما كنت بأقول لك .. القيامة
هى ظهور ربنا للتلاميذ وهم قاعدين . إنهم يعرفوا
المسيح قام إزاي ؟ كانوا قاعدين جوه الأوضة بتاعتهم
قافلين الأبواب .. بصوا لقوا المسيح دخل والأبواب
مقفولة .. لاقوه قام من الأموات . آهى دى القيامة.

اسمع إنجيل العشية بيقول كده اللى عنده وصاى
ويحفظها هو الذى يحبني ، والذى يحبني يحبه أبى ، وأنا
أحبه وأظهر .. وأظهر له ذاتى . أحياناً إحنا بنغلط ونقول
إن إحنا ها نقف قدام ربنا . لأ .. ده إحنا بنقف وربنا
بيظهر ذاته لينا .. آمال إحنا بنعمل إيه ؟ الذى يحبني يحبه
أبى وأنا أحبه وأظهر له ذاتى .. لاحظ إن القيامة كانت
ظهورات ما كانتش عشره مع ربنا .. كانت ظهورات
يعنى ما كانتش واحد يدور على ربنا ويقولوا هو فين
النهاردة .. ظهر فين ؟ يقولوا هو ظهر فى البيت الفلانى ،

عند فلان .. يقوم الناس تجرى جرى تروح البيت الفلاني
تلاقى المسيح موجود .. لا .. ما كانش كده .

ده تلميذا عمواس كانوا ماشيين فى السكة ..
بصوا لقوا التالت معهم ، لقاهم بيفكروا فيه كثير كثير
ومشغولين بيه . أظهر لهم ذاته ، آهى دى القيامة ..
التلاميذ كانوا مشغولين بيه جوه العلية والأبواب مغلقة
أظهر لهم ذاته .. التلميذ الذى كان يحبه يسوع كان مع
بطرس بيصطادوا وقلبه مليان حب للمسيح ، فأظهر لهم
ذاته وهو بيصطاد .

فالقيامة فى مفهومنا المسيحى هى ظهور الله
للتلاميذ .. احنا التلاميذ طب بيظهر لنا ربنا إزاي ؟ قال
أهو المفتاح أهو .. الذى يحبني يحبه أبى وأنا أحبه
وأظهر له ذاتي" ما هو إحنا ياربى عايزين نعيش القيامة
وعايزين تظهر لينا نفسك بإستمرار .. أكثر من كده واحد
سأله يهوذا الإسخريوطى وقال له : ياسيد ماذا حدث حتى
إنك مزعم أن تظهر لنا ذاتك . وطب ما إنت واقف معانا
وليس للعالم . شوف الآية تظهر لنا ذاتك وليس للعالم .

يعنى المسيحية دى مش مجرد فكرة أو فلسفة أو اقناع
عقلى تقنع بيه إنسان .. ده ظهور الله للإنسان . فيقول
له ماذا حدث أنك تظهر لينا ذاتك وما تظهروش للعالم .
أجاب يسوع وقال لهم : " من يحبني يحفظ كلامي وأبى
يحبه وإليه نأتى وعنده نصنع منزلاً . ومن لا يحبني فلا
يحفظ كلامي " ده مش بس يظهر ليه ذاته ده إحنا وصلنا
لنقطة أعمق من كده كمان . ده احنا وصلنا لنقطة إن هو
الأب و الإبن والروح القدس بيحي ويصنع منزلاً . وكلمة
يصنع منزلاً يعنى يصنع إقامة . إقامة دائمة يعنى يصنع
إقامة دائمة فى القلب . فالنهاردة القيامة ها تبتدى تأخذ
المفهوم اللاهوتى العميق اللى الكنيسة عايزة توصلنا ليه
فى الآخر . إحنا مش بنتكلم على النظرية .

يسوع أمس و اليوم و إلى الأبد و ظهوره للتلاميذ هو
هو .. ولغاية النهاردة يظهر .. طب النهاردة يظهر إزاي؟
إنت نسيت إن هو قال زمان .. إن هو القلب النقى يظهر
له "طوبى لأنقياء القلب لأنهم يعاينون الله" .

النهاردة بيتكلم على إن القيامة دى وحدانية فى ربنا . طب إزاي ده هو فين ربنا اللى أنا شايفه ؟ . قال زى ما ظهر زمان والأبواب مغلقة يظهر النهاردة . طب ويظهر إزاي ؟! قال يخش جوه القلب .. قال له إزاي ؟ قال له : " اللى يحبني يحبه أبى وأنا أحبه وله أظهر ذاتى. ياريت بيتدى المفهوم ده يكبر فى ذهننا إن الله يظهر لنا فى كل حنة .. يظهر لنا فى الطريق .. وإحنا مروحين من الشغل ، حاجة عجيبة قوى أنا أعرف مثلاً إنه يظهر فى الكنيسة .. يظهر فى المخدع وإحنا بنصلى. قال لا .. يظهر وإحنا راجعين من الشغل إزاي ؟ قال إذا كنا ماشيين فى السكة بنتكلم عن يسوع ومشغولين بيسوع تبص تلاقيه بيحى يظهر ذاته زى ما ظهر لتلميذى عمواس .

يظهر لنا فى أثناء العمل زى ما ظهر لهم وهم بيصطادوا السمك . لأن هم كانوا يحبوا يسوع .. يظهر لنا وإحنا مجتمعين من أجل اسم المسيح زى ما ظهر ليهم وهم فى العلية .

فاصبح دلوقتى مفهوم القيامة هو ظهور الله لنا.
يظهر ربنا لنا وييجى يعمل منزل ، وإقامة دائمة عندنا.
طب إيه اللى إنت عاوزه منا يا رب ؟ قال لا .. أبدا..
الذى يحبني يحبه أبى وأنا أحبه وله أظهر ذاتى". طب
عاوزين نحبك . قال تحبوني ! قال ده أنا طلبت هذه
لطلبة ، طلبتها فى صلاتى الوداعية وقلت كده " أيها الآب
أنت أرسلتني وأنا أحببتهم كما أحببتني". ومن هنا تقدر
تدرك الدرجة اللى ربنا حبنا بيها ، ما حبناش شوية كده
ولا كده ولا كده ، ده حبنا كما أحببتني.

إذا ما كانش مجرد حب زى ما واحد منا بيحب
واحد . لأ .. ده كان بيفرغ فينا روح الحب .. اللى هو
روح الآب فينا . علشان كده أنا كنت بأكلمك على أن
المفاهيم النظرية ابتدأت تُعطى لنا فى المسيحية مجسمة..
يعنى مثلا المسيح عايز يدينا ذاته يقول " خذ كل " .. عايز
ياكلنا الحب .. عايز ياكلنا الوداعة .. عايز ياكلنا
المحبة .. عايز ياكلنا ذاته. فالروح القدس هو روح
الحب .. فما دام بيتكلم على الحب ، يبقى يقصد إنه يسكب

فى قلوبنا نوع من الحب .. مش أبداً له مثيل فى العالم ..
ولا هو مجرد الإنفعالات البشرية . وقال معلمنا بولس
الرسول فى رسالته لرومية " إن الضيق ينشئ صبر
والصبر تركية والتزكية رجاء والرجاء لا يخزى لأن
محبة الله قد انسكبت فى قلوبنا بالروح القدس " .. يبقى لما
بيقول له أنا أحببتهم كما أحببتى . صحيح هو بيقدم ذاته
وبيقول إذ كان قد أحب خاصته الذين فى العالم أحبهم إلى
المنتهى . ده جه كاسر نفسه .. وعلى رأى مقالة لطيفة
كنت بأقرأها الأسبوع ده لطيفة جداً ، يقول لك المسيح
وهو كان بيكسر جسده ويقدمه ، كان بيقدم القيامة نفسها .
لأنه كان حى ، لأن المسيح الحى كان بيكسر ذاته . يمكن
لو إنت بصيت لها على الصليب ها تقول ما هو مات على
الصليب . قدم ذاته ومات على الصليب علشان كده
الكنيسة بتاعتنا تركز على القيامة كقوة للصليب . ولأن
الصليب من غير القيامة كان ها يبقى مجرد إن المسيح
مات من أجلنا . لكن لأن المسيح كان بيكسر جسده
المكسور ودمه المسفوك يبقى كان بيعطى القيامة .. وهو

كان بيكسر ذاته فى نفس الوقت .. "اذا كان قد احب خاصته" يبقى دى كانت أقصى درجات الحب .. وهو قائم ابتداء يقدم ذاته وهو مكسور، وسفر الرؤيا اتكلم على الحنة دى قال : خروف قائم كأنه مذبوح .. يعنى لا هو مذبوح. مذبوح لكن مش ميت . مذبوح ومكسور شافه سفر الرؤيا قائم كأنه مذبوح . يعنى مذبوح لكنه قائم.

فالحب اللى أداه لنا ربنا مش مجرد انفعالات عاطفية زى اللى بنحب بعضنا بيه دى ، ولكن محبة بالروح القدس انسكبت فى قلوبنا وكانت أقصى درجاتها إن هو يكسر ذاته ويعطينا "وأنا أحببتهم كما أحببتى".

يعنى إيه كما أحببتى ؟ هو إحنا ها نبقى زى ربنا ؟ قال لا كما "أحببتى" لأن روح الحب .. روح القدس هو اللى أعطى لنا . لأن محبة الله انسكبت فى قلوبنا بالروح القدس . فهو إحنا أخذنا من الحب . مش من الحب بتاع العالم اللى بيتكلموا عنه أوالحب بتاع الأب لابنه .. والأم لبناتها .. والأخ لأخوه .. أو الزوج لزوجته .. الحب ده .. لا .. ده هو بيقدم الحب اللى أحببتى به .. يعنى الروح

القدس .. لأن محبة الله قد انسكبت في قلوبنا بالروح
القدس . أيها الأب قد عرفتكم اسمك وسأعرفهم كمان ..
ليكون فيهم الحب الذي أحببتني به وأكون أنا فيهم.

فالوحدانية التي بتكلمنا عليها .. التي هي المظهر
الواقعي الكبير بتاع القيامة التي بتقدمه لنا الكنيسة يبقى
عن طريق انسكاب حب الله في قلوبنا . أحببتني ليكون
فيهم الحب الذي أحببتني به.

الروح القدس روح الحب والمسيح روح السماء
وبعت لنا روح الحب ، وسكبه في قلوبنا ينابيع الحب
الإلهي للمسيح . الذي يحبني .. التي يفتح قلبه ..
ويستجيب لعمل الروح القدس أحبه وأظهر .. وأظهر له
ذاتي . آهية القيامة آهية مرة ثانية . والتي يحبني .. أبي
يحبه وإليه نأتي وعنده نصنع منزلاً ، ومن لا يحبني
لا يحفظ كلامي.

يبقى القيامة هنا ها تبقى ثمرة الحب الإلهي،
وظهور ربنا لنا . لكن احنا لما نتكلم عن انسكاب حب
ربنا في حياتنا .. إحنا لازم قلبنا يكون مفتوح لهذا الحب..

إن إحنا نلقطه ونستجيب ليه . إيه العلامة ؟ قال الذى يحبني يحفظ كلامي .. يحفظ الوصايا بتاعتي .. من عنده وصاياى وحفظها فهو الذى يحبني . يبقى دخلنا فى نقطة خطيرة جداً ، يبقى رؤية ربنا أو القيامة هي تنفيذ الوصية قال هي دي الحكاية كلها من أولها لآخرها . إن الله مستعد أن يسكب حبه ويظهر ذاته لينا علشان نتمتع بالقيامة ، ويكون له إقامة دائمة فينا ويكون فينا الحب الذى أحبه الأب بيه ونكون واحد فيه إن احنا نفذنا وصاياہ . قال من كان عنده وصاياى وحفظها فهو الذى يحبني . وكررها تاني .. من يحبني يحفظ كلامي وأبى يحبه .. وكررها ثالث وقال ومن لا يحبني فلا يحفظ كلامي . الكلام الذى تسمعونہ ليس لى بل للأب الذى أرسلنى . كلمتكم بهذا وأنا عندكم مقيم . فإحنا دلوقت موضوعنا القيامة هي تنفيذ وصية المسيح .

من هنا يا عزيزى ها تبتدى تتشوق بشدة ومش عاوز أقول بشدة .. بشراة .. إنك تنفذ وصية المسيح مهما كلفك لأن ها يظهر لك المسيح ، وها تكون واحد فيه

وها يصنع عندك منزل وها يسكب حبه فى داخلك وها تعيش القيامة بأعمق معانيها اللاهوتية اللى سعى من أجلها القديسون . ما تستغربش ليه القديسين اللى راح واحد زى الأنبا أنطونيوس علشان ينفذ وصية بمنتهى الشجاعة داس على العالم وباع كل ما ليه ورمى .. وقال لك أنفذ وصية. آه ده بيحب المسيح يستاهل إيه ده ؟ تقول لى يعنى يظهر له ربنا فوراً !!.

الذى يحبني يحفظ كلامى أظهر له ذاتى ، أكيد ربنا ظهر له وأخذه خطوة خطوة ومشى معاه لنهاية الطريق.

ونأخذ الآية من الناحية العكسية أيضاً " ومن لا يحبني لا يحفظ وصاياى ". واحنا الضعفاء الغلبة فى العالم كم مرة بنخالف وصايا ربنا . من أجل ذاتنا ومن أجل أطماعنا الشخصية ومن أجل إرادتنا ومن أجل حبنا للى لينا ومن أجل حبنا العاطفى ومشاعرنا وتحيزنا .. ومن أجل محبة العالم اللى بتعاكسنا ، نبتدى نخالف وصية تـمسيح . لكن ثق يا حبيبى إن وصية المسيح دى ثمنها

غالى جداً .. هى القيامة بعينها لأن الله سيعلن ليك ذاته
وسيصنع عندك منزلاً ، وسيظهر ليك ذاته وسيسكب حبه
فى قلبك وسيجعلك واحداً فيه كما هو واحد فى الأب . ده
هو مفهوم القيامة.

مشكلته إيه ؟ قال تحفظ الكلام بتاعى ومن لا يحفظ
كلامى مش ها يقدر يشوفنى ولا يشوف حبى ولا ها
يتمتع بالقيامة.

آخر كلمة عاوز أقولها علشان تكون ختام كلامنا:..
كان إيه ينفع صلب المسيح وتعذيب التلاميذ ويندفن وما
يتمتعوش بالقيامة !!؟ ما ينفعش حاجة . ده الفرحة
والبهجة حلت عليهم بعد القيامة .. لما المسيح أعلن ذاته
ليهم.

كمان إيه فائدة مسيحيتنا النهاردة وإحنا شايلين
الصليب وماشيين وراء المسيح وبنتألم فى العالم ، وأحياناً
نتهان كمسيحيين و.. الخ . وننفذ بعض وصايا.. الخ..
ونخالف .. وإحنا لغاية دلوقت ما اتمتعناش ببهجة القيامة
وقوتها . إيه فايدتنا ؟ إحنا وقفنا فى نص السلم بالضبط

مشينا نص المشوار وما كملناش ، لكن القيامة سهلة جدا
وظهور ربنا سهل للنفوس المشغولة بيه .. اللى بتحبه ..
اللى بتحبه هي اللى بتنفيذ وصيته.

أقول لك بعد الكلام ده .. وصية المسيح غالية
عندك قد إيه النهاردة ؟ تنفذها بكل قوتك ، بكل شجاعة
لأن ثمرتها كبيرة جداً تقول لى أنا بس كل الوصايا أنفذها
إلا دى . أقول لك أنت حر ها تضيع منك شىء كثير ، ها
تضيع منك بهجة القيامة وقوتها بمجدها وعظمتها .

دوس على كل شىء ونفذ وصية المسيح وهو ها
يظهر لك ذاته ويسكب حبه وتكون واحد فيه ، ويكون
نصيبك هو المسيح.

ولإلهنا المجد دائماً أبدياً آمين.



الأحد الخامس من الخمسين المقدسة

(يوا: ١٤-١١)

الرب يسوع هو طريق حياتنا

نحن الآن يا أحبائي فى بداية الأسبوع السادس من الخمسين المقدسة . ونحن نحتفل فى هذا الأسبوع بصعود ربنا إلى الأقداس السماوية . ابتدأت أحاديث الكنيسة تتحول لمعانى أعمق فى القيامة التى تكمل بصعود ربنا يسوع .

فالنهاردة اختارت الكنيسة هذا الفصل لكى يكون موضوع تأملنا طول أسبوع الصعود . أنا ماض للآب.. أنا ماض للآب بالمعنى البسيط السطحى واحد رايح مشوار .. يعنى الآب ساكن فى حته وهو فى حته وهو ها يروح المشوار ده "ماضى للآب" . ده المعنى البسيط السطحى الساذج . بسرعة فيلبس قال له طب قول لنا السكة إزاي علشان زى ما أنت عارف طريق المشوار

ده.. فأدينا احنا كمان الخريطة دى أو السكة دى علشان
احنا كمان نعرف نوصل للآب بتاعك اللى إنت بتحبه
وبتكلمنا عنه . فرد يسوع وقال يا للسذاجة يا فيلبس أى
طريق تسأل عنه ؟! هل هو طريق مادی .. أنا فى الآب
والآب فى ، من رأتى فقد رأى الآب . كيف تقول أنت
أرنا الآب ؟!!

هو أنا لما باكلكم عن الصعود افكرتم إن ده
طريق ممكن يتوصف ؟! أنا هأقولكم إيه قصة الصعود.
الصعود هو الإعلان الواضح الكامل اللى يؤكد حقيقة
القيامة . معلمنا بولس الرسول فى سفر العبرانيين الذى
تلى علينا فى هذا الصباح يقول : " فإذ لنا ثقة يا إخوتى
فى دخولنا إلى الأقداس بدم يسوع المسيح طريقاً كرّسه لنا
حديثاً بالحجاب أى جسده . فربنا يسوع المسيح كرّس لنا
طريقاً بجسده بدخوله إلى الأقداس.

إزاي الكلام ده لأن جسد المسيح القائم من
الأموات هو الكنيسة .. ونحن أعضاء جسده كقول الرسول
" من لحمه ومن عظامه " . فالمسيح رب المجد عندما

كرس لنا طريقاً بجسده أى بالحجاب حملنا فى جسده واكد
لينا ان هو رايع يكرس طريقاً بالجسد بتاعه ، لذلك
الكنيسة الملهمة بالروح القدس اختارت لنا هذا الفصل من
رسالة معلمنا بولس الرسول لكى تكشف لنا ما معنى كلمة
الطريق الذى يتحدث عنه ربنا يسوع المسيح.

انه كرس لنا طريقاً حديثاً . فجسد المسيح يا
أحبائى الذى قام من الأموات هو جسم الكنيسة واللى إحنا
بنقول عنه أصعدت باكورتي إلى السماء.

فالطريق ده اتكرس إزاي ؟ يعنى المسيح رب المجد
بالجسد بتاع الكنيسة أخذه ودخل الأقداس العلوية . ومن
هنا نكون قد عرفنا الطريق .. ليس الطريق مشوار أو حاجة
تترسم لينا ولكن الطريق هو المسيح ذاته لما حملنا فى
جسده وكرس لنا هذا الطريق برش دمه ودخوله للأقداس
العلوية . أما سفر رسالة معلمنا بولس الرسول أيضاً
للعبرانيين تذكرنا أيضاً بمفاهيم القيامة الأولى فنقول: فلندن
الآن بقلب صادق بيقين الإيمان قلوبنا مرشوشة نقية
ظاهرة من الخبث وقد غسلت أجسادنا بالماء النقي إتغسلت

الأجساد بتاعتنا بميه نقية ، إتغسلت بالمعمودية يعنى قامت مع المسيح من الأموات . لكن قيامة المسيح من الأموات ما كملتش بركتها لينا إلا لما وصل بهذا الجسد الذى أخذه منا . لذلك يا أحبائى أصبح معلوماً لينا فى اليوم اللى إحنا دخلنا فيه الكنيسة أننا يوم ولدنا من المعمودية يعنى يوم ما قمنا من الأموات " مدفونين معه بالمعمودية " .. حتى كما أقيم المسيح من الأموات نسلك نحن أيضاً فى جدة الحياة .

من يوم ما خرجنا من المعمودية ونحن نقول أننا ولدنا من السماء وأصبحنا أولاد السماء فى شخص المسيح ونقول أبانا الذى فى السموات . المسيح نزل من السماء مخصوص علشان ينقل البشرية الساقطة اللى بقى فيه حجاب بينها وبين الله .. ينقلها لنعمة البنوة ، مش يمشيها مشوار هو ده الطريق .

إزاي البشرية دية تقدر تقول لربنا يا أبانا ؟ فأول حاجة قال لهم لازم تدفنوا بالمعمودية وتقوموا قيامة جديدة وتلتحموا بجسدى ، وأنا ابن الله بالطبيعة وأنتم

تكونون أبناء الله بالتبني وتكون حياتكم المستترة في
هي الوسيلة الوحيدة إن أنتم تكونوا أولاد الله.

لذلك يا أحبائي عيد الصعود في الواقع هو عيد
الأبوة أو عيد البنوة .. العيد اللي إبتدا .. اللي وصلت
الباكورة للسماء .. اللي دخل المسيح بجسد الكنيسة طريق
كرس بجسده هو .. يعنى اللي دفع دمه على الصليب وهو
اللي أزال العداوة ، وهو اللي دخل الأقداس السماوية
حاملنا فيه .. من أجل هذا هو ده العيد بتاعنا اللي إحنا من
أجله إبتدينا الطريق بتاعنا من يوم ما دخلنا المعمودية.
علشان كده كان الرسول واضح لما بيتكلم عن الطريق قال
مغسولة أجسادنا بماء نقي.

أما سفر الأعمال فيحدثنا عن توبة بولس الرسول
(شاول) الذي كان يضطهد الكنيسة . وسفر الأعمال لما
يتكلم عن الكنيسة بيديها تعبير لذيذ جداً "وطلب رسائل إلى
دمشق إلى المحافظ حتى إذا وجد رجالاً ونساءً يسكرون
في هذا الطريق يسوقهم مسوقين إلى أورشليم". فأصبح
المسيحيون اسمهم أهل الطريق . إذا شافوا واحد مسيحي

يقولوا له إنت من الطريق .. طريق إيه ؟ .. يمكن افكروا
طريقة من طرق العبادة .. لأ لأن المسيح أكد إن هو
الطريق فالتلاميذ بتوعه أو المسيحيين أخذوا هذا اللفظ فى
حياتهم وقالوا إن إحنا أهل الطريق ، فأصبح المسيح هو
طريقهم وهم الطريق . فمسك الذين فى الطريق وراح
بيهم فربنا قال له أنا ها أوريلك الطريق يكون إزاي
يابولس . فمشى فى السكة وقال له لماذا تضطهدنى . قال
له أنا اضطهدتك ؟ قال له آيوه إنت اضطهدت الطريق
ودولت أعضاء جسدى .. وكل اضطهاد إنت وجهته لأى
إنسان مسيحى ده وجّه لى لأنى حاملهم فى جسدى .. ولما
قتلت استفانوس ورجمته كنت بترجمنى أنا .. إنت تعرف
ولادى دول أعزاء عندى قد إيه !! إذا كنتم على المستوى
البشرى اللى يمس ابنك بحاجة صغيرة تتضايق مضايقة
كبيرة كأنه مسك وأكثر . فإذا كنا إحنا مش أبناء .. ده
إحنا أعضاء فى جسمه . وإن البنوة بتاعتنا وإن كنا
صحيح بنتكلم عن البنوة الأرضية فدى مجرد حاجة تثير
لينا الطريق . لكن بنوتنا غربية وعجيبة وعظيمة ويقول

له .. أريد أيها الأب أن هؤلاء يكونون واحداً فى كما أنا
واحد فيك .. يكون فيهم الحب الذى أعطيتنى وأكون أنا
فيهم .. ويقول له " كما أنا واحد فيك خلينى أنا كمان أكون
واحد فيهم ... فهو يتكلم عن وحدانية وبيتكلم عن حب ليس
من مفهوم العالم .. مش مسألة إن احنا ها نبقى أولاده زى
مالينا أولاد على الارض .. دى بنوة متآخدة من بنوة
المسيح الأب .. وده موضوع أعلى من ادراكنا العقلى .
وده الوضع اللى أراد الله أنه يحط فيه الكنيسة وتكون
الكنيسة لما يصعد المسيح بيها تكون عن يمين الأب
ممجدة .. فظهر له وقال له إنت كنت ليه بتضطهدنى ؟
قال له ما اضطهدتكش . قال له صعب عليك إنك ترفص
مناخس .. وشاف النور وسمع كلام .. ولعل هذا النور
كان نور القيامة بالنسبة لبولس . إن حياته استتارت بنور
القيامة وأشع عليه نور القيامة فى حياته . ولكن نور
القيامة أعمى عينين بولس لأن القيامة لابد تكون
مصحوبة بالموت .. مدفونين معه بالمعمودية حتى كما
أقيم المسيح من الأموات نسلك نحن أيضاً فى جدة الحياة .

ومش من حق أحد أنه ينال بركة القيامة إلا اللي ذاق الموت مع المسيح .. الموت عن محبة العالم.. الموت عن شهوات الجسد .. الموت عن الأرضيات .. اللي هو يبقى ابن السماء .. قال له طيب أعمل إيه علشان أبتدى أكون ابن لك ؟ ودى من النقط المهمة خالص للناس اللي بيتكلموا عن الخلاص إن هو يعنى ممكن إنسان منفرد لوحده يقول أنا اتخلصت وخلاص . قال لا يا بولس روح لبيت حنانيا .. روح للكنيسة وهى توربك ماذا ينبغى أن تفعل ، إنما كل واحد يشط فى سكة لوحده ويقول أنا أعمل اللي عايز أعمله دى علاقة خاصة بينى وبين ربنا !!! قال له روح للكنيسة ورغم إن الكنيسة كانت خايفة منه لأنه معروف عنه إنه راجل بيقتل ويشرد الناس لكن الله ظهر فى رؤيا لحنانيا وقال له اقبله . فحنانيا فتح له الباب بتاعه .. فدخل .. قال له احنا سمعنا عنك الحاجات الوحشة اللي بتعملها . قال له أنا ظهر لى نور فى الطريق وقال لى أروح وأجى لك . ماذا ينبغى إن أعمل . قال له آمن . قال له آمنت .. آمنت بالمسيح إن هو ابن الله ..

قال له هذا لا يكفى ، لابد إن إنت تعتمد من الكنيسة ،
فاعتمد بولس الرسول فى ذلك اليوم . وللوقت .. للوقت
وقع قشور من عينيه فأبصر .. ودى من أجمل النقط
الدقيقة ودى تورى إن المعمودية اعطاء بصيرة جديدة
لنفس اتعمت .. والعين اللى اتفتحت دى هى عين القيامة
الجديدة اللى أبصرت ربنا لأن الراجل الأعمى أول لما
فتح أول واحد شافه بص كده لقى يسوع بالجسد لكن
اتفتحت عينين بصيرته الداخلية علشان يقبل المسيح فى
حياته.

فالكتاب المقدس حب يورينا عمليا إن بولس الرسول لم
يستطع أن يقبل المسيح عملياً إلا عن طريق الكنيسة
وعن طريق المعمودية . أى تفتيح بصيرته الداخلية
فأبصر يسوع . ولو تلاحظ فى سفر الأعمال إن استمرار
القصة دية كانت هى القصة المفضلة عند بولس الرسول
اللى يحكيها فى كل موقف كلما يروح حتة . ويقولوا له
ايه حكايتك ؟ وايه اللى بتتادى بيه ؟ يقول لهم ها أحكى
لكم عن الموضوع ايه : إن أنا كنت ماشى ومعاند ربنا

وبعدين حصل كذا فى الطريق ، وبعدين رحى الكنيسة
وبعدين أبصرت . هو فى الواقع لو تأخذ بالك بولس
الرسول بيحكى قصة قيامته .. بولس الرسول بيحكى قصة
ولادته الجديدة .. كيف صار ابن الله .. بولس الرسول
بيحكى كيف اتعمت عينيه واتعبر عن حياته الماضية إن
هو إنسان أعمى فى بصيرته وفى حياته وكيف أنه عن
طريق الكنيسة نال سر المعمودية فأبصر للحال ..
واكتشف نور المسيح فى حياته.

أهو ده الطريق .. الطريق إن احنا نكون أولاد لربنا
علشان كده الإصحاح اللى اتقرأ علينا النهاردة بيقول له إن
أنا ماضى لأعد لكم مكانا عند أبى .. قالوا له يعنى المكان
ده ها يبقى أوض كده مبنية فى ربح بعضها . قال لهم إنتم
مش فاهمين المكان عند أبى إنكم تبقوا أولاده فهو ده
المكان وإن وصلتم للدرجة إنكم تبقوا أولاد حقيقيين لله
أتى وأخذكم .. طب وما بتأخذناش ليه على طول ؟ قال
إنتم طلعتم من المعمودية وإنتم اترشتم برشم الموت عن
العالم .. فأصبحتم مش أولاد للعالم ، واطرشتم برشم الآب

السماوى . فأصبحتم أولاد الله .. وسبتكم فى العالم لغاية
لما تتضجوا وتكونوا أولاد حقيقيين زى ما بيقول فى
رسالته للعبرانيين النهاردة : "محرضين بعضكم بعضاً
على الأعمال الصالحة وتبعدوا عن الشر وشبه الشر وعن
الأعمال دى وتكونوا أولاد للسماء.

ومعنى إن احنا نعرف الطريق مش يعنى إن هو ها ييجى
وياخدنا .. مش ها ييجى وياخدنا لما نموت ويعملوا لينا
جنازة .. يبقى دى النهاية بتاعة الطريق بتاعنا.. لا .. دى
ها ييجى ياخدنا يوم احنا ما ندرك أبوة الأب لينا وتتعمق
فى حياتنا فنصير ليه . وإمبارح بيقول الكلام ده " الذى
يحبنى يحبه أبى وأنا أحبه وله أظهر ذاتى " .. وأنا أعرفه
ذاتى . ها تعرفنا إيه يا يسوع عن نفسك ؟ ها أعرفكم أنى
أنا ابن الله . الحنة الصعبة اللى الناس مش قادرة تفهمها
اللى إنتم بواسطتها ها تعرفوا الطريق .. اللى أنتم كمان ها
تكونوا أولاد الله . ففيلبس أول لما طرق لذهنه قال له
ورينا الطريق أو ورينا الأب وكفانا . وتوما قال له ورينا
الطريق . قال له أنا هو الطريق ، تعاليمى هى دى

الطريق .. هي تعرفكم الطريق وتعرفكم إزاي الوصول للآب.

الكتاب إمبراح بيقول : الذى يحفظ كلامى يحبه أبى وإليه نأتى وعنده نصنع اقامة دائمة .. نصنع منزلاً. ويقول أيها الآب أريد أن هؤلاء يكونون معى حيثما أكون. طب هو المسيح فين ؟ أنا معكم كل الأيام وإلى انقضاء الدهر . علشان كده القيامة يا أحبائى تكمل باكتشاف أبوة الله لنا . ما يكفيش إن احنا نقول إن احنا قمنا مع المسيح ولكن لابد أننا نحس أننا اولاد الله .

أما حركة الصعود دى فليست مرتبطة بصعود الروح بتاعتنا يوم ما نموت للسماء لكن بولس الرسول بيتكلم بأسلوب الماضى يقول " أقامنا معه ، أصدقنا ، أجلسنا معه " ويرجع تانى ويقول : " أما نحن فسيرتنا السيرة بتاعتنا وسلوكنا على الأرض مكتوبة فى السماء. يعنى إحنا بنتحرك بحركة من السماء . عارف بي فكرنى بالطيارات اللى ما يبقاش فيها طيار ويحركوها من تحت بالردار ولا بحاجة كده ولا باجهزة الكترونية .. فتبتدى

الطيارة تتحرك وتوصل للهدف بتاعها وهى مافيهاش راکب ولا حاجة.

إحنا بالضبط دلوقتى على الأرض نتحرك من فوق لأنى إحنا أولاد للآب ، وعلى رأى واحد فى تعليقه على الموضوع ده بيقول الطفل لما بيتولد من بطن أمه بيتقطع صرته علشان خلاص بينفصل عنها . لكن إحنا يوم ما اتولدنا من المعمودية بقينا أولاد للآب السماوى .. ما اتقطعش الحبل اللى رابطنا بالآب السماوى .. بحيث إن إحنا فى كل لحظة نقدر نتصل بيه . أنا ما أقدرش أتصل بأبويا وأمى فى كل لحظة ، لكن أنا .. أبويا السماوى أستطيع إن أنا ما انفصلش عنه لا لحظة واحدة ولا طرفة عين .. ولا فى صحياتى ولا فى عملى ولا أنا فى وسط الكنيسة ولا أنا فى وسط الشارع .. فى كل وقت هو أبى السماوى . دى حركة الصعود المستمرة اللى قال عنها داود النبى "رتب مصاعد فى قلبه" شوف داود بالروح من بعيد شاف إن ممكن الصعود ده ها يكون حركة داخلية

باطنية كامنة فى داخل القلب ، فيقول رتب مصاعد فى قلبه . هذا هو الطريق .

الطريق يا إخوتى إن احنا نكون أولاد لربنا وهذا الإحساس عندما ينمو بيأخذ حيوية فى حياتنا . بالحقيقة نكون أولاد لربنا . احنا أخذناه بالمعمودية لكن لابد أن يكون ده احساسنا إن أنت ماشى كده .. محضون فى حضن ربنا .. إن أنت ماشى كده فى رعاية أبوك السماوى إن أنت ماشى فى ناموسه تلمج نهراً وليلاً .. إن إنت بتنفذ وصيته لأن أنت ابنه .. إن أنت مابتعملش حاجة وحشة علشان أنت صورة أبوك السماوى .. يرى الناس أعمالكم الصالحة ويمجدوا أباكم الذى فى السموات .. فالحبل اللى بينا ما اتقطعش أبداً .

حركتنا مش بالأرض . يغلط الناس كثير ويقولوا الوسط بيؤثر والمجتمع بيؤثر علينا . ده الناس اللى هم ما ارتبطوش بالأبوة السماوية لكن اللى لهم أب فى السماء وهم أولاده بيتحركوا حسب مبادئ الآب وحسب تعاليمه وحسب توجيهاته وحسب ما يرضيه لأن الإبن الكويس

يحب إن هو يكون صورة أبوه ويكون فى طاعة أبوه . هو
ده الطريق .

بيقول له ورينا بقى الطريق .. قال يا نهار أبيض يا فيلبس
! أنا معك كل هذا الزمان ولم تعرفنى ! أنا فى الآب
والآب فى .. ما هو الطريق إن أنا عاوز أنقلكم علشان
تكونوا أولاد للآب . لذلك بولس الرسول يؤكد هذا المعنى
بمنتهى الوضوح إن الله .. إن المسيح كرس لنا طريقا
بوصوله إلى الأقداس العلوية بجسده الذى هو الكنيسة ..
فهو ده طريقنا . إن احنا الطريق إن أنت تكون فى صلة
مستمرة بالآب السماوى . ويمكن دلوقت تقدر تكتشف
بوضوح معنى الآية اللى قالها ربنا يسوع فى يوم من
الأيام " إن لم ترجعوا وتصيروا مثل الأطفال لن تدخلوا
ملكوت السموات " . وإحنا نقول آدى الأطفال دولت أصل
الأطفال أبرياء .. أبرياء والأطفال دولت أنقياء فى القلب
ودولت ناس كويسين .. فربنا عاوزنا نكون زيهم . وإنما
بينى وبينك ما فيش حد يعرف يقول يا بابا ويطلعها من
قلبه كده ، أو يقول يا ماما ويطلعها من قلبه بمنتهى الثقة

والقوة زى الطفل . فالمسيح عايز يقول كده لما إنتم بقى
ها تعرفوا الطريق ساعة ما تطلعوا الكلمة دى .. من قلبكم
وتقولوا يا أبانا الذى فى السموات . ولما إنت بتحب تتأمل
فى الصلاة دى ، التلاميذ سألوا المسيح وقالوا له علمنا أن
نصلى . قال لهم هأديكم نموذج .. نموذج تصلوا بيه . هو
ده النموذج اللى تدور حواليه كل صلواتكم.

كونوا قديسين لأن أباكم قدوس .. أبانا الذى فى
السموات ، ليتقدس اسمك .. فاطلبوا ملكوت ربنا مش
ملكوت الأرض .. اهتموا بالأمور السماوية وبانتشار
ملكوت ربنا .. ويملك ربنا على قلبكم مش بملكوت
الأرض . قولوا له لتكن مشيئتك يا أبانا .

آه لما الإنسان مننا يوصل زى المسيح كان بيصلى
فى جثيمانى ويقول له كده أيها الأب " إن شئت أن تعبر
عنى هذه الكأس " وطب وأنت عاوزها تعبر ؟ قال له لا
ده رجع وراها ويقول لكن من أجل هذه الكأس أتيت . ده
أنا جاي مخصوص علشان الكأس ده ، بس أعرفكم إزاي
تصلوا .. إن شئت أن تعبر عنى هذه الكأس ولكن لتكن لا

مسيحي ايها الأب بل مشيئتك " . يا سلام لما يوصل الطفل
كده . لما توصل بنعمة ربنا ان مشيئة الأب هي المشيئة
التي تكون ثابتة في حياتنا . مش مشيئتنا إحنا وإن إحنا
نكون فديسين نظير أبانا القدوس ، وإن ملكوت الله يملك
على قلوبنا نظير إن إحنا بقبيا أولاد للملكوت .. هذا هو
الطريق .

إذا لا يوجد طريق للأب إلا المسيح ..ليه ؟ لأن
المسيح هو ابن الأب بالطبيعة .. كلمة الله . ونحن صرنا
أعضاء في جسد المسيح ، والمسيح أخذ هذا الجسد وكرس
به طريقاً ودخل إلى الأقداس العلوية .. فصرنا أولاد الله .
الله يعطينا يا أحبائي نعمة الصعود المستمر في
تقوى لكي تكون حياتنا الدائمة على الأرض أننا نحس
بموتنا وارتباطنا بالسمااء أكثر من ارتباطنا بالأرض التي
نحن فيها .

لأبنا المجد دائماً أمين



عشية الأحد الأخير من الخماسين المقدسة

عشية الأحد الأخير من الخماسين المقدسة . لأن الأحد الجاي هيكون أحد العنصرة ، وإحتا بنعمة الروح القدس المعزى إن يوم الخميس اللي فات ، أو عشية الأربع إن المسيح رب المجد أكمل رسالته بالنسبة لمحبيه العالم وتجسده وصلبه وقيامته ، والمرد اللي بنقوله في الكنيسة أو في الإنجيل أو في كل صلواتنا إن المسيح صعد إلى السموات وجلس عن يمين أبيه . زى ما كنا بنتكلم مرة زى ما يكون واحد عنده مشوار شا يمشى فيه ألف كيلو ، ووصل لغاية الكيلو ٩٩٩ يبقى لسه ما وصلش للحتة اللي رايحها .. مشى ٩٩٩ كيلو ، وفاضله كيلو واحد . طبعاً يبقى ما وصلش .. لكن ساعة المسيح زى ما بتقول الكنيسة أصد باكورتنا إلى السماء وأخذ جسدتنا في شكله المبارك ، وأجلسه عن يمين الآبا .. خلاص كمل كل شيء . لأن المسيح جاء إلى العالم ، وتجسد لألكن

ينقذنا من الخطية . طب افرض غفر لنا الخطية وما بعد ذلك ايه ها يكون بعد كده ؟ ولا علشان يدبر أمورنا ويعولها ويرتبها فى كل مرة نطلب ليه . المسيح نزل مخصوص علشان يأخذ الكنيسة ويحطها فى يمين الآب ، وقال لتلاميذه اعدوا هنا فيه شغلانة مهمة جداً انا لسه ما عملتهاش ليكم . قالوا له إنت عملت كل حاجة .. إنت مت على الصليب ، وأخذت جسدنا ومت بيه وقمت بيه .. ايه اللى ناقص بعد كده ؟ قال لهم أنا لسه فيه حاجة لسه ما عملتهاش ليكم . قال لهم أنا رايح أرسل لكم موعد الآب ﴿الروح القدس﴾ .. لأن أنا الهدف النهائى إن أنا أكشف لكم عن حقيقة سرية تحتفظوا بيها أنتم كمسيحيين .. لأن أنتم ما إنتوش عبيد .. إنتم أولاد الملك . وأن أنا أروح أبعت لكم الروح .. روح الآب . بالنص كده أبعت لكم موعد الآب الذى من عند الآب ينبثق .

لما موعد الآب ده يحل عليكم ، ويسكن فيكم .. الروح اللى فيكم هو روح الآب والروح نفسه سيشهد أنكم أولاد الله . فى ذلك اليوم لا تسألونى شيئاً لأن الآب نفسه

يحبكم وروحه موجود معاكم . فزى ما بتقول إيه .. هو
بيوصى التلاميذ وبيقولهم إوعوا تفتكروا إن كل حاجة
اتعملت خلصت . قالوا له فاضل إيه ؟ قال لهم لسه ها
أبعث لكم روح الآب اللى ها ينبثق من عند الآب .
سأرسله لكم ويستقر فيكم بعد كده ما يتخافش عليكم أبداً
تبقوا إنتم أولاد ربنا .. وزى ما اتكلمنا المرة اللى فاتت
او مش عارف إمتى .. يعنى قبل كده .. من يوم الخميس
قلنا إن الهدف الأصلي للسيد المسيح إنه يدخلنا لأبوة
الآب والهدف الأصلي لحلول الروح القدس يوم الخماسين
إن روح الآب يسكن فينا حتى نقدر نقول ياأبانا الآب .
فكل هذه الأمور معمولة علشان خاطر نبقى نوصل فى
الآخر إن إحنا نكون أولاد ربنا ، وإن كان آدم إنطرد من
الجنة وفقد رتبته إنه هو يسمع صوت ربنا .. وإنه هو
يبقى خليفة ربنا المطيع الكويس ، وإن هو ليه اشتياق
فى الحياة مع ربنا . فإحنا فى عصر النعمة الجديدة مش
ها يخلينا المسيح يرجعنا للفردوس لرتبتنا الأولى .. لكن
سنكون أولاده وعاوزك تكون واعى يعنى وقادر تدرك

بعمق إن أبوة ربنا مش بالكلام ، مش إته دعانا كده..أو
تبنانا وبس لكن سكب روحه فينا..سكب روحه فينا اللي
هو روح الآب.

الواجب اللي إحنا عاوزين نحطه قدامنا في
الأسبوع ده الإصحاحات ١٤، ١٥، ١٦، ١٧ من إنجيل
معلمنا يوحنا من ١٤ إلى ١٧ .. ١٤، ١٥، ١٦، ١٧ .. ابتداء
المسيح يتكلم مع تلاميذه عن الآب علانية كلام مذهل..
بينى وبينك مش إحنا معانا الروح القدس لغاية دلوقتى ما
بنقدرش نستوعب أعماقه ومعرفته لأن ما بنديش الروح
القدس القدرة على العمل فى حياتنا علشان يكشف فينا عن
طبيعة الآب .. لكن قف بكرة من أول الإصحاح الـ ١٤
تحت كلمة الآب خط تحتها خط هتلاقى إن الأربع
اصحاحات بتتكلم عن الآب.. ما كانش قبل كده بيتكلم عن
الآب وحصل فى ذهن التلاميذ لخبطة وسأله توما وقال له
" عرفنا الطريق". قال له أعرفك الطريق إزاي ؟ الطريق
فى المسيحية هو كده : الآب بيحب الابن ، والروح القدس
هو روح الحب . والآب والإبن واحد وأنا فى الآب والآب

فى . طب الطريق للوصول للآب إيه ؟ هو ربنا يسوع
بيقول كده ما تتعشب نفسك طريق الوصول للآب ده كان
يعنى مش شطارة ولا قدرة عقلية لكن الآب نفسه أرسل
ابنه كلمة الآب أخذ الجسد بتاعنا ، وأخذ هذا الجسد
وارتفع بيه عن يمين الآب ثم أرسل لنا روح الآب وسكن
فينا . هو ده الطريق .. عرفت بقى لما توما يقول له ورينا
الطريق . يقوم المسيح يقول له أنا هو الطريق . يعنى يا
توما ما كانش فيه سكة تانية للبشرية دية إن ترجع لحضن
الآب مرة تانية وتدرك أبوة الآب إلا لما أنا أتجسد وأخذ
جسدها وألتحم بها وأصعد بجسم بشريتها ليمين الآب
وأبعث من عند الآب الروح القدس يسكن فيها . أهو ده
الطريق .. فده الطريق ليس فى قدرة الإنسان ولا فى
جهده .

علشان كده إحنا بقينا أولاد الله يعنى مع بعد
الفارق . مش الإبن ملهوش الفضل على أبوه وأمه ويقول
لهم إنتوا اللى جبتونى .. أنا جيت نفسى . هم يقولوا له
ياابنى ده إحنا اللى جبناك .

بيقولوا له أرنا الطريق .. أى طريق ؟ عشان
ايه؟ تفكر الطريق عشان يعنى يبقى راجل صالح وتقى
ويخاف ربنا ويبقى من الناس بتوع ربنا ! لأ الطريق يعنى
تدخل فى تعداد أولاد ربنا .. وتتولد من فوق .. قدى
عملية المسيح حسبها حساب دقيق جدا . الأول الدافع ليها
كان الحب لأن مفروض علاقة الأب بأولاده تكون علاقة
حب . دى العلاقة اللى بتربطهم . فقال هكذا أحب الله
العالم حتى بذل ابنه الوحيد .. وتكلم ربنا عن الآية ديه
بالذات فى الوقت اللى كان بيتكلم فيه عن كيف نولد من
فوق مع نيقوديموس قال له إزاي أنا أدخل ملكوت ربنا ؟
قال له ما تفكرش إن ده ها يبقى يعنى ملكوت ببوابة
كده.. وها ننقى الناس الكويسين ونحاسبوهم.

ملكوت ربنا هو ملكوت ابن محبته ، فإزاي إنت
يانيقوديموس هتدخل عشان تكون ابن ؟. قال له آه يبقى
لازم أدخل بطن أمى تانى .. وابتداً يكلمه : الملكوت فى
المسيحية تنفهم إن هى بمعنى الولادة .. يعنى عشان أنا
أكون فى ملكوت ربنا أكون مولود من ربنا .. قال له
طيب أتولد من ربنا إزاي ؟ قال له أنا ها أحطلك الميلاد
من الماء والروح من المعمودية .. لكن لا بد أن تعرف إن

قوة الميلاد من المعمودية وفاعليتها بالمسيح .. لان انا
بذلت ابني الوحيد علشان إنتم يتحد بيكم .. ويموت عنكم
.. ويقوم بيكم .. ويوصلكم للسماء ، ولا يوجد طريق
آخر لمعرفة ربنا ..

ما إحنا عرفنا بقى يعنى إيه معرفة ربنا .. إن هو
ادراك أبوته .. وإن إحنا نكون ولاده .. مافيش طريق
لإدراك معرفة ربنا إلا هو المسيح .. هيكون فيه طريق
تانى إيه ؟! الطريق اللى كان ممكن يرسمه ربنا هتبقى
بنوة مصطنعة .. يعنى هتجيب واحد من الشارع كده تقول
له يا ابني أنا هأسميك ابني من النهاردة ، وإنت تبقى تقول
لى يا بابا . هو ربنا عاوز يحمل كده مع الناس ؟ .. يقول
كل الخليقة دية ما هم ولاد ربنا .. لأ .. دى البنوة دى
بنوة حقيقية دخلت فيها فعلا إلى إدراك حب الأب لينا ..
علشان كده ممكن من الكلمات اللى تتكرر كثير
جدا وإنت بتقرأ الإصحاحات من ١٤ إلى ١٧ كعلامة لبنوة
الله اللى هى المحبة .. وبيتكلم " بهذا يعرف الجميع إنكم
أولادى إن كان لكم حب بعضكم لبعض " . وها تكونوا
تلاميذى وبعدين يقولوا له طيب نكون ولادك إزاي ؟
ونكون مخلصين ؟ قال إثبتوا فى محبتى . ويرجع فى
ختام الحديث فى الأربع اصحاحات دولت يقول أيها الأب
أريد أن هؤلاء يكون فيهم الحب الذى أحببتنى به وأكون
أنا فيهم . فأنت تدينى من الحب ده .. تديهم من الحب اللى
إنت بتحبنى .

بس انا عايز اوضح نقطة صغيرة بنعمة المسيح
وتقدر تقرر يعنى واضحة بمعونته فى ذهننا إزاي ؟ أنا
أخذ الحاجات بتاعه المسيح . ويتكلم عن الروح القدس
يأخذ مما لى ويعطيكم . طب الأب يحب الإبن لأنه حب
وحدانية لأن الأب والإبن واحد .. الأب والإبن واحد .

يقول له أنا كمان عاوزهم يكونوا واحد فى كما أنا
واحد فيك ، عاوز الحب اللى فى .. اللى بتحبني بيه يكون
فيهم وأكون أنا فيهم . إزاي ده إحنا هناخذ .. هنشارك
ربنا فى الحاجات ديه ؟ دى حاجات الهية .

قال ما هى دى البنوة .. البنوة أنت ما بنعلمش
الأب تقول له إديهم من الحب اللى إنت أخذته من باباك
مثلا .. لا .. مجرد إنه هو بقى ابن من اللحم والدم خلاص .
وتبص تلاقى فيه عاطفة حب كده .. أحيانا ساعات الواحد
يستغرب .. وتحبه على إيه ؟ ده هو عمل حاجة وحشة ..
يقول له معاش .. أنا باحبه لأن هو ابني .. الحاجات اللى
إحنا أخذناها من الأب أخذناها بطريق المسيح . لأن اتحاد
المسيح بطبيعتنا بجسدنا خلانا ناخذ من الحاجات بتاعته
من اللى خلنى معلمنا بولس الرسول يقول فى رسالته

لكولوسى " لأنكم قد متم وحياتكم مستترة مع المسيح فى الله "، يعنى احتياجاتنا مستترة مع المسيح الله .. وبعدين يرجع يتكلم عن المجد . طب أنا هاخذ المجد إزاي؟ السماء فى الديانات الثانية مثلا أو الحاجات ديه ، أى عند قدماء المصريين أو عند أى حاجة .. اللى يعمل خير معين ولو قد ذرة واحدة هياخذ جزاء .. واللى يعمل شر هياخذ جزاء .. هتبقى فيه محاكمة .. ده صحيح .. فيه دينونة للعالم كله . لكن أنا بأتكلم عن المجد . قال لأ .. المجد ده حقنا كأولاد لأن ما دام إحنا فى المسيح يبقى المجد اللى للمسيح إحنا هانعيش فيه .. مش لأنه هو أصلاً من حقنا ، ولكن لأننا فى المسيح أصبحنا نتمتع بيه . فالحاجات اللى أخذناها من ربنا كلها بالروح القدس أخذناها من أجل اتحادنا بالمسيح فصرنا واحد فيه .

دلوقت أنا عاوز أركز الكلام النهاردة على الحاجة اللى إحنا بنتقبلها : روح الأب . قال من غير روح الأب ما يحل فيكم مش ها تكونوا أولاد . أول آيه قالها فى الأربع اصحاحات دوت ١٤، ١٥، ١٦، ١٧، أول آية قال " لا

تضطرب قلوبكم " واطكررت كثير فى النص .. لما انا قلت لكم ان انا ماضى للآب ملأ الحزن قلوبكم . لا تضطرب قلوبكم يعنى ايه ؟ قال ديه علامة من علامة إنسان فيه روح ربنا .. إذا كنت أنا فعلاً.. إذا كنت أنا هيكل لروح ربنا وهو ساكن فى وده روح الآب . طب أنا أخاف ليه ؟ ده إذا كان روح ربنا فى فالمفروض أنا ماخفش لأن هو مسئول عنى . مين اللي ها يحرسنى تانى ؟ أنا اللي هاحرس روح ربنا اللي فى ولا روح الآب هو اللي هاحرسنى ؟!.. أنا اللي هادافع عن نفسى .. ولا هو ها يدافع عنى ؟ الآية دى بتعزى الواحد جداً وخصوصاً فى الأيام اللي يبقى فيها مشاكل أو اضطهادات فى الكنيسة ، أو أحياناً الشيطان يصور لنا كده صور إن فيه حاجات معتمة فى الطريق .. وبعدين نقول ده روح الآب ساكن فىنا .. وأول كلمة قالها لا تضطرب قلوبكم . طيب ياربى يسوع ما اضطربش ليه ؟ قال .. لأن المنازل فى بيت أبى كثيرة وأنا ماضى لأعد لكم مكان .. حتى إذا أعددت لكم مكاناً أتى وأخذكم حتى حيثما أكون أنا تكونون أنتم . بس

عشان كده ما نضطربش .. قال آه وأنا مش واصيتكم
زمان وقلت لا تخافوا من الذين يقتلون الجسد .. ما هو أنا
البنوة بتاعتي أنا واخدكم عشان تكونوا أبناء لى إلى الأبد
فى السماء.

ما تضطربوش ولا تخافوا أبدا لأنى مش ممكن
بنوتكم حد يقدر يعتدى عليها . وده اللى خلى بولس يقول
وهو فى السجن مين يقدر أن يفصلنى عن محبة الله التى
فى المسيح يسوع حتى لو فى السجن .. ده أنا هأقول لك
أكثر من كده . هل ممكن إنسان .. أنا مثلا وأنا باعمل
خطية وحشة .. روح الأبوة .. روح الآب اللى ساكن فى
يفارقنى ؟ قال .. أبدا .. ما يفارقنيش ده لو واحد أنكر
المسيح وعمل مش مسيحي وساب المسيحية ورجع تانى
وقال عمدنى بقى من جديد تانى علشان عاوز أبقي ابن
لربنا . أقول له مش ممكن هو أصل روح ربنا ما
فارقتكش .. ما فارقتكش عشان أعمدك مرة ثانية ..

الله .. أمال كان فين روح ربنا ؟ قال كان حزين عشان
كده الكتاب المقدس قال لا تحزنوا روح الله الساكن فيكم

، فالروح القدس حتى بالنسبة للإنسان الخاطي لا يفارقه .
تعرف لو كان الروح ييفارق الإنسان الخاطي ييفارقني أو
يفارقك في فترات ضعفنا ما كوناش نقدر نتوب مرة ثانية
، لأن متى جاء ذاك فهو يبكت على خطية وهو .. هو
اللى بيتوبنا وهو اللى بيحرك ضميرنا ..وهو اللى بيرجعنا
تاني لحضن أبينا ..وهو اللى خلى الابن الضال يقول أقوم
وأرجع لأبى .

أنا عاوز أورى البنوة دى .. يعنى مش بنوة
بسيطة ، ماعندوش استعداد الأب إنه يفرط فى ولاده
فعشان كده بيقول " لا تضطرب قلوبكم " . خلاص خطي
عندكم ثقة إن إنتم فى رعايتي ماديا وحتى لو قتلوا
جسدكم فأنا مضيت وأعددت لكم مكانا . يمكن أنا عاوز
أدخلكم فى مجد أعظم ، وإيه الى ها أعمله لكم حيث أنا
أكون تكونون أنتم . والروح .. روح الأبوة .. لو إنت
سألت أب قلت له تبقى مبسوط ليه ؟ .. بيقول لك لما ابني
يبقى فى حضنى .. ولو سألت الابن أكثر حاجة تبسطك
يقول لك لما أبقي مع بابا .. صحيح الأب مسئول عن ابنه

فى حاجاته المادية .. والأبن بيفرح بالعطايا بتاعة أبوه
المادية . لكن الفرحة الكبيرة إن الإثنين يكونوا فى حضن
بعض ويكونوا مع بعض .. دى الحنة اللى هى هدف
الروح القدس فى حياتنا .. لكن ما بتتحققش أبداعشان
إحنا ولاد ساعات ماينقاش كويسين لكن نلاحظ فى كلام
المسيح الوداعى هذا ١٤، ١٥، ١٦، ١٧ يقول كده .. الأول
حيثما أكون أنا تكونون أنتم .. وأخر آية يقول أيها الأب
أريد أن يكون فيهم الحب الذى أحببتنى به وأكون أنا فيهم
أيها الأب أريد أن هؤلاء يكونون معى حيثما أكون أنا لكى
ليروا مجدى . فإن كنا إحنا من دلوقتى روح ربنا اللى فينا
بنقعد معاه شوية ونبعد عنه شوية وننشغل فى هموم العالم
تانى شوية ، ونتكلم فى الغلا شوية وفى السياسة ونجيب
فى سيرة الناس شوية ، وفى مشاكل العالم والظروف
والأحداث .. الخ .. لكن نرجع تانى ونقول لنفسنا نقعد مع
ربنا أوقات فيه فترات فى حياتنا كده قليلة نقعد فيها مع
ربنا .. الروح القدس لن يستريح إلا لما يكون الابن فى
حضن أبيه على طول . كان القديسين بيمارسوا هذا

الإختبار لكن حتى لو لم نمارس بالفعل فى حياتنا على الأرض لكن ها نمارسه مع ربنا فى حياتنا لما ها نكون فى حضنه للأبد.

فأول نقطة بينبه ليها ويقول إوعى واحد من ولاد ربنا يضطرب ولا يخاف " لا تضطرب قلوبكم ولا تجزع". أوعوا تخافوا أبداً . ياربى إحنا بشر عاديين بس أنا المسنول عنكم . أنا ما أنساش أب كاهن تقى أبونا ميخائيل إبراهيم لما كان الواحد يقعد معاه يقول له يا ابنى طيب هو مين اللى بينظف البيت اللى ساكن جواه ؟ ولا البيت اللى بينظف الجدران بتاعته ؟ أقول له اللى ساكن جوه البيت أقول له طيب ما هو الروح القدس اللى ساكن جوه البيت ده روح الآب . مين اللى يعملك إنت ابن لربنا ؟ إنت اللى بتعمل نفسك ابن لربنا ولا روح الآب اللى جواك ؟ مين اللى بينظف من الخطية ؟ مين اللى يحافظ عليك .. مين اللى يهياك ؟ هو روح الآب اللى ساكن جواك . فدى نقطة تقدر تلقطها بسرعة كده .. إنه ساعة ما بيتكلم عن الآب .. الأول عاوز أقول لك حاجات إنه فى الأصحاحات

الأربعة دولت عشان طبعاً وقتنا مش ها يسمح . لكن
بافتح لك باب تقعد تلقط حاجات حلوة فى الأربع
اصحاحات دولت . كل ما ها يتكلم عن الآب ها تلاقى
كلام مزدوج .. كلام عن الروح القدس وعن الآب .. عن
الروح القدس وعن الآب .. لأن الروح القدس هو روح
الآب . فأول نقطة قولنا إن إحنا ما بنخفش وقلت لك برضه
مرة إن إحنا بنقول إنه ها ينبثق من الآب لأنه هو روح
الآب.

صحيح المسيح اللى ها يرسله وفيه فرق بين
الإرسال وفيه فرق بين الانبثاق . يعنى لما أرسل حاجة
أخذ حاجة وأبعثها .. لكن الانبثاق عملية طبيعية زى
الضوء . ده ما هو منبثق من اللبة . ده منبثق كده .
اللبة ما بتخلصش . والضوء طالع منها . يعنى إذا كانت
اللبة ما بتخلصش لكن الله روح الله الآب ... روحه
ينبثق منه .. بينبثق منه ولأن روحه غير محدودة فينبثق
من الآب فى الإبن . ولأن الابن أخذ الجسد بتاعنا فاحنا
نلنا نصيب من الروح القدس المنبثق من الآب . فالآب

غير محدود والروح القدس غير محدود فهو منبثق
إنبثاق غير محدود ليحل حلول غير محدود في الابن غير
المحدود .. يعنى مش ممكن ينبثق من الآب فى بنى آدم
بشرى زى وزيك .. لكن لأننا إحنا .. المسيح أخذ جسدنا
وصرنا أعضاء فى جسمه . فانبثاق الروح القدس من
الآب فى الابن هو ده يبقى إحنا نصيبنا فى المسيح يسوع
علشان كده كانت كنيستنا واعية . دايماً لما بنقول الروح
القدس المنبثق من الآب .. الكنائس الغربية كلها بطوائفها
المختلفة ما أخذتش بالها وقالت طب ما الروح القدس ما
يصحش ما هو روح الآب وهو روح الابن . وبتقول لازم
لما نقول قانون الإيمان تزودوا حته المنبثق من الآب
والابن . إنما إحنا نقول "الأ" : المنبثق من الآب فى الابن
أو ما بنقولش فى الابن لأنها مفهومة طبيعية لأن إذا كان
روح الله غير محدود إزاي يكون منبثق من الآب والابن
عشان يستقر فى إيه ؟ فى إنسان محدود .. هو روح غير
محدود منبثق من أب غير محدود علشان يحل فى الابن
غير المحدود.

واحننا نصيبنا من الروح القدس نصيب اتحادنا في
المسيح اللى احننا أخذناه بتجسده . بيقول لا تضطرب
قلوبكم ، ما تخافوش لأن أنا أعددت لكم مكاناً . تعال نفسر
حتة حتة كده علشان أوريك إزاي إنت ممكن تمشي في
الاصحاحات دية . أنا ماضى لأعد لكم مكاناً ، أنا كنت
أعرف مثلاً في بيت أبى منازل كثيرة .. إيه المكان اللى
إنت رايح يا يسوع تعده فوق في السماء .. ها تبني
عمارات ؟ ها تبني لنا شقق مساكن ؟ قال لأ .. المكان هو
يمين الآب .. واعدادى للمكان .. طب ها تعد المكان
إزاي ؟ قال هأعد المكان بأن آخذ جسد المسيح ، آخذ
جسدى اللى هو الكنيسة وأحطها عن يمين الآب .. يبقى
أعددت للكنيسة كلها مكان .. يبقى أنا مكاني فين ؟ دلوقتي
أنا عرفت مكان الأوضة اللى قاعد فيها . قال آه أنا
عرفتها فين .. أنا عضو في جسم المسيح .. والمسيح
صعد للسموات وجلس عن يمين الآب .. أنا عرفت
مكاني أنا الأوضة بتاعتي اللى قاعد فيها عن يمين الآب
واخد بالك إزاي ؟ لا تضطرب قلوبكم أنا ماضى أعد لكم

مكانا . إيه المكان اللي ها تعدده لنا فوق ؟ مكان بالمعنى
المادى . قال لأ مكان اللي إنتم هاتبقوا فى يمين الآب .
طب أنا عاوز أعرف أنا أخذت مكانى ، استلمته
كثبت الكونتراتو بتاع الشقة ، اللي هأقعد فيها دى ولا
لسه ؟ أقول لك أنا عرفت مكانى فين . عرفت نمرة الشقة
فين .. وعرفت كل حاجة .. تقول لى منين عرفت كل ده؟
أقول لك لأنى أنا ابنه . ما هو أنا ابنه وعارف بقى يعنى
إيه رايح يعد لنا مكان .. رايح يعملنا اولاد لربنا . آدمى
معنى كلمة أنا ماضى لأعد لكم مكانا . أصل إحنا ماكانش
لنا مكان فى أبوة ربنا .. فهو لما إحنا اتحدنا بجسده وهو
اتحد بجسدنا وصعد بهذا الجسد عن يمين الآب فأعد لنا
مكان عن يمين الآب .. وحل روح الآب فينا (موعد
الآب) . وبالطريقة دية أصبحنا إحنا لنا مكان . عرفت
دلوقتى المكان وتأكدت منه . آه مكانى دلوقتى أنا ابن
لربنا .

وشوف بقى لو نعيش فى المفهوم ده بعمق كده
يبقى لا يفترق أبدا وجودك على الأرض أو فى السماء ..

أو وجودك هنا أو وجودك في جنوب أفريقيا .. أو
وجودك هنا .. أو في بيت تاني أو في كنيسة ثانية .. لأن
في الواقع في الحالة دية إنت أصبحت عضو في جسم
المسيح . وإن مكانك حدد و اتعرف و خلاص إن هو عن
يمين الآب وإن روح الآب هو اللي ساكن فيك .

أنا ماضي لأعد لكم مكان يقوم بسرعة بيجي يقول

له يا رب كيف نعرف الطريق ؟

شرحت لك أنا بقي أنا بأخذهالك آية آية بيقول له

كيف نعرف الطريق ؟ فرد يسوع قال له أنا الطريق
طبعاً لأن الطريق إيه .. هو علشان يكون لنا مكان ..
المكان هو أبوة الآب لنا ، وحلول روحه فينا . طب
الطريق إزاي ؟

الطريق إن المسيح أخذ جسدنا واتحد بيه وصعد
بهذا الجسد عن يمين الآب وأخذنا موعد الآب . يبقى فعلاً
هو المسيح .. هو الطريق أنا هو الطريق .

وبعدين ابتدا يكلمهم عن الآب أنا هو الطريق ليس
أحد يأتي إلى الآب إلا بي . إيه ياربي ؟ يعني إنت تقعد

تنقى ناس ناس كده ؟ قال لا .. مش مسألة ناس ناس لأن
محدث ها يقدر يصعد عن يمين الآب إلا الابن . فاللى
اتحد بالابن هو اللى ليه مكان هناك .. واللى ما اتحدث
بالابن مالوش مكان . ليس هذا تعسف من المسيح لكن
لايقدر أحد أن يأتى للآب إلا بى.

لو كنتم عرفتمونى لعرفتم أبى أيضاً .. دى آية
تانية . إنت ها تمسكهم كده آية آية . يعرفوا إزاي ربنا
بيقولوا ربنا يعرفوه بالعقل .. عقل إيه ده اللى يفهم ربنا
ولا يفهم ولايهب حاجة .. ده العقل ده ما يفهمش حتى
مصلحة نفسه قال أمال إيه ؟! قال لو عرفتمونى لعرفتم
أبى . أصلى أنا ابن الآب . لو اتحدثم بى فالمعرفة هنا
معرفة الاتحاد بالمسيح . لو عرفتم المسيح فهاتعرفوا
الآب . لأن هو أبوه . لو أنتم فى جسم المسيح يبقى أنتم عن
يمين الآب يبقى عرفتوه .

عرفت يعنى إيه لو عرفتمونى لعرفتم الآب ؟
علشان كده لما يتكلم عن المعرفة بيتكى كثير جداً على
الروح القدس إنه هو المسئول عن المعرفة . يعلم ويرشد

ويذكر ويعرفنا عن الأب وياخذ مما للمسيح ويعطينا .
وهنا بقى المعرفة أخذت اتجاه عكسى . بدل ما
المعرفة ما بقت معرفة إنسان لله حسب قدرة الإنسان
وعقله ، أصبحت المعرفة هى انسكاب الروح القدس فى
الإنسان حسب اتساع .. حسب غنى ربنا وغنى الروح
بتاعه وحسب ما تفتح القلب بتاعك فيعطيك روح
المعرفة.

فتعرف ربنا إزاي . ممكن إنسان يكون بسيط جداً
ومعرفته قليلة وما يعرفش يقرأ ولا يفك الخط ولا حاجة
لكن معرفته للأب كبيرة جداً لأنه ثابت فى المسيح..
وسالك فيه سلوك . لأن المسيح قال بعد كده هتلاقيها .
الموضوع أصله متشابك قال اللى يحبني يحبه أبى
وإليه نأتى وعنده نصنع منزلاً . فى نفس الإصحاح . فإذا
كان الحب ده هو علامة معرفة ربنا فمحبة ربنا هاتنسكب
فى قلوبنا بالروح القدس وهايبقى دلوقتى هانخش فى
المعرفة كيف نعرف الله؟

نعرف الله بالصلاة بالإنسكاب .. بالإتضاع ..
بالمحبة .. حاجات تانية مش فى ذهن الناس اللى بيعرفوا
بيها ربنا . ربنا يقولوك يعرفوه تقرأ الكتاب .. تقرأ الكتب
وتشغل العقل بتاعك وتتأمل فى الطبيعة .. والسموات
تحدث بمجد ربنا وممكن تعرف .. والعقل .. والعقل
والعقل... الخ .

وبعدين إحنا نرجع ونقول لما نتضع ونحب ونتحد
بالمسيح ومعرفة ربنا تنسكب فى قلوبنا . تقول لى يا أبونا
وأنا بنقرأ الإنجيل دلوقت بأفهم حاجات ما كنتش بأفهمها
خالص ، جات لى من أين دى ؟ أقول لك بقدر ما إنت
تكون متضع أمام الله وبتحبه وبتحب كلمته هو
مايبخلش .. يسكب من روحه فيملأ قلبك حب ليه . فتبتدى
تحب ربنا فتعرفه أكثر أكثر فتبفى فرحان ومبسوط .. دى
المعرفة.

ومن الآن تعرفونه وقد رأيتموه . قال له فيلبس
أرنا الأب وكفانا . بيقول قد رأيتموه لأن إنتم فى . وأنا
دلوقت صاعد بكم للسماء يبقى رأيتم الأب لأن إنتم فى .

فرد فيلبس وقال له ارنا الآب وكفانا .. قال له يا فيلبس أنا معك كل هذا الزمان .. طب ما هو أنا ربنا يا فيلبس بس أنا أخليت ذاتي وأخذت الجسد علشان أعرفك بيّ .. وإنّ لما تثبت فيّ ها تلاقى كلمة " إثبتوا فيّ " ها تتكرر كثير كثير .. كثير خالص وخصوصاً في الإصحاح ١٥ . يقول أنا هو الكرمة وأنتم الأغصان . إثبتوا فيّ وفي الإصحاح ده ٦ يقول إثبتوا فيّ محبتي . ففيلبس يقول له أرنا الآب وكفانا .. قال له اسكت بقى يا فيلبس لأن أنا والآب واحد . من رآني فقد رأى الآب . إنت بتتكلم عن رؤية ربنا إزاي .. إزاي يعنى تشوف ربنا ما هو أنا السكة .. أنا الطريق دى كماله الموضوع . لست أتكلم من نفسى بل الآب الحال فيّ . صدقوني إني في الآب والآب فيّ . دى كلها آيات بتؤكد الوجدانية .

الحق الحق أقول لكم من يؤمن بي فالأعمال التي أعملها يعملها هو أيضاً ويعمل أعظم منها . لاما تنقش عند الكلمة دى .. ما تنقش عند كلمة يعمل . دى نقطة عايز

أقولها لك . فيه آيات كثير خالص من اللي ها تقراها في الأربع اصحاحات دية ييفسرها على طول . يعنى مثلا ايه .. يقول لها لا تلمسينى لأنى صاعد إلى أبى .. خلاص تبقى اتفسرت .. لأن أنا لسه ما أخذتكيش وطلعت فوق عند الآب .. لأن إنت مش بنت الآب لسه .. لأن عايز يقول لها إنت غريبة . أنا دلوقت أبى وأبيكم ما إحنا إثنين فيه ازدواج لسه لما أصد وأخذكم فوق .

فهنا يقول الأعمال التى أنا أعملها يعملها اللي يعرف الآب ويعمل أعظم منها . الذى يؤمن بى فالأعمال التى أعملها هو أيضا يعمل أعظم منها . وإزاي بقى ده لأنى ماضى إلى أبى . شوف بقى لما تحط كلمة لأنى ماضى إلى أبى تبقى اتفسرت فى الآية . فأننا أعمل الأعمال وأعظم منها لأن المسيح ماضى إلى الآب لأن أنا بقيت فى يمين الآب فبقيت أعمل أعمال عظيمة جدا . لكن لما صعد فوق عن يمين الآب تنفتح عينينا فتبص تلاقى الأعمال أصبحت أعمال الهيأة خاصة بالسمويات .. والحاضر والمستقبل والماضى .. كله انقطعت الفواصل

اللى بينه . فالأعمال اللى فوق .. أعمال أعظم بكثير من
أعمال الأرض . فإحنا ها نعمل الأعمال اللى أعظم .
أه يبقى فهمنا دلوقت لأنه كمل الآية وبيقول لأنى
ماضى إلى أبى . إنما ما تأخذش نص الآية وتقول
الأعمال التى أعملها تعملون أعظم منها .. تيجى إزاي إن
أنا أعمل الأعمال أعظم من الأعمال اللى يعملها المسيح ..
لكن لما يقول لأنى أنا ماضى إلى الأب وإنتم هاتبقوا هناك
يعنى ها تبقى الأعمال بتاعتكم أعظم من الأعمال الأرضية
مش إنتم فى الأرض لكن سيرتكم فين ؟ فى السماويات
وحبكم للإلهيات وأسرار اللاهوت أعطيت ليكم أنتم الناس
البشر البساط ، وإبتديتوا تعملوا أعمال عظيمة جدا
والدوافع بقت دوافع الهية جبارة وتبص تلاقى الأعمال
التي أعملها تعملونها وأعظم منها ليه ؟
لأنى ماضى إلى أبى . شوف تفسيرها بقى .. بقى
واضح على طول لأنى ماضى إلى أبى .
مهما سألتكم باسمى فذلك أفعله ليتمجد الأب بالابن
كل حاجة تسألوها ها تتعمل ليتمجد الأب بالابن .. يتمجد

الاب بالابن قال أه .. مش مرة قال كده ليرى الناس
أعمالكم الحسنة ويمجدوا أباكم الذى فى السموات . طب
إزاي يتمجد الأب بالابن ؟ ها يقول له كده هأنذا والأولاد
الذين أعطيتنى لم يهلك أحد منهم . صعد إلى السموات
ورفع قديسيه معه وأعطاهم قربانا لأبيه . فالآب تمجد..
بص ها أقولك إزاي .. واحد دخل الثانوية العامة وقعد
يذاكر .. يذاكر .. يذاكر طول السنة . آخر السنة نجح ونجح
بمجموع كبير جدا يبقى تمجد يبقى العمل بتاعه اتمجد.
واتمجد فى المدرسين اللي بيدرسوه كمان لأن المدرسين
اللي درسوه هم اللي أدوه العلم ده .. فالمسيح نزل العالم
وأخذ البشرية . ما إحنا طلعلنا وثبتنا فيه ووصلنا فوق
فتمجد الأب بالابن .. تمجد الأب بالابن لأنه أضعنا فوق
فى السماء . يعنى معناها أن رسالة المسيح نجحت ١٠٠٪
ولم يهلك إلا ابن الهلاك.

وهكذا يا عزيزى تستطيع إنك تمشى آية آية فى
الأربع اصحاحات دولت علشان تعرف إيه اللي حصل فى
صعود المسيح وجلوسه عن يمين الآب.

إذ كنتم تحبوننى فاحفظوا وصاياى . أنا أطلب من الآب فيعطىكم معزى يمكث معكم إلى الأبد .. وإلى الأبد يعنى مش وإلى الأبد فى العالم هذا .. إلى الأبد .. ومع الحق الذى .. الذى إيه ؟ .. إيه صفاته روح الحق ده الذى لا يستطيع العالم أن يقبله لأنه لا يعرفه .. لأنه فعلا المسيح قال كده " روح الآب الذى لا يقدر العالم أن يقبله . مايقبلوش ولا يعرفوش . ولما يتكلم عليه ها يتكلم عليه بجهل لأنه مش عارفه . يقول لك الآب إيه والإبن إيه وجواز إيه وخلفوا إيه وعملوا إيه ... دى قضية .. شوف قد إيه إحنا قاعدين نتكلم ونسرح فى الإلهيات والأمور الإلهية الجميلة ، قاعدين فرحانين والموضوع مش ها يخلص وبعدين تبقى تلاقى إيه .. ييجى واحد يقول لك والآب ده له ابن واتخذ له صديقة ومش صديقة وبتاع .. تشرح من فين ولا تجيب له من فين .. صعب خالص .

واجب لطيف خالص ممكن .. شوف بعد كده يقول إيه لا أترككم يتامى طبعاً ما هو ولو فيه عيال ماله مش أب يبقوا إيه ؟ ما هم يبقوا يتامى . لوكانش المسيح

أخذ الكنيسة وقعدها عن يمين الآب وقال له أيها الأب دى
كنيستك والآب أداها الروح بتاعة روح الآب وبقت
الكنيسة دية عايشة بروح الآب ، والروح الذى فيها يشهد
أننا أبناء الله تبقى الكنيسة يتيمة واللى ما أخذش الروح
القدس فى هذا العالم فهو إنسان يتيم لأنه مالوش أب.
مالوش أب . فلن أترككم يتامى .. دى ليها معنى
كبيرخالص .. معناها أن أبوة الله ها تغطى كل يتم
بالنسبة للإنسان بحيث إنه ها يعيش طول حياته فى
حضان الآب إلى أبد الأبدى . مش هى دى صلاة المسيح
لنا إذا صليتم فقولوا أبانا الذى...

فأنت تمشى آية آية كده .. وتقعّد تكتشف فيها أبوة
الآب ليك .. على ما تخلص الأربع اصحاحات دولت تبقى
فهمت وعشت تمام معنى الصعود اللى إحنا احتفلنا بيه يوم
الخميس .

لإلهنا المجد دائماً آمين .



عظة الأحد السادس من الخمسين المقدسة (يو ١٦ : ٢٣ - ٣٣)

الرب يسوع هو غالب العالم

موضوعنا بنعمة ربنا وتعزية الروح القدس هو
اللى رتبته الكنيسة لينا. صعد الرب إلى السماء ، وأوصى
تلاميذه أن لا يبرحوا أورشليم حتى يلبسوا قوة من
الأعلى. وقال لهم إنهم ينتظروا موعد الآب .

كنا بنتكلم إمبراح فى الإصحاحات ١٤، ١٥، ١٦، ١٧
من إنجيل معلمنا يوحنا . الأربع إصحاحات دول من أول
إصحاح ١٤ ، ابتداء يكلم المسيح تلاميذه عن أخطر
موضوع زى ما بيقول النهاردة .. الذى من أجله قد جاء
"من عند الآب خرجت وأتيت إلى العالم وأيضاً أترك العالم
وأمضى إلى الآب".

لماذا تجسد المسيح ولماذا صلب ولماذا قام

ها تقول لى اتجسد علشان يبارك الجنس البشرى
ويحل فى وسطينا . وها تقولى هو اتصلب علشان يفدينا
من خطايانا لأنه بيحبنا. وتقولى إنه قام لأنه أقامنا معه.
سمعنا كثير عن القيامة ماذا بعد ذلك ؟ المسيح ما
ستريحش أبدا إلا لما تكمل رسالته . علشان كده قال لهم
خير لكم أن أنطلق . أحسن ليكم أن أنطلق .. ولو إنتم
تحبونى لكنتم تفرحون لأنى ماضى إلى أبى .. إلى أبى لو
كنتم تحبونى بحق كنتم تفرحوا أن رسالتى تكمل. إيه اللى
عاوزه يارب بالنسبة لينا بعد ما غفرت خطايانا وسامحتنا
وفديتنا ؟ قال أريد أن تكون الكنيسة عن يمين الآب. فأنا
ماضى إلى الآب . ودايماً إحنا نرد فى القداس ونقول
صعد إلى السموات وجلس عن يمين أبيه . فإحنا جسم
الكنيسة .. جسم المسيح الكنيسة ، فالمسيح صعد للسماء
واستقرت الكنيسة فى يمين الآب .. يمين القوة .. يمين
العظمة فى يمين الله الآب ضابط الكل . وأكمل ربنا
يسوع كل عمل ، وقال اتفضلوا الآب أهو فى مواجعتكم .

علشان كده النهاردة برضه من صلواته الأخيرة دية،
بيقول لهم لست أسأل الآب لأجلكم . مش ها أسأل الآب
لأجلكم لأن الآب نفسه يحبكم . أنتم بقيتم خلاص فى
مواجهة الآب.

أبوة الله الآب

مرة ثانية يقول لن أترككم يتامى إنتم من غير أب
كنتم يتامى . أنا جاى علشان أسكب .. علشان أوصّل
الكنيسة لإدراك معنى الأبوة ، علشان تعرف إن الله ده
أبوها . هذه العملية لا يمكن تكون بالبساطة إن ربنا يقول
أنا اخترتكم .. بقيتوا أولادى ، لكن الله المسيح كلمة
الآب لما أخذ جسدنا أعطانا امكانية إن إحنا نكون أعضاء
جسده فوجوده فى يمين الآب يبقى وجودنا إحنا فى يمين
الآب . هو ابن الله بالطبيعة ، وإحنا أعضاء جسده الذى
أخذه من السيدة العذراء .. فإحنا أيضاً أولاد لله .. الله
الآب يحبنا جداً فأعطانا روحه القدس . فقال لهم لا تبرحوا
أورشليم حتى تأخذوا موعد الآب . ولما تقرأ الإصحاحات

دية كلها لا تجد حديث إلا عن الآب . هو ده بيت القصيد .
الموضوع إنه عاوز يوصل الإنسان إلى ادراك احساسات
الله بالنسبة ليه . لأن أوحش ما فى الموضوع إن يكون
ابن عايش مع أبوه ، ويقول لك ده مش أبويا ، أو مش
حاسس بأبوته .

طبيعة الله حب

المسيح نزل من السماء ، وأخذ جسدنا ومات عنا
وفدانا ، وصعد بهذا الجسد للسماء لكى يكشف لنا عن
طبيعة الله الذى يحبنا . " لست أسأل الآب لأجلكم لأنه هو
نفسه يحبكم " .

المسيح أكمل الرسالة بتاعته علشان كده فى آخر
الرسالة بيقول " تأتى ساعة كل واحد يتفرق إلى خاصته ."
ويقوم هيروودس وبيلاطس ورؤساء الكهنة والكتبة
والفريسيين ، وكل دول يقوموا على الرب .. ويقدموا له
الصليب ويتركوه وحده .. ويقول : " ولكنى لست وحدى .
لأن الآب معى " . ده أنا باقدم الرسالة الخطيرة . ده أنا

بأوصل الكنيسة ليمين الآب . هاوصلها له إزاي ؟
هاوصلها له مغسولة بالدم الذكى الكريم طاهرة نقية حلوة
فهاأغسلها بدمى على الصليب .. فالآن الكل تركونى
ولكنى لست وحدى.

روح البينة

وبعدين يرجع يقول لهم شوفوا العالم مش شايفنى إنى أنا
اتغلبت " لكن ثقوا أنا قد غلبت العالم " . فى العالم سيكون
لكم ضيق . يعنى العالم يقدر يسيىء . إذا العالم المادى
يقدر يسيىء لحاجاتنا المادية . ولكن المسيح لما صعد
بالكنيسة اللى هى جسده فغلب العالم لأن العالم بقى تحت
رجلين الكنيسة . غلب الشيطان وارتفع بالكنيسة فى يمين
الآب . فالكنيسة النهاردة ممجدة فى يمين الآب السماوى .
وأخذت موعد الآب . فتح الآب أحشاءه ، وسكب روحه
لأن الآب لم يعطنا أقل من هذا ، لكنه أعطانا روحه
القدس . لذلك يؤكد معلمنا بولس الرسول أننا لم نأخذ بعد
روح العبودية .. ما أخذناش روح الخوف ، بل أخذنا

روح التبنى أو روح الآب ، الذى به نصرخ ونقول " أبائنا الآب". لست أسأل الآب من أجلكم . أنا وصلتكم للآب .. وإنتم دلوقتى تعيشوا فى هذا العالم بهذا الإحساس العميق : إن لكم أب سماوى . وأن الآب السماوى أعطاكم روحه ، وإنتم بتتحركوا بالروح ده . ومعرفتنا عن الله معرفة زى ما كنا بنتكلم ، مش معرفة عقلية لكن هى معرفة أبوة لأن الله سكب روحه فينا فما بقاش إحنا اللى بنعرف ربنا لكن هو اللى عرفنا بروحه .. مش الطفل اللى بيعرف أبوه لكن أبوه اللى بيحتضنه ، بيربيه .. بينشأه ، وبعدين الإبن يبتدى يحس بحنان هذا الآب ، فيبتدى يعرف كل حاجة فيه ويعرف حاجات ما يعرفش يعبر عنها بذهنه .. بعقله البشرى ، لكن يعرف حاجات يحسها ، ويحس ويعرف حاجات فى أبوه ما يقدرش يتكلم عنها بلسانه .. ولا هو يعرف ينطق.

روح المعرفة

فالآب سكب روحه . لما سكب روحه فينا ، فهذا الروح أعطانا معرفة فائقة الوصف . ليس المعرفة التي يتخيلها العالم إنه يقدر يعرف ربنا عن طريق الكتب .. عن طريق المناقشات .. وعن طريق الجدل .. وعن طريق أمور العالم المادية .. كأن الله حكر لإمكانيات إنسان ذكى أو نبيه أو إنسان متعلم .. أو إمكانيات إنسان .. دولة غنية ، أو دولة عندها فلوس تقدر تطبع كتب كثير أو تقدر تعمل دعاية كثير .. أو عندها برامج اعلامية كبيرة .. كأن الله حكر للناس دول . "لا" .. الله مش ها يتعرف بكل هذه الوسائل . ولكن الله أرسل روحه لأولاده ويا ب المعرفة أصبح مفتوح أمام كل واحد منا ، لأن هذا الروح روح الآب يعرفنا بأمر كثيرة ، ويأخذ مما للمسيح ويعطينا . فيأخذ من هذه الأسرار ويعطى أولاده ، فيصبح أولاد الله .. أولاد الآب السماوى عندهم أسرار الهية مسكوبة من عند الآب ليهم . " الحق الحق أقول لكم إن كل شىء تسألون الآب باسمى يعطيكم إياه "

النهاردة عاوز يكلمنا عن نقطة من النقط اللى سجلها فى الإصحاحات دى . إحنا قلنا إن كل الإصحاحات الأربعة دول بيتكلموا عن الآب اللى أحبنا ، واكتشاف الكنيسة ليه . ومكان الكنيسة النهاردة إن هى عن يمين الآب . وإن الآب وهب الكنيسة روحه .. وإن الأبوة مش كلام .. لكن الأبوة حب وانسكاب للروح القدس . النهاردة بنتكلم عن علاقة الابن بأبوه . السؤال : لآن لم تسألوا شئ ، كل ما تسألون الآب بإسمى يعطيكم إياه . أنا لست أسأل الآب لأجلكم لأن الآب نفسه يحبكم .. طبعاً لو أعطى للتلاميذ فرصة للرد على السؤال ده .. ها يقولوا ما إحنا مرات كثير سألنا منك حاجات كثيرة ما إدتها لناس .. مرة كنا قدام السامرة ، وسألنا منك نار تنزل من السماء ، وتحرق أهل السامرة ، ومع ذلك ما نزلتش نار بالعكس زعقت فينا ، وقلت لبطرس اذهب عنى يا شيطان .. ومرات سألنا منك إنك تكتر من الحاجات الحلوة اللى بتفرح الناس دية زى إشباع الجموع ، والحاجات دى وما كررتهاش .. وبعدين جاى النهاردة تقول لنا لآن لم

تطلبوا شيء . قال آه . لأن أنا هدفي كله و رسالة
المسيح كلها إن أنا أوصلكم للآب . وعاوزك تعرف إزاي
الإبن يبتدى يطلب من أبوه . إنتم كنتم فى الأول بتلفوا
حوالين نفسكم ، وبتطلبوا حاجاتكم اللى هى بتخص
ذواتكم . بتلفوا حوالين نفسيكم ، لكن أنا لما نقلت الكنيسة
وبقت فى يمين الآب .. أصبحت الكنيسة إن هى تطلب من
الآب لأن الآب يحبها . وأول حاجة نشوف المسيح فى
طلبته الأخيرة طلب إيه ؟؟

طلبات المسيح فى الصلاة الوداعية الوحدانية

هو رأس الكنيسة .. والكنيسة فى يمين الآب . والأبواب
انفتحت ليها ، وأخذت روح الآب وكل ما نسأل من الآب
يعطينا . طب صلى المسيح قال إيه فى آخر صلاته دى ؟
قال: " أيها الآب أريد أن هؤلاء يكونون واحداً فىّ ، كما أنا
واحد فيك . " فالطلبة اللى طلبها المسيح بالنسبة للآب قال له
زى ما أنا واحد فيك " الوحدانية " دول كمان يكونوا

واحداً فينا لكي يعلم العالم أنك أحببتني.. طلبة غريبة جداً.
ما هو المسيح في الآب واحد .. قال دولت كمان اللي أنا
جايهم من العالم (علشان الرسالة بتاعتي تكون كملت)
يكونوا واحد فيّ .. وإنت واحد فيّ ، فيكونوا واحد فينا .
أمال تفكر روح ربنا ده مش ممكن يستقر .. غير هو
روح الآب وروح الإبن .. إيه علاقته بالإنسان؟ الإنسان
ده لما اتخلق اتنفخت فيه نسمة حياة .. تطلع منه يرجع
الإنسان إلى التراب . لكن لأننا بقينا أعضاء جسمه فيقدر
ما نكون إحنا في حالة من الوجدانية بقدر ما نحس
بانسكاب روح الله فينا . رغم أن الله موجود ، أخذنا
روح الله ، وانسكب فينا بالمعمودية .. علشان كده المسيح
يقول اثبتوا فيّ . على قد ما الغصن يكون ثابت في الأصل
على قد ما يكون كل ما للشجرة الأصلية ابتداء ينسكب
ويجري في الأعضاء اللي هي بقت ثابتة في الجسم.

الثبات فى الله

" إثبتوا فى " .. لو المسيحيين عرفوا العطية اللّى أعطيت لهم قد إيه ؟ إنهم أصبحوا أعضاء فى جسم المسيح ، وإنهم عن يمين الآب ، وكل ما يطلبونه من الآب يعطيهم . أطلب من الآب إيه ؟ .. أنا فى حضنه .. أطلب الوجدانية .. إن أنا أكون واحد .. شوف المسيح هنا فى صلاته فى الآخر يقول : " الجميع تركونى وحدى " تقول ودى صعوبة ؟ قال آه تؤثر فى النفس جدا ، ولكنى لست وحدى ، لأنى فى حضن أبى .. ولكنى لست وحدى لأن أبى معى . قد كلمتكم بهذا لكى يكون لكم فى سلام . العالم .. ده أنا غلبته .. غلبته إزاي ؟ لاشفناك ماسك سيف .. ولا عملت حرب .. ولا نزلت نار من السماء . كنا متوقعين من المسيح كده إن هو يعمل لنا شوية حركات كده تكون فيها نوع من القوة ، والعنف ! علشان كده الناس حتى اللّى قصاده التانيين : الكتبة والفريسيين يختشوا ويخافوا، ويبتدوا يعملوا للمسيحية حساب وبتاع .

قال لهم ما أنا غلبت العالم كله .. والعالم قدر يفصلنى عن أبى ؟!! كلهم تركونى .. وأهاتونى .. وانصرفوا عنى "ولكنى لست وحدى لأن الآب معى ". آهى الطلبات اللى أنا عاوز أوصلها للكنيسة بتاعتى.

خطورة الانفصال عن حضن الآب

هو إيه أخطر على النفس اللى اتولدت فى الكنيسة إلا إنها تتفصل عن حضن الآب . إيه الخطر على الإبن الضال إلا إنه فكر إنه يسيب بيت أبوه ، ويروح لكورة بعيدة . هناك فى الكورة البعيدة كان هو الموت لأنه انفصل عن بيت أبوه .. لكن لما رجع لحضن أبوه مرة ثانية .. دبت فيه الحياة من جديد . ولم يعد للموت أى سلطان عليه . فأصبح هو غالب العالم وغالب الموت طول ما هو فى حضن الآب . فالكنيسة الثابتة فى المسيح تطلب من المسيح كل شىء فيعطيه . إيه كل شىء ده ؟ لسه الحاجات الثانية اللى بنفكر فيها ؟ "لا" .. قال أيها الآب أريد أن هؤلاء يكونوا واحداً فى كما أنا

واحد فيك . فالمسيح النهاردة بيدينا صورة من صور
الصلاة إزاي نصلّي إزاي للآب . قال نصلّي لكي نكون
واحد فيه.

وحدانية المشيئة

ما شفّش المسيح مرة عمل وصية ضد وصية
الآب... لا، لأن هم الإثنين واحد. تقول لي يا أبونا السؤال
ده ما يتسألش. لأن ده كلمة الآب . إزاي يبقى فيه مشيئتين
زى ما غلط البعض وقال فيه مشيئتين وطبيعيتين . مش
ممکن يا أبونا يكون فيه مشيئتين . ده هي مشيئة
واحدة. لأننا لم نر مرة واحدة إن المسيح صنع شيء ضد
مشيئة الآب . وده يؤكد إنها مشيئة واحدة . تقول لي مرة
صلّي ، وقال لتكن لا مشيئتي .. ده كان بيعلمنا .. لكن ما
حصلش إن مشيئة المسيح اختلفت مع مشيئة الآب طرفة
عين ، لأن أنا في الآب ، والآب فيّ ، فإزاي يكون فيه
مشيئتين!! فالوحدانية وحدانية مشيئة. فبقدر ما تنطبق
مشيئتك على مشيئة المسيح ، تكون إنت واحد في الآب

يكون روح ربنا إنت ثابت فيه . آمى دى حتة فى الصلاة
مهمة جداً عاوز المسيح يؤكد عليها . للآن لم تطلبوا شىء
اطلبوا كى تأخذوا كى يكون فرحكم كامل . تطلبوا علشان
تأخذوا علشان الفرح بتاعكم يكون كامل .. طب إحنا يا
رب لما تدينا عطايا تانية ، قال فعلاً بتفرحوا .. أى واحد
بياخذ شىء فى العالم بينال شىء بيفرح .. لكن هذا الفرح
لن يدوم إلى الأبد لأنه فرح من العالم، وبسبب أمور مادية
فنفرح به فترة من الوقت ، وبعدين يخلص ويخلص الفرح
ده.

لكن إن ثبتم فى لايقدر أحد أن ينزع فرحكم ..
لأن الفرح هنا ها يكون ثمر للروح القدس .. ها يكون ثمر
للروح القدس .. الروح القدس اللى سكبه الأب فى يوم
الخمسين ، وأعطى لينا (للكنيسة) علشان إحنا أعضاء
جسم المسيح . هذا الروح المعزى من ثماره الأساسية
الفرح .. الفرح .. لا يقدر أحد أن ينزع هذا الفرح منكم .
لأنه خلى بالك .. أصبح طبيعة الكنيسة اللى هى فى يمين

الآب .. لكنه فرح ليس من فرح العالم زى ما نشوف
دلوقت.

المحبة

نسأل إيه كمان ؟ نشوف المسيح سأل إيه فى
صلاته الأخيرة . " أيها الآب أريد أن هؤلاء يكون فيهم
الحب الذى أحببتى به وأكون أنا فيهم " ، أنا عاوز يكون
فيهم الحب اللى إنت أحببتى به .. ده كلام كبير جدًا لأننا
لما بنتكلم دلوقتى إن إحنا بنأخذ من العطايا بتاعة
المسيح. العطايا بتاعة المسيح اللى ليه عند الآب ، إحنا
دلوقتى بنأخذها لأننا أعضاء فى جسم المسيح . بالروح
المنسكب اللى إحنا أخذناه بالمعمودية وانسكب فينا. بهذا
الروح القدس نأخذ مما للآب. يأخذ مما للمسيح ويعطينا .
المسيح ليه إيه ؟ " أريد أن هؤلاء يكون فيهم الحب الذى
أحبتى به ، وأكون أنا فيهم . " أنا عاوز يكون فيهم الحب
اللى إنت أدبتهونى. إحنا دلوقتى ما بنأخدش ، ما بنطلبش
طلبات على المستوى العادى. الله يعلم هذه الطلبات كلها

وبيعطيها لنا . بيعطيها لنا وزيادة . لكن إبتدأ يرتفع بيننا كأولاد الله ككنيسة قائمة عن يمين الآب ، إلى مستوى أعلى من الطلبات أعلى جدامن مستوى العالم ده.

الإلتصاق بالمسيح

إبتدأ يقول لنا اطلبوا الوجدانية .. اثبتوا قى ، لكى يكون الجميع واحداً فى كما أنا واحد فيك . إبتدأوا اطلبوا إن إنتم لاتتفصلوا عنى لا لحظة واحدة ، ولا طرفة عين علشان تعيشوا الحياة الأبدية .. إبتدأوا اطلبوا من الروح القدس اللى فيكم إنه يسكب حبه . لأن معلمنا بولس الرسول يقول: " لأن محبة الله قد انسكبت فينا بالروح القدس." ولما اتكلم عن انسكاب المحبة بالروح القدس ، كانت المناسبة صعبة . قال " أفخر فى الضيق " ، يعنى معناها إنه كان ساعتها فى ضيقة كبيرة والصبر والضيق أنشأ فيه صبر كبير .. فى وسط الضيقة دية فيه حب انسكب فى قلبه . لم ير له مثيل لأنه ليس من حب العالم . وليس حب بشرى ، ولا حب على مستوى حب إنسان

لإنسان .. أو أب لابنه .. أو أخ لأخوه .. أو زوج
لزوجته. مش حب من هذا النوع أبداً اللي موجود في
العالم .. لكن حب الهى .. مش في قدرة الإنسان يأخذه ..
اسألوا .. لأنه في إمكان الروح القدس إنه يسكبه في قلوبنا
حتى في وسط الضيق . للآن لم تطلبوا شيئاً .

اطلبوا الطلبات اللي أنا طلبتها

المسيح واقف يقول إديهم الحب اللي إنت
إديتهوني .. يا سلام .. قال "لا" مش من الحب اللي في
العالم .. قال له إديهم السلام بتاعى . إيه السلام بتاع
المسيح ؟ سلامه إنه واحد في الآب . قال ليس كما يعطى
العالم أعطيكم ، علشان كده أول آية .. أول آية في صلاة
يسوع الأخيرة دية أول الإصحاح الرابع عشر. يقول كده
"لا تضطرب قلوبكم ، أنا ماض لأعد لكم مكاناً. وإن
مضيت وأعددت لكم مكاناً أتى وأخذكم حتى حيث أكون
أنا تكونون أنتم". فإنت رايح تعد لنا مكان علشان كده
بتقول لنا ما تضطربوش .. إصبروا يعنى .. لا.. أنا مش

رايح أعد لكم مكان عادى . المكان اللى أنا رايح أعد
هاعده ليكم إن أنا هاخذ الكنيسة كلها وأحطها عن يمين
الآب فأصبح الكنيسة ليها مكان .. والمكان اللى أنا رايح
أعده ليكم إن أنا هاحطكم عن يمين الآب ، فها يبقى لكم
مكان عند الآب . ده المكان فعلشان كده ما تضطربش
قلوبكم . أنا ماضى لأعد لكم مكاناً . إن مضيت وأعددت
لكم مكان أتى أيضاً وأخذكم لأنكم أنتم أعضاء جسمى
فعندئذ يكون مكانكم فى يمين الآب . خلاص يبقى لنا
مكان .

دلوقت أنت عاوز مكان ليك ؟ تقول لى لا يا أبونا أقول لك
لما نموت ، ونروح السماء ، ها يبقى لنا مكان فوق فى
السماء . تقول لا ده إحنا النهاردة الكنيسة خلاص مكانها
فى يمين الآب . إحنا لنا مكان ، وإحنا لنا أب دلوقتى ..
هو ده المكان بتاعنا ، مالناش مكان تانى . طبعاً التلاميذ ما
فهموش الكلام ده لكن كانوا بيسألوا دايماً قل لنا حكاية
الآب إيه، والمكان اللى إنت ها تعده شكله إيه ؟ لأن نفس
الإنسان دايماً إنه عاوز يعرف يا ترى المكان ده ها يبقى

مريح ودرجة الحرارة ها تبقى فيه شكلها ايه .. وها يبقى
فيه شجر ولا يبقى فيه زرع .. ها يبقى فيه راحة .. ها
يبقى فيه سلام .. مش .. ها يبقى فيه مشاكل مادية .. ها
يبتدى الإنسان يتعب .. مش ها يكون فيه مرض .. مش
ها يكون فيه تعب .. ها يكون فيه سلام كامل ؟ الأب قال
لهم .. لا .. ده مكان تانى عن يمين الأب، مكان دايم فى
وحدانية دائمة.

.....

.....

السلام السماوى

اطلبوا الطلبات دية .. سلام .. مش من سلام
العالم ، ولو إنى مستعد أدىكم من سلام العالم .. وأحافظ
عليكم .. وأدبر أموركم .. وشعور رؤوسكم أحصيها
وتدعونى فى وسط الضيق فأنقذكم .. وأدعىكم على قد
مستواكم . لكن مش ده الهدف اللى أنا جاي من أجله ..
جاي علشان أحط الكنيسة فى يمين الأب.

وقف المسيح يصلى ويقول : " أيها الأب لست
أسأل أن تأخذهم من العالم بل أن تحفظهم من الشرير". لو

كان المكان إنه مجرد إنه رايح يعد مكان علشان لما نموت
ها نروح نقعد فيه ، والناس تفسر أنه راح يعد مكان
علشان لما يجى يأخذ أرواحنا نبقى نروح نقعد فى السماء
.. ما كانش يقول: " لست أسأل أن تأخذهم من العالم .. بل
أن تحفظهم من الشرير". لأن المكان أعد فعلا وخلص.
وإحنا مكاننا اتعرف إحنا مكاننا دلوقت فى حضن الآب
فكل اللى عاوز يقوله ما ينفصلوش عنك دولت أيها الآب..
ما ينفصلوش عنك .. يكونوا واحد .. يكونوا مملوئين من
الحب ليك.

الفتور الروحي

ايه الخطر اللى يهددنا دلوقتى .. يهددنا الشرير..
لست أسأل أن تأخذهم من العالم ، بل تحفظهم من الشرير.
يهددنا الانفصال عنه .. يهددنا إن محبة الآب فى قلبنا تقل
ودى أوحش حاجة ، ودى إحنا كلنا بنشتكى منها بمرارة
لما ييجى وقت مش عارفين لا نصلى ، ولا نتعامل مع
ربنا .. ونقعد نتكلم بلغاتنا ونقول فيه فتور.. فيه فتور

روحي .. يعنى إيه فيه فتور روحى بين الآب وبيننا ؟ ده روحه جوانا ! .. الفتور الروحي ده جه من إيه ؟
حتى الكتاب المقدس يقول فى سفر الرؤيا "ارجع إلى محبتك الأولى" ارجع .. اذكر من أين سقطت وتب ارجع إلى محبتك الأولى، واذكر من أين سقطت وتب اطلب المحبة .. لست أسأل أن تأخذهم من العالم بل أن تحفظهم من الشرير .. تحفظهم فى الوحدةانية وتحفظهم فى انسكاب الحب فيهم بالروح القدس .. روحك أيها الآب يعيشوا فرحانين بك أيها الآب طول حياتهم مش فى العالم بس إلى أبد الأبدين.

لست أسأل أن تأخذهم من العالم

كل واحد مننا يملأ الفرح قلبه ، لأن هو فى حضن الآب السماوى . "لست أسأل أن تأخذهم من العالم .. خذهم فى الوقت اللى إنت عاوز تأخذه .. وخليهم زى ما إنت عاوز .. لهم رسالة .. بولس الرسول قال : " لى إشتهاء أن أنطلق وأكون مع المسيح فذاك أفضل جدا" . ولكن أن

أبقى لأجلكم قربنا له حكمة في كل حاجة بالنسبة للإنسان
في طول عمره على الأرض ، أو في قصر عمره .. أو
في رسالته التي يؤديها ، أو إلى آخره . ده مش
موضوعنا .. لكن مكان قعاد ، وإحنا قاعدين فيه بس مش
وإحنا قاعدين على الكراسي دلوقت في الكنيسة . لكن إحنا
في حضن الآب ومكاننا معروف .

لست أسأل أن تأخذهم من العالم . ده مش
الموضوع الذي شاغلني .. يعمرُوا كثير يعمرُوا قليل مش
مهم ، لكن احفظهم من الشرير .. احفظهم في وحدانيتك ،
ودائماً إسكب الحب أيها الروح القدس في قلوبهم أكثر لكي
يدركوا حب الآب كل يوم .. كل يوم .. لغاية لما يحسوا
إن حب الآب ليهم أكثر من الإحتمال ..

أنا نفسي كل واحد منّا يعيش في هذا الحب فرحاً
وفي ملء السلام في وسط عالم صاخب ومضطرب
ويفتكر كلمة المسيح الأولانية التي ابتدأ بها صلاته " لا
تضطرب قلوبكم " . ومرة من المرات يقول لهم أنا ماضي
إلى الآب . خلاص هاخذ الكنيسة .

لما كلمتكم عن هذا ملأ الحزن قلوبكم وإبتديتم
تحزنوا. إبتدأ يصلى المسيح ويقول: " أيها الأب لست أسأل
أن تأخذهم من العالم بل أن تحفظهم من الشرير ويصلى
كمان ويقول: " أيها الأب العالم لم يعرفك، أما هؤلاء
فعرفوك . وأنا عرفتهم وأعطيتهم الحب الذى أعطيتنى ..
من أجلهم أقدم أنا ذاتى ليكونوا هم أيضاً مقدسين " .

القداسة

المسيح يقدم ذاته .. ليه ؟ المسيح مش قدوس !!
المسيح قدوس ، ده هو القداسة .. هو القداسة بعينها. ده
إحنا فى مفهومنا بنعتبر مش زى العالم ما بيعتبر. مش
القداسة إن الواحد ما يعملش خطية بنعتبر إن القداسة
هى الثبات فى القدوس. إذا ما ثبتناش فى الله ما نبقاش
قديسين ، لأن القداسة هى الله .. هو وحده القداسة. وإن
ثبتنا فيه هو القداسة. من أجلهم أقدم ذاتى .. تقدس
ذاتك!! قال أقدم يعنى أكرس ذاتى . أنا ذاتى دى أنا
خالق العالم.

المسيح بيتكلم العالم ده كله أنا خالقه .. لكن أنا ذاتى متكرسة ومقدسة فى أولادى دولت . فى أولادى دولت. من أجل ذلك أنا أسأل أن يكونوا قديسين . يعنى هم ها يكونوا واحد فينا .. من أجلهم أنا أقدم ذاتى لكى يكونوا هم أيضاً مقدسين .. طلبه خطيرة جدا اللى هى تكريس الحياة لكى تكون مقدسة فى الله .. وأول لما تكون الحياة مقدسة فى الله تشع القداسة فى الآخرين.

من أجلهم أقدم أنا ذاتى لكى يكونوا هم أيضاً مقدسين . وابتدأت طلبات المسيح تتكرر وتأخذ مفاهيم عميقة جداً إنما ما تقدرش تفسرها بعيد عن الدرجة اللى ها توصل فيها الكنيسة لوحدايتها مع الأب ، أو فى جلوسها عن يمين الأب.

لذلك يا أحبائى هذه الإصحاحات الأربعة محتاجة إلى قراءة بدقة ، وبتأمل عميق جداً بمفهوم إن المسيح وصل للهدف الأخير إنه خلى الكنيسة بقت فى درجة من البنية الكاملة فى يمين الأب وان لا يمكن ان تفهم

المسيحية الا عن هذا الطريق إن إحنا بقينا أولاد الله.
وأولاد الله يعنى مكاننا اتحدد فى يمين الأب.

ونمرة (٢) إن إحنا أعطينا روح الأب نفسه لكى
يسكن فينا . علشان كده العطايا اللى بتأخذها الكنيسة على
مستوى إلهى .. تأخذ بنوة .. تأخذ روح الله .. تأخذ جسد
المسيح ودمه .. تأخذ ثبات فيه .. تأخذ حب إلهى ينسكب
فيها . من أجل هذه الأمور تأخذ تكريس كامل ، تكريس
الحياة لله لكى تكون الحياة مقدسة ومكرسة ليه . تأخذ
الأمور دية كلها علشان كده الطلبات ابتدات تبقى طلبات
الهية ، ليست على المستوى القديم الأولانى اللى كانوا
بيطلبوه لأن الكنيسة الآن صعدت مع المسيح . رفع قديسيه
للعلا معه ، أعطاهم قرباناً لأبيه.

لإلهنا المجد دائماً أبدياً أمين.

